

ASO TOFI, 13 AOKUSO 2015

Na toe faaauau Taulumaga a le Fono Aoao Faitulafono i le itula e 7:00 i le afiafi.

Na toe faaauau Felafolafoaiga i luga o le faitauga faalua o le Tulafono Tau Faaofi o Teuteuga o le Tulafono o Faiga Palota (Nu.3) 2015.

TULAFONO TAU FAAOFI O TEUTEUGA O LE TULAFONO O FAIGA PALOTA (NU. 3) 2015 – felafolafoaiga faaauau i luga o le faitauga faalua

FOFOGA FETALAI: E faasilasila atu ua amatalia nei Taulumaga a le Fono Aoao Faitulafono.

E maualuga le talitonuga a o tatou i ai i afiafi o tapuaiga o le tatou atunuu, ua tatou taunuu mai foi i le taimi faatulagaina o le tatou Fonotaga i lenei itula o le taeao na liugalua, ona ou lagona lea o le a tatou auai faatasi i moliga talosaga o feagai ai le tatou atunuu ma le faaifo o le la i lona tauafiafi, faafetai ai le Atua i Lona alofa ma Lona agalelei ua faataunuuina ma le manuia galuega o le aso. E manatu foi o le a le misi le tapuaiga o le tatou Fonotaga i lenei itula o le po, e momoli atu le faafetai i le onosai mai i le paia ma le mamalu maualuga o le tatou Maota Fono. O le a faaauau le tatou galuega e pei ona tatou tuupoina mai i le aoauli analeila.

E faia le tatou malologa o faaiu mai le saunoaga a le Afioga i le Tamaitai Minisita ona o le tatou Tulafono Tau Faaofi taua, e le toe na ma se laina e leai lava se isi mea o totoe i le folasaga aemaise foi le taumafai atu o le tatou Malo e tali atu i tuleiga ma saunoaga ona o lenei Tulafono Tau Faaofi taua o lo o ua i lumamea o le Laulau a Fono, o le tatou Tulafono Tau Faaofi o Teuteuga o Faiga Palota (Nu. 3) 2015.

E momoli atu ai le faafetai tele i le taeao analeila ma le taimi ua sola ona o la outou faatofalaiga. Ae o le avanoa lea ua toe tuuina atu i lau Afioga le Tamaitai Minisita, tulai maia e faaiu mai le saunoaga. Ua manatu ua atoatagi le paia ma le mamalu o fetalaiiga ma saunoaga i le taeao ua sola.

Afioga Hon FIAME NAOMI MATAAFA: Faafetai lava i lau Afioga le Fofoga Fetalai ma ou te manatu e faaiu le tatou Fonotaga analeila, o saunoa le Taitai o le Malo e tusa ai ma ni mataupu sa tatou talanoaina e uiga i mataupu sa laga mai i matai o isi itumalo i taitoalua, alo foi ma fanau e sii mai i itumalo o lo o matai ai ma tuu atu i itumalo o lo o i ai le tama, o le tama tauva i le palota, po o le tina tauva foi i le palota. Ma o le a le toe faasili foi se matou faamatalaga o lena ua saunoa le Taitai o le Malo.

O le mataupu mulimuli lau Afioga, i mataupu sa laga mai e sui usufono, ma e maitau lava ma le totoa aua e tele ia itu taua na aumai e sui ma saunoa mai,

ma o lea e faamauina atu foi e lenei itu o le tatou Malo aemaise foi au nei o lo o nafa ma le tatou Matagaluega o Faiga Palota.

O le mataupu mulimuli lau Afioga i le Fofoga Fetalai o lea sa laga mai e le sui usufono mo Faleata Sisifo, e pei o ia lava lea sa malosi ia le aumaiga o le mataupu lea, ona o lo o i ai se lape i totonu o le Tulafono Tau Faaofi i le lesitalaina o sui o tatou Itumalo Tu Taulaga ia e fou ua tatou faavaeina i le Tulafono Tau Faaofi na tatou pasia i le masina ua muamua atu. Ou te faamoni i le mau ua momoli mai e le Afioga i le sui usufono, ona o lea tatou te malamalama i le tatou Tulafono Tau Faaofi i le fesiitai po o suiga o itumalo e lesitala ai o le mea foi lea e tau e tatou o le transfer. O lea o lo o faatulafonoina mo tatou itumalo faaalaalafaga e lima a tausaga ona faatoa mafai ona sii pe sui le itumalo, ae peitai atonu pe ua naunau foi le tapenaga mo tatou itumalo tu taulaga, ua pau ai lea fuafuaga mo le lesitalaina o tagata palota mo itumalo ia tu taulaga ma ua maua ai le mea lea e tupu ma saunoa ai foi i ai sui usufono, o nei ua o atu lesitala i itumalo tu taulaga, taeao toe o atu toe sui ese mai i le isi itumalo.

Lau Afioga i le Fofoga Fetalai ma le mamalu o le Palemene, ua faaaoga sese foi ona ua le atoatoa le faamauina o le Tulafono Tau Faaofi i lea itu ma o lea la ua aliae mai, ma o le mea lava lea e tupu i a tatou Tulafono, e avea mea e tutupu, e toe fafagu ma toe faatonutonu mai ai le faamoemoe sa i ai le Tulafono.

Lau Afioga i le Fofoga Fetalai, ona o lena lava mataupu e faasino i le lesitalaina o tagata palota, ma ua le toe mamao foi ae faamuta ia Lola o Faiga Palota i le amataga o Novema pe a, o lea ua i ai se manatu i le Malo, o le a tapena mai vave lava se toe Teuteuga e faasao ai le lape lea. Atonu e faaiu atu ai sau faamatalaga i lau Afioga le Fofoga Fetalai ma momoli atu ai lau faafetai i saunoga foi ma fetalaiga i le Maota i le tatou Tulafono Tau Faaofi lenei, ua le tuua lava i tua o outou finagalo, ma ua faapea foi le tali atu o le tatou Malo e faamalamalama ai tatou mataupu - ma e lagalaga lava le Maota i le umi foi o le taimi na talanoaina ai le vaega o le Teuteuga e uiga i le tautua, e pei foi ona saunoa le Taitai o le Malo, o mea lava ia sa aumai i o outou finagalo i le tatou Fonotaga na tea nei i le masina o Iuni. E faapena foi le faafogafoga atu a le Taitai ma le Kapeneta i mataupu ua laga mai, aemaise lava o le mataupu i le tautua e faapitoa lava mo sui tauva, ma atonu o tagata palota lautele ma le lesitalaina i Lola taitasi, e ao ona faavavevave ma aumai ai se suiga e pei ona laga mai e outou Afioga, a o lea e fai sina lava o le taimi e toe silasila ai le Malo i mataupu foi ua lagalaga mai i le agavaa lea sa tatou finauina i le tulaga lea o le tautua, aua o le tolu vaiaso ae le i oo atu le aso o le Faiga Palota, o le aso lena e faailoa ai po o ai sui tauva, atonu o lea lava o lo o lava se taimi e toe fili ai le tofa ma le faautaga, afai lava ua tataua ona fetuunai, e le tuua e aumai lava i luma o le Maota e fai i ai lo outou finagalo.

Ae faaiu atu ai la sa matou faamatalaga i le folasaga i le tali atu i saunoaga ma fetalaiga i luga o le faitauga faalua o lenei Tulafono Tau Faaofi e le mamalu o le Palemene, faafetai.

FOFOGA FEETALAI: Ia le sui usufono mo Faleata Sisifo?

Tofa Lealailepule Rimoni Aiafi: Faafetai lau Afioga i le Fofoga Fetalai mo le avanoa. E fia momoli le agaga faafetai tele i le Tamaitai Minisita, faamalo le lototele, faamalo le fetalai o le uta, le tofa ma le moe e tusa ai foi

ma fautuaga tuuina atu, o lea la e le gata na e tau, o lea ua ou iloa nei o oe lava o le toa, o le Nafanua lea i ona po nei, o lea ua amata ona vaaia. Lau Afioga, o lea ua e tali i le aga lea. E pei lava ona ou taumafai atu o matou nei o sui usufono Vaimauga ma Faleata i le aso ananafi, pau lava le mea lea e taumafai atu ai i lau Afioga, ia tasi le Tulafono mo tatou uma. O lea ua ausia le finagalo o le Malo ia tasi le Lola Palota mo tagata uma, a toe faatutusa loa ma Tulafono mo tagata uma, ou te talitonu o le tali lea o tatou faafitauli ona leai lea o se suiga tele e tatou te toe taumafai i ai. O lea ua aveese le transfer, faamalo faafetai, ma toe tuu loa i ai ma le mea lea o le aiatatau o le residence o le tagata e toe sau ai, ou te iloa o lena ua tali atugaluga uma o sui usufono o le Maota aemaise matou nei mai Faleata ma Vaimauga, ua lava lea, aua pei lava o le mea e tasi lau Afioga ona o lea sa talanoa ma le Komesina o Faiga Palota, e faafetai ai lava i le Matagaluega o lea ua taumafai foi latou. O le vaega lea i faifeau, ia manatua o faifeau o itumalo ma nuu o i latou nei o lea e faaigoa e tatou o Taitai o lafumamoe, a o lea o lo o tauasuina le Vai o le Ola i totonu o afioaga nei, a o lea ua aafia uma i le Tulafono Tau Faaofi lenei. Se i toe tagai lau Afioga i le Minisita i ai i le vaega lea, aua a faaoga le Tulafono Tau Faaofi lea, ona o lava lea i nai faifeau o lo o tausi nuu, ia e le afaina ia le vaega lea, ma le faaaloalo lava, faafetai.

FOFOGA FETALAI: O lea ua maua le finagalo ma e manatu foi ua tali manino le Afioga i le Tamaitai Minisita, ma e manatu ua malamalama ma le folasaga faaii a le Afioga i le Tamaitai Minisita. E momoli atu le faafetai tele lau Afioga i le Minisita e ala i le taumafai mai e faamaninoina le tali a le tatou Malo. Afai ua umi le soalaupulega ma le talanoaga o lenei mataupu, ou te manatu e sala ina umi, aua e le mama i le Maota Fono lenei, o se tasi lenei o Tulafono Tau Faaofi taua ma o le fatu foi lea o faiga filifiliga a le paia ma le mamalu o le tatou atunuu e afifio mai i le tatou Maota. E leai lava se mea e tasi o toe tuua o lea ua e saunoa malamalama, e fai foi o tuleiga ma saunoaga a sui usufono na agiga i le Maota ma o latou finagalo faaalia aemaise foi fautuaga, a lea ua tau le ai, o lea ua e faaalia manino i lenei afiafi, ia o le aoaogamanogi le tatou galuega. O lea foi ua taua la outou faamanatu i lea itu o le Maota aemaise foi sui usufono mamalu na tulei saunoa, ia tatou ave lea i uta ma le talitonuga, ia tatou faifai malie, o lea ua to lo outou matupalapala o lea ua saunoa manino le Tamaitai le Minisita po o se tasi o atugaluga e aafia tele ai, aua ua tataua ona tatou agai e fai le suiga i le tulaga lea i le transfer e pei ona talanoaina. Ae ui i lea, e momoli atu le agaga faafetai tele i lau Afioga i le Tamaitai Minisita i le tali atu i le tatou Malo, faafetai foi le lavapapale i sui usufono mamalu uma aemaise a outou saunoaga, e taua o outou manatu ma lagona e maua ai finagalo o le Malo e toe fetuutuunai le latou tofa, ia o le tulaga tonu lena i le mea e tau o le tofa fetalai, ina ia taoto i le agatonu ma tulai mai se faiga lelei ma se faiga mautu, ina ia malu le tatou Tulafono Tau Faaofi o Teuteuga o le Tulafono o Faiga Palota (Nu. 3) 2015.

Talu ai ona ua ou taulimaina le Tusi Faamaonia o le Tulaga Faanatinati, ua maea foi ona sainia e Lana Afioga Mamalu i le Sui o le Fono a Sui Tofia e uiga i le Tulafono Tau Faaofi lenei, o lea o le a sagai atu loa le Fono Aoao mo le Iloiloga auiliili.

Na faamaonia le lafo ma faitauina le Tulafono Tau Faaofi o Teuteuga o le Tulafono o Faiga Palota (Nu.3) 2015 i lona faitauga faalua.

**TULAFONO TAU FAAOFI O TEUTEUGA O TULAFONO O FAIGA
PALOTA (NU 3) 2015 – iloiloga auiliili**

FOFOGA FETALAI: E tusa ai ma le Tulafono Tumau 102, e amata le iloiloga auiliili i le Fuaiupu 2.

FUAIUPU 2: Ua teuteuina le fuaiupu 5.

Faamaonia.

FUAIUPU 3: Ua teuteuina le fuaiupu 10.

Faamaonia

FUAIUPU 4: Ua teuteuina le fuaiupu 25B.

Tofa LEALAILEPULE RIMONI AIAFI: Lau Afioga i le Fofoga Fetalai.....

FOFOGA FETALAI: O le a le fuaiupu le sui usufono mo Faleata Sisifo?

Tofa LEALAILEPULE RIMONI AIAFI: O le fuaiupu 3.

FOFOGA FETALAI: Saunoa mai le sui usufono.

Tofa LEALAILEPULE RIMONI AIAFI: O le vaega B, o lea sa ou taua analeila lau Afioga i le Tamaitai Minisita, o le suiga lea e aumai e faapea, ia tutusa le faasalaga o i latou foi lea e fia tauva ma i latou o lo o i totonu o le Palemene. E fia faamalamalama lau Afioga, aua i lou talitonuga, o le tagata le sui usufono, a faasala loa i le faasalaga faafalepui, e le tatau ona toe sui usufono, e na o se faamanino o le vaega lea, ma le faaaloalo lava.

Tofa AVEAU TUALA LEPALE NIKO PALAMO: Lau Afioga i le Fofoga Fetalai.....

FOFOGA FETALAI: O fea le fuaiupu le sui usufono mo Faleata Sasae?

Tofa AVEAU TUALA LEPALE NIKO PALAMO: I le fuaiupu 2 faamolemole.

FOFOGA FETALAI: Tulai mai le sui usufono mamalu.

Tofa AVEAU TUALA LEPALE NIKO PALAMO: I le fuaiupu 2, lau Afioga i le Fofoga Fetalai ona o lea sa ou fesili ai ae sa tali le Afioga i le Tamaitai Minisita e manaia ae fai i le taimi o le auiliili. O lea la ou te fesili atu ai i le tolu tausaga lea, po o le tautua lea i le tolu tausaga o le tautua faamatai e tatau ona tolu tausaga, pe sili atu ona matai le tagata ona agavaa lea e fai palota, e faapefea le tagata e i lalo ifo o le tolu tausaga na matai ai? O le vaega lona lua o le fesili, e faapefea le tagata foi lea na matai a o lea faatoa lesitala nei le matai ae na matai i le sefulu tausaga ua tea? Ma le faaloalo lava.

FOFOGA FETALAI: Lau Afioga i le Tamaitai Minisita.

Afioga Hon FIAME NAOMI MATAAFA: Faafetai lava mo le faafesili, o le a amata ona ou tali atu muamua i le sui usufono mo Faleata Sisifo, aua o lea lava e manatua e le toatele o tatou o agavaa autu o le matai, ae ona ua tuuina mai ia le toe Teuteuga lea o le tolu tausaga e fai ai le tautua, o lona uiga, ua toe faaopopo atu i luga o le agavaa autu lea o le matai o le tagata e avea ai ma sui tauva, o le isi vaega lea ua tatau ona tolu tausaga e fai ai lana tautua. O lea ou te tali atu e tusa ai ma le aiaiga o le Tulafono.

O le vaega foi lea ua leva ona matai a o lea faatoa resitala, ia tailo i ai lau Afioga i le Fofoga Fetalai. O le resitalaina o le suafa matai o le tulaga lea faaletulafono e faamauina ai ua suafa matai le tagata. I lou la mafaufau, o le tali sao ma le tali puupuu i le faafesili a le Afioga i le sui usufono o le taimi e resitala ai faaletulafono o le taimi lena e tatau ona faitau mai ai.

O le toe laga mai o le finagalo faaalua o le sui usufono mo Faleata i Sisifo e uiga i faasalaga ua tuuina atu i soligatulafono, aemaise o i latou o lo o umia le suafa sui usufono ia e pei lava ona ou faamalamalama i le taimi ua fano o le fua lava lea o lenei taimi. A tatou manatu foi ua tatau ona sui le fua ia e faapena lava ona fai. Ia o le tali lea ma le faaloalo lau Afioga i le Fofoga Fetalai.

FOFOGA FETALAI: Malo.

FUAIUPU 5: Ua teuteuina le faamatalaga lua.

Faamaonia.

FUAIUPU 6: Teuteuga i pepa faatumu.

FOFOGA FETALAI: O le a le Fuaiupu le sui usufono mo Faleata Sisifo?

Tofa LEALAILEPULE RIMONI AIAFI: O le Fuaiupu 5 lau Afioga.

FOFOGA FETALAI: Ua teuteuina le faamatalaga lua. O pepa faatumu?

Tofa LEALAILEPULE RIMONI AIAFI: Ia.

FOFOGA FETALAI: Se i tulai mai le sui usufono.

Tofa LEALAILEPULE RIMONI AIAFI: O le mea lea sa tatalo atu ai lau Afioga i tulaga ia, o le mea lea sa ou talanoa ai foi i le Ofisa i le taimi foi lea e faaoga ai le faautautaga tataua a le Afioga i le alii Pule. So o se Tulafono lava e i ai mea o exemptions e iai foi discretionary power e tuu i le tagata e faatinoina le galuega, e mafai foi ona fetuutuunai e ia i le mea talafeagai i lona talitonuga e tataua ona fai.

E pei la o le mea lea na ou talanoa atu ai atonu o tau manatua e le Minisita mo Tina ma Tamaitai, Atinae o Nuu ma Afioga ma Agafesootai i le taimi o Fofoga Fetalai i le Paeaiga na mavae atu nei. Manatua na i ai le taimi a transfer le tagata Samoa, tradition, e totoi le \$10.00 e transfer ai ae a transfer le voter e le totoiina le \$10.00. Ia sa ou oo mai lava matou talanoa ma avatu ai le tusi i le Kapeneta ma ave i ai le fautuaga i tai e taofi le mea lea ae transfer fua tagata pe afai ua faapena. O le malosiaga lea sa i ai i totonu ia i latou e pulea e taofi ai le mea le fetai lea.

O lea foi la e talosaga atu ai i le tulaga lea tai pei o le mea lea i nai faifeau lea e faifeau i totonu o Vaimauga ma Faleata, e le tataua ona aafia ai fua i le Tulafono Tau Faaofi lenei, e tataua ona filifili latou aemaise o le Tulafono lea ua faapea mai e na o matua ma latou fanau lea na tutupu mai ia latou. Ae a faafefea pe afai o la e i luga o le lola fanau ae ua fia omai i totonu matua? O le mea lena e fia faamanino.

O le mea lea ou te talanoa atu ai i suiga ia pe le mafai ona tuu i ai le mea lea e fautua atu ai sui nei o Faleata ma Vaimauga, le aiatatau i le vaega lea e resitala ai. Ma le faaaloalo lava.

FOFOGA FETALAI: Ia e i ai se i si tali e ese ai mai lau tali muamua lau Afioga i le Tamaitai Minisita?

Afioga Hon FIAME NAOMI MATAAFA: Lau Afioga i le Fofoga Fetalai, e leai.

FOFOGA FETALAI: Ia.

Tofa LEALAILEPULE RIMONI AIAFI: Lau Afioga i le Fofoga Fetalai o le a la le mea tatou te Fono ai? Ia faafetai lava ae le fai loa ma pasi ma le tuai.

FOFOGA FETALAI: E faamalulu atu i le sui usufono mamalu, o lea lava e tuu atu le avanoa o le amanaia o lou finagalo, a o lou lava lena finagalo. O lea foi ua tali manino le Malo, o le finagalo lea e limataitaiina ai le tatou Fono.

O le a le Fuaiupu Palu?

Afioga Hon PALUSALUE FAAPO II: O le Fuaiupu 6 faamolemole lau Afioga. O le tautinoga lea ou te fesili atu ai i le schedule lea e i ai le faaupuga lea, “na ou tautua i le matou nuu.” O le fesili la, o le a le uiga o le matou nuu, o le nuu lea ta te matai ai po o le nuu lea ta te nofo ai? E fuafua lea i sui faatutu Tu Taulaga po o le nuu o lo o matai ai po o le nuu o lo o nofo ai e tataua ona i ai le tautua lea.

O le fesili lena lau Afioga.

FOFOGA FETALAI: Lau Afioga i le Tamaitai Minisita.

Afioga Hon FIAME NAOMI MATAAFA: Lau Afioga i le Fofoga Fetalai ma le mamalu o le Palemene e tali atu ma le faaaloalo i le faafesili a le Taitai o le Itu Agai, ia o mea uma lava na, o le nuu e nofo ai ma le nuu e matai ai. Ma le faaaloalo lava.

Faamaonia le Fuaiupu 6.

FUAIUPU 1 MA LE IGOA.

FUAIUPU 1: Igoa puupuu ma le amataga.

IGOA: Teuteuga o le Tulafono o Faiga Palota (Nu.3) 2015.

Faamaonia.

Na faagasolo le Tulafono Tau Faaofi o Teuteuga o le Tulafono o Faiga Palota (Nu.3) 2015 e aunoa ma se Teuteuga.

TULAFONO TAU FAAOFI O TEUTEUGA O LE TULAFONO O FAIGA PALOTA (Nu.3) 2015 - faitauga faatolu

FOFOGA FETALAI: Talu ai ua ou taulimaina le Tusi Faamaonia o le Tulaga Faanatinati ua maea ona sainia e Lana Afioga Mamalu i le Sui o le Fono a Sui Tofia e uiga i le Tulafono Tau Faaofi leni, o lea o le a sagai atu loa le Fono Aoa mo le faitauga faatolu.

Afioga Hon FIAME NAOMI: Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Faiga Palota (Nu.3) 2015 i lona faitauga faatolu.*

Faaluaina e le Sui Palemia, Minisita mo Pisinisi, Alamanuia ma Leipa, Minisita mo Galuega Tau Alamanuia ma Atinae a le Malo, ma le Minisita mo Tina ma Tamaitai, Atinae o Nu, Afioga ma Agafesootai.

Na faamaonia le lafo ma faitauina le Tulafono Tau Faaofi i lona faitauga faatolu ma faapea ona pasia le Fono Aoa Faitulafono.

TULAFONO TAU FAAOFI O TEUTEUGA O LE TULAFONO O LE PENISINI 2014 - iloiloga auiliili

FOFOGA FETALAI: E tusa ai ma le Tulafono Tumau 106, e tatau ona faamaonia muamua e le Fono Aoa le Lipoti o le Komiti o Tulafono Tau Faaofi ona avanoa ai lea o le iloiloga auiliili o le Tulafono Tau Faaofi.

Tulai mai lau Afioga i le Taitaifono o le Komiti o Galuega, Felauaiga ma le Siosiomaga.

Tofa TUSA MISI TUPUOLA: Lau Afioga i le Fofoga Fetalai ou te faatu le lafo, *Ina ia faamaonia e lenei Fono Aoao le Lipoti a le Komiti o lo o fautuaina ai, Ina ia faagasolo le Tulafono Tau Faaofi o Teuteuga o le Tulafono o le Penisini 2014 faatasi ma Faasaoga.*

Faaluaaina e le sui usufono mo Aiga i le Tai, sui usufono mo Palauli ma se tasi o sui usufono mo le Palota Taitoatasi, Afioga Maualaivao Pat Ah Him.

Na faamaonia le lafo.

FOFOGA FETALAI: E faasilasila atu ua faamaonia nei e le Fono Aoao le Lipoti a le Komiti o Galuega, Felauaiga ma le Siosiomaga i le Tulafono Tau Faaofi o Teuteuga o le Tulafono o le Penisini 2014.

O le a sagai atu loa le Fono Aoao mo le iloiloga auiliili o le Tulafono Tau Faaofi o Teuteuga o le Tulafono o le Penisini 2014.

E tusa ai ma le Tulafono Tumau 102, e amata le iloiloga auiliili o le Tulafono Tau Faaofi i le Fuaiupu 2.

FUAIUPU 2: Ua teuteuina le fuaiupu 3.

Faamaonia.

FUAIUPU 3: Ua faaofiina i le fuaiupu 10A fou.

Faamaonia

FUAIUPU 4: Soloaiga

Faamaonia

FUAIUPU 1 MA LE IGOA:

FUAIUPU 1: Igoa puupuu ma le amataga.

IGOA: Teuteuga o le Tulafono o le Penisini 2014.

FOFOGA FETALAI: O lo o i ai le Faasaoga i le Fuaiupu 1 ma le Igoa e pei ona faaalua i le Pepa Faaopoopo o Galuega.

Tulai mai lau Afioga i le Taitaifono.

Tofa TUSA MISI TUPUOLA: Lau Afioga i le Fofoga Fetalai ou te faatu le Faasaoga i le Fuaiupu 1 ma le Igoa e faapea:

“FAASAOGA:

Ia aveese le fuainumera “2014” ma ia suia i le fuainumera “2015” ona faitauina ai lea o le Igoa o le Tulafono e faapea:

TEUTEUGA O LE TULAFONO O LE PENISINI 2015.”

Faamaonia le Faasaoga.

Faamaonia le Fuaiupu 1 ma le Igoa e pei ona Faasaoina.

Na faagasolo le Tulafono Tau Faaofi o Teuteuga o le Tulafono o le Penisini 2015 faatasi ma Faasaoga.

TULAFONO TAU FAAOFI O TEUTEUGA O LE TULAFONO O LE PULEGA O LE TAULAGA 2014 - iloiloga auiliili

FOFOGA FETALAI: E tusa ai ma le Tulafono Tumau 106, e tataua ona faamaonia muamua e le Fono Aoa o le Lipoti a le Komiti i le Tulafono Tau Faaofi ona avanoa ai lea o le iloiloga auiliili.

Tulai mai lau Afioga i le Taitaifono o le Komiti o Galuega, Felauaiga ma le Siosiomaga.

Tofa TUSA MISI TUPUOLA: Lau Afioga i le Fofoga Fetalai ou te faatu le lafo, *Ina ia faamaonia e leni Fono Aoa o le Lipoti a le Komiti o lo o fautuaina ai, Ina ia faagasolo le Tulafono Tau Faaofi o Teuteuga o le Tulafono o le Pulega o Taulaga 2014 faatasi ma Faasaoga.*

Faaluaina e se tasi o sui usufono mo le Palota Taitoatasi, sui usufono mo Aiga i le Tai ma le sui usufono mo Palauli.

Na faamaonia le lafo.

FOFOGA FETALAI: E faasilasila atu ua faamaonia nei e le Fono Aoa o le Lipoti a le Komiti o Galuega, Felauaiga ma le Siosiomaga i le Tulafono Tau Faaofi o Teuteuga o le Tulafono o le Pulega o Taulaga 2014.

O le a sagai atu loa le tatou Fono Aoa i le iloiloga auiliili o le Tulafono Tau Faaofi o Teuteuga o le Tulafono o le Pulega o Taulaga 2014.

E tusa ai ma le Tulafono Tumau 102, e amata le iloiloga auiliili o le Tulafono Tau Faaofi i le Fuaiupu 2.

FUAIUPU 2: Ua teuteuina le fuaiupu 17.

Faamaonia

FUAIUPU 3: Ua faaofiina le fuaiupu 17A.

Faamaonia

FUAIUPU4: Ua teuteuina le fuaiupu 64.

Faamaonia

FUAIUPU 5 Ua teuteuina le Faamatalaga 1.

Faamaonia

FUAIUPU 1 MA LE IGOA:

FUAIUPU: Igoa puupuu ma le amataga.

IGOA: Teuteuga o le Tulafono o le Pulega o Taulaga 2014.

FOFOGA FETALAI: O lo o i ai le Faasaoga i le Fuaiupu 1 ma le Igoa e pei ona faaalua i le Pepa Faaopoopo o Galuega.

Tulai mai lau Afioga i le Taitaifono.

Tofa TUSA MISI TUPUOLA: Lau Afioga i le Fofoga Fetalai ou te faatu le Faasaoga i le Fuaiupu 1 ma le Igoa e faapea:

“FAASAOGA:

Ia aveese le fuainumera “2014” ma suia i le fuainumera “2015” ma faitauina ai le Igoa o le Tulafono e faapea:

**TEUTEUGA O LE TULAFONO O LE PULEGA O
TAULAGA 2015.”**

Faamaonia le Faasaoga.

Faamaonia le Fuaiupu 1 ma le Igoa e pei ona Faasaoina.

Na faagasolo le Tulafono Tau Faaofi o Teuteuga o le Tulafono o le Pulega o Taulaga 2015 faatasi ma Faasaoga.

TULAFONO TAU FAAOFI O VAI PULEA TUMAOTI 2015
- iloiloga auiliili

FOFOGA FETALAI: E tusa ai ma le Tulafono Tumau 106, e tatau ona faamaonia muamua e le Fono Aoao le Lipoti a le Komiti i le Tulafono Tau Faaofi ona avanoa ai lea o le iloiloga auiliili o le Tulafono Tau Faaofi.

Tulai mai le Afioga i le Taitaifono o le Komiti o le Soifua Maloloina, Galuega tau le Va Fealoai, Mataupu tau Lotoifale ma Atinae o Afioga ma Agafesootai.

Afioga Hon GATOLOAIFAANA AMATAGA ALESANA GIDLOW: Lau Afioga i le Fofoga Fetalai ou te faatu le lafo, *Ina ia faamaonia e lenei Fono Aoao le Lipoti a le Komiti o lo o fautuaina ai, Ina ia faagasolo le Tulafono Tau Faaofi o Vai Pulea Tumaoti 2015 faatasi ma ona Teuteuga.*

Faaluaina e se tasi o sui usufono mo Palota Taitoatasi, Susuga Hon Papaliitele Niko Lee Hang ma le sui usufono mo Aleipata Itupa i Lalo.

Na faamaonia le lafo.

FOFOGA FETALAI: E faasilasila atu ua faamaonia nei e le Fono Aoao le Lipoti a le Komiti o le Soifua Maloloina, Galuega tau le Va Fealoai, Mataupu tau Lotoifale ma Atinae o Afioga ma Agafesootai i le Tulafono Tau Faaofi o Vai Pulea Tumaoti 2015.

O le a sagai atu le Fono Aoao i le Iloiloga Auiliili o le Tulafono Tau Faaofi o Vai Pulea Tumaoti 2015.

E tusa ai ma le Tulafono Tumau 102, e amata le Iloiloga Auiliili o le Tulafono Tau Faaofi i le Fuaiupu 2.

FUAIUPU 2: Faamatalaina o uiga o upu.

Faamaonia.

FUAIUPU 3: O le Tulafono e noatia ai le Malo.

Faamaonia.

FUAIUPU 4: O le avea ai o Vai Pulea Tumaoti ma auaunaga e tuuina atu le suavai.

Faamaonia.

FUAIUPU 5: O le pule a nuu ma afioaga e umia ai.

FOFOGA FETALAI: O lo o i ai le Teuteuga a le Komiti i le Fuaiupu 5 e pei ona faaalua i le Pepa Faaopoopo o Galuega.

Tulai mai lau Afioga i le Taitaifono o le Komiti.

Afioga Hon GATOLOAIFAANA AMATAGA ALESANA GIDLOW:
Lau Afioga i le Fofoga Fetalai ou te faatu le Teuteuga i le Fuaiupu 5 e faapea:

“TEUTEUGA:

Ia faaofi le faafuaiupu (3) fou i le fuaiupu 5 e faapea:

“(3) O le Tulafono o le Faafoga o le Faasoasoina Tatau o Punaoa Tau Suavai 2008, e tumau pea le malosi e faaogaina ai, pe afai e tulai mai o so o se tulaga ua le ogatasi i le va o lena Tulafono ma le Tulafono o le Faafoga o le Faasoasoina Tatau o Punaoa Tau Suavai 2008.”

Faamaonia le Teuteuga.

Faamaonia le Fuaiupu 5 e pei ona Teuteuina.

FUAIUPU 6: Puleaga Faale-Nuu a le Fono a Nu'u i Vai Pulea Tumaoti.

Faamaonia.

FUAIUPU 7: Faavaeina.

Faamaonia.

FUAIUPU 8: Vaitaimi i le tofi.

Faamaonia.

FUAIUPU 9: Galuega tauave ma malosiaga.

Faamaonia.

FUAIUPU 10: Fonotaga.

Faamaonia.

FUAIUPU 11: Tupe ma teugatupe.

Faamaonia.

FUAIUPU 12: Tuuina atu o le suavai.

Faamaonia.

FUAIUPU 13: Faapipiina, tausiga ma asiasiga.

Faamaonia.

**FUAIUPU 14: Totogifuapauina mo le tuuina atu o le suavai ma
auaunaga e fesootai i ai.**

Faamaonia.

FUAIUPU 15: Fuafuaina o totogifuapauina.

Faamaonia.

FUAIUPU 16: O le faaauauina o le Faalapotopotoga.

Faamaonia.

FUAIUPU 17: Tulaga faasui auai.

Faamaonia.

FUAIUPU 18: Galuega tauave ma malosiaga.

Faamaonia.

FUAIUPU 19: Faavaeina.

FOFOGA FETALAI: O lo o i ai le Teuteuga a le Komiti i le fuaiupu 19 e pei ona faaalua i le Pepa Faaopoopo o Galuega.

Tulai mai lau Afioga i le Taitaifono o le Komiti.

Afioga Hon GATOLOAIFAANA AMATAGA ALESANA GIDLOW:
Lau Afioga i le Fofoga Fetalai ou te faatu le Teuteuga i le fuaiupu 19(2) e faapea:

“TEUTEUGA:

Ia aveese le faafuaiupu “(2)” o lo o i ai nei ma suia i le faafuaiupu “(2)” fou e faapea:

“(2) E tatau ona filifilia sui auai i lalo o le faafuaiupu (1) e faapea:

- (a) toaono (6) sui auai mai Upolu; ma**
- (b) toalima (5) sui auai mai Savaii;**
a itiiti mai e toatasi (1) le sui auai e filifilia mai le faafuaiupu (2)(a) ma le (b), e tatau ona avea o se tamaitai.”.

Faamaonia le Teuteuga.

Faamaonia le Fuaiupu 19 e pei ona Teuteuina.

FUAIUPU 20: Vaitaimi i le tofi.

Faamaonia.

FUAIUPU 21: Faamavae mai le tofi, aveesea ma suitulaga.

Faamaonia.

FUAIUPU 22: Galuega tauave ma malosiaga.

Faamaonia.

FUAIUPU 23: Fonotaga Aoao Faaletausaga.

FOFOGA FETALAI: O lo o i ai le Teuteuga a le Komiti i le fuaiupu 23 e pei ona faaalua i le Pepa Faaopoopo o Galuega.

Tulai mai lau Afioga i le Taitaifono o le Komiti.

Afioga Hon GATOLOAIFAANA AMATAGA ALESANA GIDLOW:
Lau Afioga i le Fofoga Fetalai ou te faatu le Teuteuga i le fuaiupu 23 e faapea:

“TEUTEUGA:

Ia faaofi le faafuaiupu “(3)” fou i le fuaiupu “23” e faapea:

“(3) E ao i le Komiti o Pulega, i le tuanai ai ona tauaaoina atu o lipoti i se Fonotaga Aoao Faaletausaga, ona feutagai ma, ma ia tuuina atu i le Minisita o Lipoti na tauaaoina atu i lalo o le faafuaiupu (2) mo le faaofiina i le Palemene.”.

Faamaonia le Teuteuga.

Faamaonia le Fuaiupu 23 e pei ona Teuteuina.

FUAIUPU 24: Fonotaga Aoao Faapitoa.

Faamaonia.

FUAIUPU 25: Fonotaga a le Komiti o Pulega.

Faamaonia.

FUAIUPU 26: Aiaiga lautele mo fonotaga.

Faamaonia.

FUAIUPU 27: Oototoga o mataupu o fonotaga.

Faamaonia.

FUAIUPU 28: Tupe ma teugatupe.

Faamaonia.

FUAIUPU 29: Faamaumauga faatausi tusi ma le sueina o tusi.

Faamaonia.

FUAIUPU 30: Totogifuapauina a le Faalapotopotoga.

Faamaonia.

FUAIUPU 31: Fesoasoani tau tupe i Vai Pulea Tumaoti.

Tofa LEALAILEPULE RIMONI AIAFI: Lau Afioga i le Fofoga Fetalai.....

FOFOGA FETALAI: O le a le fuaiupu le sui usufono mo Faleata Sisifo?

Tofa LEALAILEPULE RIMONI AIAFI: O le fuaiupu 31 lau Afioga.

FOFOGA FETALAI: Tulai mai le sui usufono mamalu.

Tofa LEALAILEPULE RIMONI AIAFI: Faafetai i le Tulafono Tau Faaofi lenei i le taumafaiga o le tatou vai, e pau le mea i le vaega lea i le fuaiupu 31, i le malosiaga lea ua tuuina atu i le Minisita e tuuina atu ai ni fesoasoani. O le faaupuga e faapea: “E mafai e le Minisita, i le i ai po o le leai foi o ni tuutuuga, ona faatatauina tupe i so o se Vai Tumaoti e ala atu e ala atu i le Faalapotopotoga i tupe faameaalo, aitalafu, nogatupe, po o tpe faasaofaga a le Malo.” O le vaega la lea e fia fesili ai ona o lea pei e tuu talaloa le fuaiupu i le vaega lea, pe i ai pe leai ni tuutuuga, ia i luga lava o le faitalia a le Minisita. O le puipuga o le Minisita lea ou te talanoa atu ai, ne i te i ua i ai se afaina, ona o lea e le o i ai ni aiaiga foi lea e patino. O lona uiga, o lea ua tuu i le tofa fetalai a le Afioga i le Minisita e fua i lona alofa, ia ae te i ua fesiligia ai. Pe na tagai i ai le vaega o le Komiti i le vaega lea faamolemole?

FOFOGA FETALAI: Ia lau Afioga i le Taitaifono.

Afioga Hon GATOLOAIFAANA AMATAGA ALESANA GIDLOW: Lau Afioga i le Fofoga Fetalai, ia o lena ua toe tali lava le sui usufono mamalu ia i lana ia fesili, o lena ua i ai foi lava ia puipuiga mo le Afioga i le Minisita i totonu o le tatou Tulafono, o puipuiga masani lava o Tulafono i totonu o Matagaluega taitasi, ia faafetai lava.

FOFOGA FETALAI: Malo. Ia o le a avatu pea le avanoa e faamalamalama atili, tulai mai lau Afioga i le Minisita mo Tina ma Tamaitai, Atinae o Nuu, Afioga ma Agafesootai ma Vai Tumaoti.

Tofa Hon TOLOFUAIVALELEI FALEMoe LEIATAUA: Ou te faafetai i le sui usufono i le aumai o le fesili ina ua le malamalama, o le aoga lena o le tatou galuega. E manatua foi, e le soona faia e le Minisita se faaiuga, e faamoemoe i le Faauluuluga o le Matagaluega ia ma lē foi e Faauluulu i le Matagaluega i le pulea o Vai Tumaoti le vaega lea i lalo o pulega a alii ma faipule, po o pulega a nuu. Ia e le gata i lena, ia a o le vaavaai foi a le Minisita i le tulaga o le fautuaga i mea tau tupe o lo o mafai ona tuuina atu e le Malo mo fesoasoani mo le faatinoina o atinae nei. Ma lou faaaloalo, e le faia lava i se faaiuga toatasi a le Minisita, o le faamoemoe, o lo o i ai e o lo o lava le silafia i totonu o Matagaluega ia e aumai ai le fautuaga i le Minisita, ona vaavaai lea i ai i le tatau ma le le tatau, ia ona ave loa lea o le fautuaga i le Kapeneta, ia mo se vaegatupe e moomia mo sea faamoemoe, ma le faaaloalo.

FOFOGA FETALAI: Malo.

Tofa LEALAILEPULE RIMONI AIAFI: Lau Afioga i le Fofoga Fetalai, faafetai lava i le Afioga i le Minisita mo le taumafai mai. E moni a au, ona o lea o lo o e afio i le nofoa i le taimi nei, a o le agai i luma o lea e talanoa atu ai, aua a tatou tagai lelei lava i ai i le faaupuga o le fuaiupu, i lou talitonuga e le talafeagai. A tatou liliu i le faaperetania, ‘the Minister may, with or without conditions,’ e le o se faaupuga talafeagai i lou talitonuga, aua e ono tatala ai i nisi o vaega, e tatau ona manino ia vaega e tuuina atu ai alagatupe a le Malo e faatauina i so o se mafuaaga alagata. O lea ua tatala i le fuaiupu lea le tuuina atu o tupe e tusa pe i ai se mafuaaga tatau pe leai. O lau lea faitau i ai i le vaega lea o le Tulafono, ma le faaaloalo lava, ae le...ona o lea ua tali mai le Afioga i le Minisita e moni e le o i ai i le taimi nei, ae mo le agai i luma ma le puipuiga o tatou i tulaga o mea faapea. Ma lou faaaloalo lava.

FOFOGA FETALAI: Ia e manatu ua manino le tali a le Taitaifono, ua manino foi le saunoaga a le Afioga i le Minisita.

Se i tulai mai lau Afioga i le Minisita mo Galuega Tau Alamanuia ma Atinae a le Malo.

Afioga Hon LAUTAFI FIO SELAFI PURCELL (Minisita mo Galuega tau Alamanuia ma Atinae a le Malo): Lau Afioga i le Fofoga Fetalai, faafetai faamalolosi, i lenei afiafi.

O lou tulai atu, ona ua alu le aso lenei o saunoa le sui usufono mo Faleata Sisifo i le mea lea e tau o le discretionary powers o le Komesina o Faiga Palota, o le mea tonu lena lea e sau i i, e faaoga ai le tofā fetuutuunai a le

Minisita, a o lea ua toe tulai mai foi, ua fesiligia mai e le tatau ona i ai. Ua matua le malamalama la le sui usufono lea i le uiga o le upu lea discretionary powers, lena o lo o faamalamalama atu i i, a manao le Minisita e fai conditions, fai, a le manao e fai, leai. O le paoa lena o lea ua tuu mai i le Minisita i lalo o le Tulafono lea, discretionary powers of the Minister. Ma lou faaloalo.

FOFOGA FETALAI: Malo. Malie o lea ua uma ou avanoa o lea ua faatolu ona e tulai mai.

Tofa LEALAILEPULE RIMONI AIAFI: Ia o lea ua tuu ae le Afioga i le Minisita, o lea la o lou avanoa muamua i le Afioga i le Minisita.....

FOFOGA FETALAI: E leai se mea faapea o le lua o ni avanoa, o lea ua tatou alo i le iloiloga auiliili, faapuupu mai le sui usufono mo Faleata Sisifo.

Tofa LEALAILEPULE RIMONI AIAFI: Leai ou te ava tele i lau Afioga, o le mea lea e taumafai atu ai lau Afioga, e moni lelei le...o lea ua sau tonu ai lava le Afioga i le Minisita. O le mea lena sa tatau ona tuu mai e le vaega lea i le Tulafono, i le faautautaga tatau, a, i lona malosiaga e mafai ai ona fetuutuunai. A o le faaupuga lea e tuu atu ou te le fiafia ai, i le i ai po o le leai o ni tuutuuga, a, o lona uiga o lea ua tatala so o se ituaiga mea e fai, a o le mea lea i lalo o lana faautautaga tatau ona tuuina atu meaalofa ma fesoasoani i mea e talafeagai, ia o le manaia ia. Ma le faaloalo lava, faafetai.

FOFOGA FETALAI: Ou te manatu, e leai, leai se Minisita na te faia se mea faaletonu i se Tulafono ua avatu, o lea ua tali manino le Afioga i le Minisita e pulea a tatou vai tumaoti, ia o lo o i ai lana aufaigaluega o tulatoa o Matagaluega, fesili i le Faauluuluga, fesili i le Sui Pule, ma aumai lipoti a nuu ma afioaga o lo o limataitaiina ai, ae tatou we have to trust the Minister. Se i i ai foi se taimi e tulai mai se Minisita e faaletonu ia ona toe fai foi lea o nisi aulape i le Tulafono.

Faamaonia le Fuaiupu 32.

FUAIUPU 33: Feeseeseaiga.

FOFOGA FETALAI: O lo o i ai le Teuteuga a le Komiti i le fuaiupu 33 e pei ona faaalua i le Pepa Faaopoopo o Galuega.
Tulai mai lau Afioga i le Taitaifono o le Komiti.

Afioga Hon GATOLOAIFAANA AMATAGA ALESANA GIDLOW:
Lau Afioga i le Fofoga Fetalai ou te faatu le Teuteuga i le fuaiupu 33 e faapea:

“TEUTEUGA:

Ia faaofi le fuaiupu “33A fou” e faapea:

“33A. Fono Lē Tumau a le Pulega-Afai ua faamalieina le Minisita e faapea, e le o faatinoina lelei e le Faalapotopotoga o ana galuega tauave i lalo o le Tulafono, e mafai e le Minisita ona:

- (a) faataape le Komiti o le Pulega; ma**
- (b) tofia o se Komiti lē tumau o le Pulega, i le noatia ma fai fuafua i tuutuuga ma aiaiga, e faatinoina o galuega tauave a le Komiti o le Pulega mo se vaitaimi ua fuafuaina e le Minisita, po o ina ua maea ona filifilia o se Komiti fou o le Pulega i se Fonotaga Aoa Faaletausaga po o se Fonotaga Aoa Faapitoa.”.**

Faamaonia le Teuteuga.

Faamaonia le Fuaiupu 33 e pei ona Teuteuina.

FUAIUPU 34: Puipuiga mai noataga tau le tagata lava ia.

Faamaonia.

FUAIUPU 35: Soligatulafono lautele.

Faamaonia.

FUAIUPU 36: Tulafono Faatonutonu.

FOFOGA FETALAI: O lo o i ai le Teuteuga a le Komiti i le fuaiupu 36 e pei ona faaalua i le Pepa Faaopoopo o Galuega.
Tulai mai lau Afioga i le Taitaifono o le Komiti.

Afioga Hon GATOLOAIFAANA AMATAGA ALESANA GIDLOW:
Lau Afioga i le Fofoga Fetalai ou te faatu le Teuteuga i le fuaiupu 36(d) e faapea:

“TEUTEUGA:

Ia soloia le faafuuiupu “(d)” o lo o i ai ma suia i le faafuuiupu “(d) fou” e faapea:

“(d) Ua faatonuina ai laasaga tau faatinoga e ao ona faia ina ia faamautinoa ai ua ogatasi lenei Tulafono ma

Tulafono o le Faafoega o le Faasoasoina Tatau o Punaoa Tau Suavai 2008, Faiga Faavae o Vai o le Atunuu, Faiga Faavae o Auaunaga Tau Vai, Faiga Faavae o Punaoa Tau Suavai.”

Faamaonia le Teuteuga.

Faamaonia le Fuaiupu 36 e pei ona Teuteuina.

FUAIUPU 37: Aiaiga tau soloaiga ma aiaiga faasaoina.

Faamaonia.

FUAIUPU 1 MA LE IGOA:

FUAIUPU 1: Igoa puupuu ma le amataga.

IGOA: Tulafono o Vai Pulea Tumaoti 2015.

Faamaonia.

Na faagasolo le Tulafono Tau Faaofi o Vai Pulea Tumaoti 2015 faatasi ma Teuteuga.

**TULAFONO TAU FAAOFI O LE FALETUPE TUTOTONU O
SAMOA 2015 – iloiloga auiliili**

FOFOGA FETALAI: E tusa ai ma le Tulafono Tumaoti 106, e tatau ona faamaonia muamua e le Fono Aoa le Lipoti a le Komiti i le Tulafono Tau Faaofi ona avanoa ai lea o le iloiloga auiliili o le Tulafono Tau Faaofi.

Susuga Hon PAPALHITELE NIKO LEE HANG: Lau Afioga i le Fofoga Fetalai ou te faatu le lafo, *Ina ia faamaonia e leni Fono Aoa le Lipoti a le Komiti o lo o fautuaina ai, Ina ia faagasolo le Tulafono Tau Faaofi o le Faletupe Tutotonu o Samoa 2015 faatasi ma Teuteuga.*

Faaluaina e se tasi o sui usufono mo Faasaleleaga Nu.1, Afioga Hon Gatoloaifaana Amataga Alesana Gidlow ma le sui usufono mo Aleipata Itupa i Lalo.

Na faamaonia le lafo.

FOFOGA FETALAI: Ou te faasilasila atu ua faamaonia nei e le Fono Aoaio le Lipoti a le Komiti o Tupe Maua ma Tupe Totogi i le Tulafono Tau Faaofi o le Faletupe Tutotonu o Samoa 2015.

O le a sagai atu loa le Fono Aoaio i le Iloiloga Auiliili o le Tulafono Tau Faaofi o le Faletupe Tutotonu o Samoa 2015.

E tusa ai ma le Tulafono Tumau 102, e amata le Iloiloga Auiliili o le Tulafono Tau Faaofi i le Fuaiupu 2.

FUAIUPU 2: Faamatalaina o uiga o upu.

Faamaonia.

FUAIUPU 3: Faaauau le faavaeina o le Faletupe.

Faamaonia.

FUAIUPU 4: Tu saoloto.

Faamaonia.

FUAIUPU 5: Sini o le Faletupe.

Faamaonia.

FUAIUPU 6: Galuega tauave a le Faletupe.

Faamaonia.

FUAIUPU 7: Ofisa lala, sui sooupu ma sui o faia fesootaiga.

Faamaonia.

FUAIUPU 8: Komiti Faatino o Faatonu.

Faamaonia.

FUAIUPU 9: Faaaliga manino o aia tau tupe ma moliaga ua faamaonia faaletulafono.

Faamaonia.

FUAIUPU 10: Fonotaga a le Komiti Faatino.

Faamaonia.

FUAIUPU 11: Valaaulia tumau.

Faamaonia.

FUAIUPU 12: Komiti o Pulega.

Faamaonia.

FUAIUPU 13: Tiute tauave ma malosiaga o le Komiti Faatino.

Faamaonia.

FUAIUPU 14: Tiute tauave ma malosiaga o le Komiti o Pulega.

Faamaonia.

FUAIUPU 15: Tiute tauave o le Kovana.

Faamaonia.

FUAIUPU 16: Tofiaina o le Kovana ma faatonu e le i ai i totonu o le pulega.

Faamaonia.

FUAIUPU 17: Laulau a Fono mo le tofiaina o le Kovana.

Faamaonia.

FUAIUPU 18: Laulau a Fono mo le tofiaina o faatonu e le i ai i totonu o le pulega.

Faamaonia.

FUAIUPU 19: Vaitaimi i le tofi ma tofogi.

Faamaonia.

FUAIUPU 20: Tauleagavaaina.

Faamaonia.

FUAIUPU 21: Faamavaega.

Faamaonia.

FUAIUPU 22: Aveesea o le Kovana.

Faamaonia.

FUAIUPU 23: Aveesea ma avanoa o Faatonu e le i ai i totonu o le pulega.

Faamaonia.

FUAIUPU 24: Avanoa faapitoa i le tofi.

Faamaonia.

FUAIUPU 25: Tagata ofisa ma le aufaigaluega o le Faletupe.

Faamaonia.

FUAIUPU 26: Suetusi Faalotoifale.

Faamaonia.

FUAIUPU 27: Komiti o le Sueina o Tusi.

Faamaonia.

FUAIUPU 28: Aia feteenai ma meaalofa.

Faamaonia.

FUAIUPU 29: Faamatalaga e agatapuia.

Faamaonia.

FUAIUPU 30: Tulaga faalilolilo.

Faamaonia.

FUAIUPU 31: Puipuiga faaletulafono ma faamalumaluga.

Faamaonia.

FUAIUPU 32: Tupe faavae.

Faamaonia.

FUAIUPU 33: Teugatupe faaagaaga.

Faamaonia.

FUAIUPU 34: Tupe mama maoti.

Faamaonia.

FUAIUPU 35: Tupe mama e mafai ona tufatufa atu.

Faamaonia.

FUAIUPU 36: Faatulagina o tupe mama e mafai ona tufatufa atu.

Faamaonia.

FUAIUPU 37: Tala o tupe.

Tofa LEALAILEPULE RIMONI AIAFI: Lau Afioga i le Fofoga Fetalai, e maitauina e le o i ai ni Tulafono Tau Faaofi a sui usufono nei, ae faauma maia le tatou Tulafono Tau Faaofi. Faafetai lava.

FOFOGA FETALAI: E le o se mea lena a au o le tau vaai o a outou Tulafono Tau Faaofi. That's your job, is to care for your papers. A i ai nisi mea, o lena e i ai sui o le tatou aufaigaluega. Malilie se i... ia faafa ona avane a latou kopi ma tatiai. Fai ifo ni kopi a Afioga i sui usufono.

Faamaonia le Fuaiupu 37.

FUAIUPU 38: Aia tatau tutasi e tuuina atu ai tupe.

Faamaonia.

FUAIUPU 39: Faaleagaina o foliga o tupe pepa.

Faamaonia.

FUAIUPU 40: Iunite o tupe ma tupe faatagaina faaletulafono.

Faamaonia.

FUAIUPU 41: Gaosia ma uiga vaaia o tupe.

Faamaonia.

FUAIUPU 42: Malosiaga e toe tapa ai.

Faamaonia.

FUAIUPU 43: O le toe maua mai o tupe leiloa, gaioia, faatamaia po o ua faaleagaina.

Faamaonia.

FUAIUPU 44: Tupe tau faasese.

Faamaonia.

FUAIUPU 45: Tupe faaagaaga aloaia faava o Malo.

Faamaonia.

FUAIUPU 46: Galuega faatino i aseta faaagaaga.

Faamaonia.

FUAIUPU 47: Itu faatapulaaina.

Faamaonia.

FUAIUPU 48: Pulega ma faiga faavae o fua faatatau o le fesuiaiga o tupe.

Faamaonia.

FUAIUPU 49: Tulafono Faatonutonu tau le pulea o le fesuiaiga o tupe.

FOFOGA FETALAI: O lo o i ai le Teuteuga a le Komiti i le Fuaiupu 49 e pei ona faaalua i le Pepa Faaopoopo o Galuega.

Tulai mai lau Afioga i le Taitaifono o le Komiti.

Susuga Hon PAPALIITELE NIKO LEE HANG: Lau Afioga i le Fofoga Fetalai ou te faatu le Teuteuga i le Fuaiupu 49 e faapea:-

“TEUTEUGA:

Ia aveese le fuaiupu “80” o lo o faasinomia i totonu o le Fuaiupu 49 ma suia i le fuaiupu “79”.

Faamaonia le Teuteuga.

Faamaonia le Fuaiupu 49 e pei ona Teuteuina.

FUAIUPU 50: Teuteuga amata.

Faamaonia.

FUAIUPU 51: Galuega faatino tau tupe.

Faamaonia.

FUAIUPU 52: Fuafuaina o faamalumaluga e faamaonia ai ma fua faatatau.

Faamaonia.

FUAIUPU 53: Tupe faaagaaga aupito sili ona maualalo.

Faamaonia.

FUAIUPU 54: Isi pepa faamaonia tau le faafoega o tupe.

Faamaonia.

FUAIUPU 55: Tului ma tupe aitalafu.

Faamaonia.

FUAIUPU 56: Tuuina atu o faamatalaga.

Faamaonia.

FUAIUPU 57: Faamatuuina atu o se faamatalaga faaiu.

Faamaonia.

FUAIUPU 58: Faiga e Totogi ai Tupe a le Atunuu.

Faamaonia.

FUAIUPU 59: Faletupe e ao ona avea ma sui sooupu vaaia o le Malo.

Faamaonia.

FUAIUPU 60: Galulue faatasi ma le Malo.

Faamaonia.

FUAIUPU 61: Tupe faaaitalafu i le Malo.

Faamaonia.

FUAIUPU 62: Tupe faaaitalafu i faalapotopotoga a le Malo.

Faamaonia.

FUAIUPU 63: Mauaina mai o pepa faaletulafono tau aitalafu na tuuina atu e le Malo ma faalapotopotoga a le Malo.

Faamaonia.

FUAIUPU 64: Tapulaa maualuga o tupe faaaitalafu i le Malo ma faalapotopotoga a le Malo.

Faamaonia.

FUAIUPU 65: Itu faatapulaaina.

Faamaonia.

FUAIUPU 66: Sueina o tusi e se suetusi mai fafo.

Faamaonia.

FUAIUPU 67: Saunia o lipoti ma faamatalaga tau tupe.

Faamaonia.

FUAIUPU 68: Malosiaga e faia ai moliaga faaletulafono.

Faamaonia.

FUAIUPU 69: Aoina ma le faalauiloaina o fuainumera faamauina.

Faamaonia.

FUAIUPU 70: Nofoga e malupuipua ai.

Faamaonia.

FUAIUPU 71: Totogifuapauina.

Faamaonia.

FUAIUPU 72: Lala sooupu tau lotoifale ma le galulue faatasi faava o Malo ma faalapotopotoga.

Faamaonia.

FUAIUPU 73: Tuusaunoaga mai lafoga.

Faamaonia.

FUAIUPU 74: Gaoioiga faasaina.

Faamaonia.

FUAIUPU 75: Tupe e tuuina atu faaaitalafu i tagata ofisa.

FOFOGA FETALAI: O lo o i ai le Teuteuga a le Komiti i le Fuaiupu 75 e pei ona faaalua i le Pepa Faaopoopo o Galuega.

Tulai mai lau Afioga i le Taitaifono o le Komiti.

Susuga Hon PAPALIITELE NIKO LEE HANG: Lau Afioga i le Fofoga Fetalai ou te faatu le Teuteuga i le Fuaiupu 75 e faapea:

“TEUTEUGA:

Ia aveese le fuaiupu “75” o lo o i ai nei ma toe faatulaga le faanumeraina o fuaiupu o le Tulafono Tau Faaofi.”

Faamaonia le Teuteuga.

Faamaonia le Fuaiupu 75 e pei ona Teuteuina.

FUAIUPU 76: Tualumaga faa-faamasinoga.

Faamaonia.

FUAIUPU 77: Aia tatau e sili ona taua.

Faamaonia.

FUAIUPU 78: Puipuigamalu mai se faaiuga e faia muamua e faoa ai faaletulafono.

Faamaonia.

FUAIUPU 79: Igoa faasaina.

Faamaonia.

FUAIUPU 80: Tulafono faatonutonu.

Faamaonia.

FUAIUPU 81: Soloaiga ma teuteuga.

Faamaonia.

FUAIUPU 82: Aiaiga tau soloaiga ma aiaiga faasaina.

Faamaonia.

FUAIUPU 1 MA LE IGOA:

FUAIUPU 1: Igoa puupuu ma le amataga.

IGOA: Tulafono o le Faletupe Tutotonu o Samoa 2015.

Faamaonia.

Na faagasolo le Tulafono Tau Faaofi o le Faletupe Tutotonu o Samoa 2015 faatasi ma Teuteuga.

**TULAFONO TAU FAAOFI O TEUTEUGA O LE TULAFONO O
TAAVALE FEOAI I ALA TETELE 2015 – iloiloga auiliili**

FOFOGA FETALAI: E tusa ai ma le Tulafono Tumau 106, e tatau ona faamaonia muamua e le Fono Aoao le Lipoti a le Komiti i le Tulafono Tau Faaofi ona avanoa ai lea o le iloiloga auiliili o le Tulafono Tau Faaofi.

Tulai mai le Afioga i le Taitaifono o le Komiti o Galuega, Felauaiga ma le Siosiomaga.

Tofa TUSA MISI TUPUOLA: Lau Afioga i le Fofoga Fetalai ou te tulai atu e faatu le lafo, *Ina ia faamaonia e lenei Fono Aoao le Lipoti a le Komiti o lo o fautuaina ai, Ina ia faagasolo le Tulafono Tau Faaofi o Teuteuga o le Tulafono o Taavale Feoi i Alatetele 2015 e aunoa ma se Teuteuga.*

Faaluaina e le sui usufono mo le Vaa o Fonoti, se tasi o sui usufono mo le Palota Taitoatasi ma le sui usufono mo Palauli.

Na faamaonia le lafo.

FOFOGA FETALAI: E faasilasila atu ua faamaonia nei e le Fono Aoao le Lipoti a le Komiti o Galuega, Felauaiga ma le Siosiomaga i le Tulafono Tau Faaofi o Teuteuga o le Tulafono o Taavale Feoi i Alatetele 2015.

E tusa ai ma le Tulafono Tumau e amata le iloiloga auiliili o le Tulafono Tau Faaofi i le Fuaiupu 2.

FUAIUPU 2: Ua teuteuina le fuaiupu 2.

Faamaonia

FUAIUPU 3: Ua teuteuina le fuaiupu 3.

Faamaonia

FUAIUPU 4: Ua teuteuina le fauaiupu 27.

Afioga TAFUA MALUELUE TAFUA: Lau Afioga i le Fofoga Fetalai...

FOFOGA FETALAI: Ia o le a le fuaiupu?

Afioga TAFUA MALUELUE TAFUA: O lena ua oo tonu lava i ai lau saunoaga. O le lea lau Afioga na ou laga foi i le taimi na faatoa faaofi mai ai le Tulafono lea. E ui lava la ina ou lagona o lea ua pasia i le Lipoti a le Komiti, ae pei o le faamalamalamaga lau Afioga, a faapea e taofia se taavale ona ave loa lea i le lotoa taofia ai mo le tolu masina ona faatautui lea pe a maea ona aumai lea o le tupe e faatumu ai le vaega lea.

Pau lava lau talosaga sa ou talosaga ai i le Fono ua tuanai atu o le tau tuuavanoa lea mo tatou tagata ma le faaaloalo. O le faataitaiga lau Afioga, a faapea e taofia e le alii ofisa le taavale ona poloaiina loa lea o le a ave pe afai ua le tusa ai ma le Tulafono, ona ave loa lea o le taavale lea i le nofoaga i Vaitele e taofia ai. A faapea la e le oo atu le tagata e ona le taavale i totonu o le tolu masina ona ave loa lea o le taavale lea e faatautui ona ave lea o le tupe lea e faatumu ai le vaega lea. Ma le faaaloalo lau Afioga, a silasila totoa i ai o tatou nei sui usufono ma o tatou aiga iinei i Apia e mafatia i le Tulafono leni. O le mafuaaga ona afai e puapuagatia o tatou aiga mai tua po o Savaii foi, o tatou lava e muamua sulu mai i ai mo se fesoasoani. E pei foi o le vaega o le Tulafono leni e i ai le vaega foi lea e faamalosi ai le avatu o le laisene, a leai le laisene e le feaveaia, ona molia loa lea.

Mo le silafia lau Afioga i le Fofoga Fetalai ma le mamalu o le Palemene, o le Tulafono i Ausetalia i le tele o Setete faapena foi ma Niu Sila, e tuuavanoa lava i tagata avetaavale. O le uiga o lea mea a taofia oe e le leoleo i so o se Setete i Ausetalia faapena foi ma Niu Sila, e tuuavanoa, sa masani ona 7 aso. Ae o le mea lea ua i ai nei ua le mautinoa, ae masalo o totonu o le 72 itula. A o le mea la lea e i ai le Tulafono lea o le a pasia nei, e matua leai lava ma se avanoa o tuu i ai, e tapa loa e leai sou laisene molia loa oe i le le feaveaia o lou laisene.

O le lona lua sa ou fautua malosi lava i le Fonotaga lea na laga ai le mataupu leni, e tatau ona tuuavanoa i o tatou tagata, e tatau ona i ai se maliega a le alii ofisa ma le tagata e ave lana taavale pe tow i se mea e malilie faatasi i ai ae le o le ave faamalosi i le yard a le LTA. E ui i lea, o nai manatu na e avatu lau Afioga ae atonu e aoga mo se isi Fonotaga i se taimi o i luma e toe iloilo ai le Tulafono Tau Faaofi. Ma le faaaloalo.

FOFOGA FETALAI: Malo. Lau Afioga i le Taitaifono.

Tofa TUSA MISI TUPUOLA: Lau Afioga o le mataupu foi lea sa saunoa ai le sui usufono mamalu lea sa iloilo lava i ai le Komiti ina ua maea ona faatalanoaina le Lipoti ma Ofisa aemaise foi le Afioga i le Loia Sili ma le Matagaluega. E leai lava se mea lau Afioga ma le mamalu o le Palemene o le a aafia ai fua pe afai o le avetaavale la e i ai le laisene avetaavale. Ae ala ona taofia e le vaega lea o alii traffic officers a le LTA ona ua leai se laisene avetaavale leai foi se isi na te toe aveeseina le taavale aua e le mafai le mafai lava ona toe faatagaina e alii ofisa ona toe alu le tagata lea e leai se laisene avetaavale i le taavale lea ua maua e alii leoleo.

O le ala la lea e mafai ai loa ona ave i uta ae le faapea ua ave faamalosi i se tulaga foi lea faamalosi. E ave i uta e tuu i ai itula ia ua aumai e le Tulafono e mafai ai ona alu atu se isi e i ai se laisene avetaavale ona aveese mai ai lea o le taavale mai le Ofisa. O le faamalamalama lea e tusa ai ma lea tulaga.

FOFOGA FETALAI: Ou te manatu ua manino le faamalamalama a le sui usufono mamalu. O le a avatu le avanoa, se i tulai mai le Afioga i le Minisita.

Afioga Hon MANUALESAGALALA MATI TUIGAMALA ENOKATI POSALA: Lau Afioga i le Fofoga Fetalai ou te iloa o lena ua manino le mata o le vai e pei ona saunoa le Taitaifono. O Tulafono lava o lo o taumafai i ai le tatou Malo, o le puipuiga o le saogalemu. O le tasi lenei o faafitauli tele ua oo mai i le tatou atunuu i le feoi i luga o alatetele ma tele faafitauli ua maliliu ai le mamalu o le atunuu. Ia o lea e tuuavanoa e tolu masina e ave ai e tuu i le lotoa, o le avanoa lena. O la e tuuavanoa mo le taimi. Ia afai e te manumanu i lau meatotino lea, e le tatau ona atoa se aso o tu i o e te taumafai i se auala e maua ai se avanoa. O lea la e tuuavanoa, e matua telē lava le tolu masina. E oo foi la i le mea lea o le laisene, afai e leai sou laisene o lena e te solitulafono. O puipuiga ia lea e taumafai i ai le Malo, a o le tuuavanoa e toe fealuai ai le tagata e leai se laisene ua salaese le faamoemoe o le Malo ma tatou Taitai ina ia malupuipua le tatou atunuu.

Ma le faaaloalo.

Faamaonia le Fuaiupu 4.

FUAIUPU 5: Ua teuteuina le fuaiupu 36.

Tofa LEALAILEPULE RIMONI AIAFI: Lau Afioga i le Fofoga Fetalai o le Fuaiupu 5 faamolemole lau Afioga. O le vaega lava lea sa taumafai i ai i le Tulafono i le faafuiau lea e faapea mai e le mafai e se i si i mea ia o laisene ave pasi. E le mafai e se tasi i lalo ifo o le 25 tausaga ona toe ave i ai se laisene avepasi. Lau Afioga i le Taitaifono o le Komiti, o a ni mafuaaga tatau ua mafua ai ona fai lea Tulafono. Ae manatua foi, e le faapea foi o le a avea nisi laiti e faatamala o le a aafia ai le toatele o tagata lelei le mafaufau ma lelei lava lona ia aoaoina e mafai ai ona ave lana pasi i lana aiatatau i le taimi talafeagai pe 20, 21 faasolo i luga. Po o le a le mafuaaga ua ala ai ona tuu i luga i le 25 tausaga?

Ma lou faaaloalo lava.

FOFOGA FETALAI: Tulai mai lau Afioga i le Taitaifono.

Tofa TUSA MISI TUPUOLA: Faafetai i lau Afioga i le Fofoga Fetalai, faafetai atu foi i le faafesili a lou uso le Afioga i le sui usufono mo Faleata Sisifo aua o lau Komiti o lau Komiti uma lava lea. Lau Afioga, o lea lava sa faamalamalama foi e le Afioga i le Minisita i le tatou Fonotaga i le faitauga faalua o le Tulafono, o le mafuaaga lava na mafua ai le finagalo o le Matagaluega aemaise le Afioga i le Minisita, ona o le tele o faalavelave ua

maliliu ai le atunuu e mafua mai i le toatele o avetaavale laiti, tulou lava le faafofogaaga a le au avepasi. A o le tulaga lea o lo o i ai ina ia taumafai e tuutuu laititi i luga le tausaga e agavaa ai le tagata e ave le pasi, leaga o le pasi o lo o i ai le soifua o le toatele o le atunuu o la e feaveai. E le tatau la ona tuu ai pea e le Pulega o le Felauaiga i le Laueleele e avepasi pea le tausaga lea ma le faaaloalo. O le ala la lea o le naunau o le Matagaluega ma le Pulega ina ia toe siisii atu i luga le tausaga i le 25 ona pei ua matua le tausaga lea e mafai ai ona silasila i ai mo le faafoeina o pasi laupasese i totonu o le atunuu aua lava le saogalemu o e femalagaai.

Ma le faaaloalo lau Afioga.

FOFOGA FETALAI: Tulai mai lau Afioga i le Minisita.

Afioga Hon MANUALESAGALALA MATI TUIGAMALA ENOKATI POSALA: Lau Afioga i le Fofoga Fetalai, e fai lava si faanoanoa i le sui usufono mo Faleata Sisifo o lea e lavea i totonu o le Komiti, o latou ia sa vailiilia ma sailiili tulaga taua mo lenei Tulafono Tau Faaofi. A o le 21 tausaga lea e pei ua ave i ai le ki foi lea, o tu mai fafo e le o se mea na faavae i le tatou atunuu. O le tele foi la o le tatou atunuu e tetee tele i le 21 ae o le age lea o le 25, o lea sa fai sailiiliga lea e tele ai faalavelave lea e tulai mai, le 25 agai lalo. A o le age group foi lea ua faiaiga, i lau vaai lautele ua agai e faaiipoipo ma fai le aiga. O lona uiga ua tele le amanaia e le gata ua tuua matua sa mafuta ae ua oo i le toalua ma le fanau. O lona uiga ua iai le popolega leaga e tolusefulu soifua o le atunuu lea e feaveai i taavale ia. O lona uiga la, o i e tupu ai le agaga e silasila mamao lea i le 25 ina ia tuutiitia ma faasaoina ona e tele soifua ia e feaveai i pasi e le na o le toalima e tolusefulu lea e feaveai ai i taavale ia. Ia e pei o le silasila mamao lena o lea e faavae ai le tatou Tulafono Tau Faaofi.

Ma le agaga faaaloalo.

Tofa LEALAILEPULE RIMONI AIAFI: E faamalulu atu i lau Afioga i le Minisita ma le Taitaifono, e moni, ae leaga o lea sa tetee lava lou sui usufono i totonu o le matou Komiti, e pei o le ala lena o lou toe fesili i le Afioga i le Taitaifono, se i faamalie mai lava lou loto ona o lea lava ou te talitonu. Ia manatua foi tasi lea galuega lea tele ina ave ai tatou tagata i fafo, avepasi, ave taxi. Ia o lona uiga a avatu i fafo le 25 tausaga po o le 26 tausaga e le i tago lava i se pasi, e matua tele le faaletonu. O lea ua 53 i le 54 tausaga talu ona Tutoatasi tatou ua mamao i luma le alu a tatou a o lea ua toe toso i tua e le LTA.

Ma le faaaloalo lava faafetai.

Afioga Hon PALUSALUE FAAPO II: Lau Afioga i le Fofoga Fetalai o le mea lava lea.....

FOFOGA FETALAI: O le a le mea lea?

Afioga Hon PALUSALUE FAAPO II: O lau fesili i le Afioga i le Taitaifono i le iloiloga a le Komiti, po o i ai ni faamaumauga e faamaonia ai le Lipoti lea. Pe toafia nisi i lalo ifo o le 25 tausaga na maliliu ai nisi ma lavevea ai ni pasi? O lona lua po o i ai ni faamaumauga e le o lavevea ni pasi

i tagata 25 agai i luga? O mea ia o lea e fiamalamalama ai leaga e taua tele le mea lea, 5 tausaga o faatalitali se isi e tatau ona o e ave pasi ma galuega e fia maua ai ni galuega a nai o tatou tagata. Ae pe i ai la ni faamaumauga e tusa ai ma a outou suesuega, aua o le tala lea e fai mai, ua tele pasi lavevea ona o tagata i lalo ifo o le 25. Ae pe iai foi la ni faamaumauga i nisi e matutua atu i le 25 na lavevea ai ni pasi.

Ma lou faaaloalo lava.

FOFOGA FETALAI: Tulai mai lau Afioga i le Minisita.

Afioga Hon MANUALESAGALALA MATI TUIGAMALA ENOKATI POSALA: E le o tulaga i pasi ia e agai i ai faalavelave ia, o taavale lautele ma e solitulafono o le age group lena o lea e talanoa i ai. Ae sa ou manatu lava e tulai mai lou uso a sui usufono e lagolago leaga o matou i tua o mea nei o lea e faamoemoe i ai le feoaiga o pasi. Ia e lelei lava o la e femalagaai ia i lona sa, a o le feoaiga la e feoai mai ai o matou itumalo mai tua e mafuli i taavale nei. O lona uiga e ave lava le faamamafa ina ia malupuipua le feoaiga a le mamalu o le atunuu.

Ma le faaaloalo.

Afioga Hon PALUSALUE FAAPO II: O le mea e fia faasao, aua le faaogaina mea ia e te polokiki ai i tua. E le maua ai ni ou ai o lea e fesili sao atu, e le maua ai ni au palota. O lea ou te fesili atu i le Taitaifono, pe i ai ni a latou faamaumauga tusa ai ma le latou suesuega. E faigofie lava, a o lea ua tali mai fua ia.

FOFOGA FETALAI: O lea ua maua le finagalo o le Taitai o le Itu Agai, o lea e tulai mai le Afioga i le Minisita e faapulapula le mataupu e uiga i la outou fesili.

Afioga Hon MANUALESAGALALA MATI TUIGAMALA ENOKATI POSALA: Lau Afioga o le Tulafono Tau Faaofi lea o mea tau taavale afi o lea e i lalo o le vaaiga a le Minisita. O le ala foi lena o lou tulai atu e faapupula. Ae o le uiga o le tala lea na faamanino atu e le faapea na o pasi ia sa i ai faalavelave ia na tulai mai, o taavale eseese ia e i ai o i lea e mafuli i ai le suesuega ma le tulaga lea i ai. A o lea ou te taua i ai leaga o tua lea e feoai mai i pasi. O le itu lena e mamafa i ai le silasila leaga o le femalagaiga a le tatou itumalo ma le atunuu ma le faaaloalo.

FOFOGA FETALAI: Ia e manatu ua manino lea mataupu, malilie sui usufono e le mafai ona toe tulituliaupu o lea ua saunoa mai le Taitaifono ua maea ona lauliliu. *Lealailepule you were in there,* o lea sa outou sailiilia uma lenei Tulafono taua, tatou ave le faatuatuaga i le Minisita ma faamaumauga na aumai e le Pule Sili o le Pulega, o sailiga ua tatau ona vaai i le saogalemu aua tatou te mananao i le tamaoiga ma mea a o lea e tutupu faalavelave, o le ala lea malilie sui usufono.

Faamaonia le Fuaiupu 5.

FUAIUPU 6: Ua faaofiina fuaiupu fou 72C e oo atu i le 72E.

Faamaonia.

FUAIUPU 7: Teuteuga lautele.

Faamaonia.

FUAIUPU 1 MA LE IGOA:

FUAIUPU 1: Igoa puupuu ma le amataga.

IGOA: Teuteuga o le Tulafono o Taavale Feoi i Alatetele 2015.

Faamaonia.

Na faagasolo le Tulafono Tau Faaofi o Teuteuga o le Tulafono o Taavale Feoi i Ala Tetele 2015 e aunoa ma se Teuteuga.

TULAFONO TAU FAAOFI O TEUTEUGA O LE TULAFONO O LE FETUFAAIGA O FAAMATALAGA TAU LAFOGA 2015

– iloiloga auiliili

FOFOGA FETALAI: E tusa ai ma le Tulafono Tumau 106, e tatau ona faamaonia muamua e le Fono Aoao le Lipoti a le Komiti i le Tulafono Tau Faaofi ona avanoa ai lea o le Iloiloga Auiliili o le Tulaofno Tau Faaofi.

Tulai mai le Afioga i le Taitaifono o le Komiti o Mataupu tau le Va i Fafu, Fefaatauaiga ma Tupe Maua.

Tofa SOOALO MENE (Taitaifono o le Komiti o Mataupu tau le Va i Fafu, Fefaatauaiga ma Tupe Maua): Ou te tulai atu ma le faaaloalo lau Afioga i le Fofoga Fetalai ou te faatu le lafo, *Ina ia faamaonia e lenei Fono Aoao le Lipoti a le Komiti o lo o fautuaina ai, Ina ia faagasolo le Tulafono Tau Faaofi o Teuteuga o le Tulafono o le Fetufaaiga o Faamatalaga tau Lafoga 2015 e aunoa ma se Teuteuga.*

Faaluaina e le sui usufono mo Palauli, se tasi o sui usufono mo Vaimauga Sisifo, Tofa Lenatai Victor Faafoi Tamapua, sui usufono mo Sagaga le Falefa ma le sui usufono mo Aiga i le Tai.

Na faamaonia le lafo.

FOFOGA FETALAI: E faasilasila atu ua faamaonia nei e le Fono Aoao le Lipoti a le Komiti o Mataupu tau le Va i Fafu, Fefaatauaiga ma Tupe Maua i

le Tulafono Tau Faaofi o Teuteuga o le Tulafono o Fetufaaiga o Faamatalaga tau Lafoga 2015.

O le a sagai atu le Fono Aoao i le Iloiloga Auiliili o le Tulafono Tau Faaofi o Teuteuga o le Tulafono o le Fetufaaiga o Faamatalaga tau Lafoga 2015.

E tusa ai ma le Tulafono Tumau 102, e amata le Iloiloga Auiliili o le Tulafono Tau Faaofi i le Fuaiupu 2.

FUAIUPU 2: Ua teuteuina le fuaiupu 10.

Faamaonia.

FUAIUPU 3: Ua teuteuina le faamatalaga 1.

Faamaonia.

FUAIUPU 4: Ua teuteuina le Tulafono o Mavaega Tausi 2014.

Faamaonia.

FUAIUPU 5: Ua teuteuina le Tulafono o Kamupani Faava o Malo mo se Faamoemoega Faapitoa 2012.

Faamaonia.

FUAIUPU 1 MA LE IGOA:

FUAIUPU 1: Igoa puupuu ma le amataga.

IGOA: Teuteuga o le tulafono o le Fetufaaiga o Faamatalaga Tau Lafoga 2015.

Faamaonia.

Na faagasolo le Tulafono Tau Faaofi o Teuteuga o le Tulafono o le Fetufaaiga o Faamatalaga tau Lafoga 2015 e aunoa ma se Teuteuga.

TULAFONO TAU FAAOFI O IUNI FAAUNETUPE 2014
– iloiloga auiliili

FOFOGA FETALAI: E tusa ai ma le Tulafono Tumau 106, e tatau ona faamaonia muamua e le Fono Aoao le Lipoti a le Komiti i le Tulafono Tau Faaofi ona avanoa ai lea o le Iloiloga Auiliili o le Tulafono Tau Faaofi.

Tulai mai lau Afioga i le Taitaifono o le Komiti o Tupe Maua ma Tupe Totogi.

Susuga Hon PAPALIITELE NIKO LEE HANG: Lau Afioga i le Fofoga Fetalai ou te faatu le lafo, *Ina ia faamaonia e lenei Fono Aoao le Lipoti a le Komiti o lo o fautuaina ai, Ina ia faagasolo le Tulafono Tau Faaofi o Iuni Faaunetupe 2014 faatasi ma Teuteuga ma Faasaoga.*

Faaluaina e se tasi o sui usufono mo Faasaleleaga Nu. 1, Afioga Hon Gatoloaifaana Amataga Alesana Gidlow, ma le sui usufono mo Aleipata Itupa i Lalo.

Na faamaonia le lafo.

FOFOGA FETALAI: E faasilasila atu ua faamaonia nei e le Fono Aoao le Lipoti a le Komiti o Tupe Maua ma Tupe Totogi i le Tulafono Tau Faaofi o Iuni Faaunetupe 2014.

O le a sagai atu le Fono Aoao i le Iloiloga Auiliili o le Tulafono Tau Faaofi o Iuni Faaunetupe 2014.

E tusa ai ma le Tulafono Tumau 102, e amata le Iloiloga Auiliili o le Tulafono Tau Faaofi i le Fuaiupu 2.

FUAIUPU 2: Faamatalaina o uiga o upu.

Faamaonia.

FUAIUPU 3: Faamatalaga tusia faaetulafono o le faalapotopotoga.

Faamaonia.

FUAIUPU 4: Uluai fonotaga.

Faamaonia.

FUAIUPU 5: Talosaga mo le faamauina.

FOFOGA FETALAI: O lo o i ai le Teuteuga a le Komiti i le fuaiupu 5 e pei ona faaalua i le Pepa Faaopoopo o Galuega.

Tulai mai lau Afioga i le Taitaifono o le Komiti .

Susuga Hon PAPALII TELE NIKO LEE HANG: Lau Afioga i le Fofoga Fetalai ou te faatu le Teuteuga i le fuaiupu 5(1)(a) e faapea:

“TEUTEUGA:

i) Fuaiupu 5(1)(a)

Ia soloia le faaupuga “iuni faaunetupe” ona ua mauiinoa e le i faavaeina se Iuni i totonu o Samoa.

ii) Fuaiupu 5(2)(b)

Ia soloia le faaupuga “iuni faaunetupe” ona ua mauiinoa e le i faavaeina se iuni i totonu o Samoa.”

Ma le faaaloalo lava.

Faamaonia le Teuteuga.

Faamaonia le Fuaiupu 5 e pei ona Teuteuina.

FUAIUPU 6: Faamauiina.

Faamaonia.

FUAIUPU 7: Faalapopotoga ua tuufaatasia faaletulafono.

Faamaonia.

FUAIUPU 8: Tusi faamaonia o le faamauiina.

Faamaonia.

FUAIUPU 9: E faatapulaaina sui auai i vaega.

Faamaonia.

FUAIUPU 10: Tamaiti po o teineiti.

FOFOGA FETALAI: O lo o i ai le Teuteuga a le Komiti i le fuaiupu 10 e pei ona faaalua i le Pepa Faaaopoopo o Galuega.

Tulai mai lau Afioga i le Taitaifono.

Susuga Hon PAPALIITELE NIKO LEE HANG: Lau Afioga i le Fofoga Fetalai ou te faatu le Teuteuga i le fuaiupu 10(2)(a) e faapea:

“TEUTEUGA:

Ia soloia le fuainumera “16” ma suia i le fuainumera sa’o “18” ma faitauina ai le parakalafa (a) e faapea:

“(a) e le agavaa e palota seia vagana ua aulia le 18 o ona tausaga; ma”

Ma le faaaloalo lava.

Faamaonia le Teuteuga.

Faamaonia le Fuaiupu 10 e pei ona Teuteuina.

FUAIUPU 11: Tusi e faamau ai sui auai.

Faamaonia.

FUAIUPU 12: Faateaina o sui auai.

Faamaonia.

FUAIUPU 13: Tuumuli ese o sui auai.

Faamaonia.

FUAIUPU 14: Tupe e totogi atu ina ua maliu, tuumuli ese, po o le faateaina o se sui auai.

Faamaonia.

FUAIUPU 15: Taunuuga o le faateaina po o le tuumuli ese.

Faamaonia.

FUAIUPU 16: E lē toina i tua pe faaliliuina atu ni sea o tagata ofisa ma isi faapena.

Faamaonia.

FUAIUPU 17: Palota.

Faamaonia.

FUAIUPU 18: Sini autu.

Faamaonia.

FUAIUPU 19: Malosiaga.

Faamaonia.

FUAIUPU 20: Fanua, totagifuapauina e ulu ai ma le ofisa faamauina.

Faamaonia.

FUAIUPU 21: Tupe faavae.

Faamaonia.

FUAIUPU 22: Sea ma tufatufaga.

Faamaonia.

FUAIUPU 23: Resitara o Iuni Faaunetupe.

Faamaonia.

FUAIUPU 24: O Resitara lagolago.

Faamaonia.

FUAIUPU 25: Tusi e faamau ai Iuni Faaunetupe.

Faamaonia.

FUAIUPU 26: Filifilia o faatonu ma komiti.

Faamaonia.

FUAIUPU 27: Tiute o faatonu.

Faamaonia.

FUAIUPU 28: Tofiaina o tagata ofisa.

Faamaonia.

FUAIUPU 29: Tiute tauave o komiti faufautua.

Faamaonia.

FUAIUPU 30: Tiute tauave o komiti faaunetupe.

Faamaonia.

FUAIUPU 31: Fonotaga.

Faamaonia.

FUAIUPU 32: Noataga a tagata ofisa ma faatonu.

Faamaonia.

FUAIUPU 33: Totogi.

Faamaonia.

FUAIUPU 34: Faamatalaga toe faafoi a le Resitara.

Faamaonia.

FUAIUPU 35: Faamoemoe o nogatupe.

Faamaonia.

FUAIUPU 36: Faamalumaluga o nogatupe.

Faamaonia.

FUAIUPU 37: Faatapulaaina.

Faamaonia.

FUAIUPU 38: Tulaga faasaina.

Faamaonia.

FUAIUPU 39: Fua faatatau o tului.

Faamaonia.

FUAIUPU 40: Toe totogiina.

Faamaonia.

FUAIUPU 41: Malosiaga e nono ai ni tupe.

Faamaonia.

FUAIUPU 42: Malosiaga o mea e faamau ai aitalafu.

Faamaonia

FUAIUPU 43: Teugatupe Faaagaaga.

Faamaonia

FUAIUPU 44: Totogiina o tufatufaga.

Faamaonia.

FUAIUPU 45: Tausaga faaletupe.

Faamaonia.

FUAIUPU 46: Puipuigamalu e tagata ofisa.

Faamaonia.

FUAIUPU 47: Aitalafu e tatau ona totogi atu e sui auai.

Faamaonia.

FUAIUPU 48: Faamatalaga o tupe maua faaletausaga.

Faamaonia.

FUAIUPU 49: Isi faamatalaga o tupe maua.

Faamaonia.

FUAIUPU 50: Pepa faatumu o faamatalaga o tupe maua.

Faamaonia.

FUAIUPU 51: Suesuega faaletausaga o mataupu.

Faamaonia.

FUAIUPU 52: Tulafono laiti.

Faamaonia.

FUAIUPU 53: Tulafono laiti e laugatasia ai.

Faamaonia.

FUAIUPU 54: Tulafono laiti e noatia ai.

Faamaonia.

FUAIUPU 55: Soloia o le faamauina.

Faamaonia.

FUAIUPU 56: Faataapeina e ala i le maliega a sui auai.

Faamaonia.

FUAIUPU 57: Noataga o sui auai i le faataapeina.

Faamaonia.

FUAIUPU 58: Tuutuuga e faasino i le pepa faamaonia faaletulafono o le faataapeina.

Faamaonia.

FUAIUPU 59: Soligatulafono.

Faamaonia.

FUAIUPU 60: Faasaina ona faaogā o upu “Iuni Faaunegatupe.”

Faamaonia.

FUAIUPU 61: Soligatulafono mo Iuni faaunetupe e le i faamauina.

Faamaonia.

FUAIUPU 62: Tapulaa i luga o igoa.

Faamaonia.

FUAIUPU 63: Faasalaga lautele.

Faamaonia.

FUAIUPU 64: Tuufaatasiga o Iuni Faaunetupe.

Faamaonia.

FUAIUU 65: Tuusaunoaga mai lafoga.

Faamaonia.

FUAIUPU 66: Talosaga tetee.

Faamaonia.

FUAIUPU 67: Tulafono Faatonutonu.

Faamaonia.

FUAIUPU 68: Totogifuapauina ma teuteuga o Faamatalaga.

Faamaonia.

FUAIUPU 69: Soloia, soloaiga ma teuteuga.

Faamaonia.

FAAMATALAGA.

Faamaonia.

FUAIUPU 1 MA LE IGOA:

FUAIUPU 1: Igoa puupuu ma le amataga.

IGOA : Tulafono o Iuni faaunetupe 2014.

FOFOGA FETALAI: O lo o i ai le Faasaoga a le Komiti i le Fuaiupu 1 ma le Igoa e pei ona faaalua i le Pepa Faaopoopo o Galuega.

Tulai mai lau Afioga i le Taitaifono o le Komiti.

Susuga Hon PAPALIITELE NIKO LEE HANG: Lau Afioga i le Fofoga Fetalai ou te faatu le Faasaoga i le Fuaiupu 1 ma le Igoa e faapea:

“FAASAOGA:

*Ia aveese le fuainumera “2014” ma suia i le fuainumera “2015”
ma faitauina ai le Igoa o le Tulafono e faapea:*

TULAFONO O IUNI FAAUNETUPE 2015.”

Faamaonia le Faasaoga.

Faamaonia le Fuaiupu 1 ma le Igoa e pei ona Faasaoina.

*Na faagasolo le Tulafono Tau Faaofi o Iuni Faaunetupe 2015 faatasi ma
Faasaoga.*

FOFOGA FETALAI: Ia, ou te manatu leaga o le Tulafono Tau Faaofi lenei o le faitauga faalua o le a avatu ai le avanoa i le Afioga i le Minisita e saunoa faamalamalama, ae leaga o lea ua tatou tulalata i le tatou taimi malolo, o le a vavae foe e lelei foi le tasi lava o le taimi e saunoa ai le Minisita e aunoa ma le toe motusia ona faapena foi lea ona fai outou finagalo. Ua ou vaai atu ua vaivai lava lea Itu o le Maota ua manaomia se faasiliga malosi, o lona uiga ua tataua ona tatou o e tali le sua.

Ou te faasilasila atu o le a faataatiaese Taulumaga a le Fono Aoa mo lana malologa masani o le afiafi.

Na faataatiaese Taulumaga a le Fono Aoa i le itula e 8:37 i le po ma toe amatalia i le itula e 9:24 i le po.

FOFOGA FETALAI: Ou te faasilasila atu ua toe amatalia nei Taulumaga a le Fono Aoa Faitulafono.

O lea ou te vaai atu ua toe ono minute ona afa lea o le itula e 9:00, ma e maitau atu e le o toe umi se taimi. Masalo o nai itula mulimuli lea o le a tatou faagasolo ai, ae tatalo atu pea i le tatou Maota Fono, e umi lava le tatou galuega o outou. Ae avatu pea le avanoa i tulaga aloaia ma le faasologa o tatou galuega. E manatu o le lua itula lea na lumanai nei sa tele ai le faasologa o le tatou galuega pei ona faatulagaina.

E momoli atu le agaga faafetai i lenei itula o le afiafi, e manatu foi ua maua lo outou faasiliga malosi, faafetai i le Atua i nai meaai ua foai e tausii ai lo outou soifua ma le ola.

E faia le tatou malologa ua maea ona ou faitauina le Tulafono Tau Faaofi o Teuteuga o le Tulafono o Tupe Teufaafagaluegaina mai Fafu 2015 i lona faitauga faalua.

Ou te valaau atu i lau Afioga i le Sui Palemia, Honourable Fonotoe tulai mai e saunoa e faatu le lafo ma saunoa faamalamalama.

**TULAFONO TAU FAAOFI O TEUTEUGA O LE TULAFONO O
TUPE TEUFAAFAIGALUEGAINA MAI FAFO 2015
– faitauga faalua**

Tofa Hon FONOTOE NUAFESILI PIERRE LAUOFO: E momoli atu le faafetai i lau Afioga i le Fofoga Fetalai e faapea foi le Ofisa ona o le taumafataga na saunia mo sui usufono mamalu o le Maota, o lea ua sao i alo le taliga o le sua.

Ou te tulai atu ma le faaaloalo e faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Tupe Teufaafaigaluegaina mai Fafo 2015 i lona faitauga faalua ma ou te fia tautala faamalamalama i ai.*

Faaluaaina e le Minisita mo Faamasinoga ma Pulega Tau Faamasinoga ma le Minisita mo Galuega Tau Alamanuia ma Atinae a le Malo.

Tofa Hon FONOTOE NUAFESILI PIERRE LAUOFO: Lau Afioga i le Fofoga Fetalai, o lenei Tulafono Tau Faaofi o se Tulafono e puupuu, na o le lua lava nai vaega ia e fia teuteuina o le Tulafono Autu ua mafua ai ona tuuina mai i le Maota lenei Tulafono Toe Teuteu.

O le vaega muamua lau Afioga, o le soloia lea o le Fuaiupu 3(2) o le Tulafono Autu. O le vaega la lea e aveesea ai le manaoga foi lea mo tagata e le o ni tagatanuu o Samoa e galulue i ni pisinisi ua lisiina i lalo o lisi faaleoleo po o le reserved list, ina ia ogatusa ai la ma lenei vaega o le Tulafono Tau Faaofi, ma le Fuaiupu 14 o le Tulafono Autu.

Ma le isi Teuteuga lau Afioga, ina ia faaopoopo ai se Fuaiupu lea 8(b) fou e manaomia ai tusi faamaonia o tupe teufaafaigaluegaina mai fafo ina ia toe faafouina ai i se faiga faaleausaga. O lona uiga o mea foi nei o foreign investment certificates. I le taimi nei la e le o i ai se tapulaa o le taimi o mea o tusi ia faamaonia po o certificates ia, a ua manatu le Matagaluega e ala atu i le Malo, ua tataua ona fai se tapulaa foi lea pe tai 12 masina po o le tausaga ma toe faafou.

E pei o nai Teuteuga laiti ia lau Afioga ua manaomia i lenei vaitaimi. Ma le faaaloalo tele. Faafetai.

FOFOGA FETALAI: Malo faafetai i lau Afioga i le Sui Palemia e a ia le Tulafono Tau Faaofi. Ia, o tatou tulaga masani, afai e leai o le a tuuina atu loa le tatou fesili.

Tulai mai Aveautau, le sui usufono mo Faleata Sasae.

Tofa AVEAU TUALA LEPALE NIKO PALAMO: Lau Afioga i le Fofoga Fetalai, faafetai i le Afioga i le Minisita mo le Tulafono Tau Faaofi. Ua ou tulai atu, muamua e momoli lau faafetai i le Afioga i le Minisita ma le Matagaluega i le vaega lea o le Tulafono Tau Faaofi, lea ua aveeseina ai le vaega lea ua le mafai ai ona toe faafaigaluegaina ni tagata mai fafo i pisinisi ia e tau o le reserved list lea. Faafetai tele mo lea vaega o le Tulafono Tau Faaofi.

O le vaega lona lua lau Afioga, ou te fia fesiligia ai le isi vaega lea o le Tulafono Tau Faaofi, ona o vaega ia o pisinisi lea e i lalo o le reserved lists, a

i ai Tulafono foi nei ua faafigofie ai e nisi foi mai fafo ona faatino ia pisinisi ae le lavea i le Tulafono.

O le faaitaiga lau Afioga i le Fofoga Fetalai, o faleoloa laiti foi ia e faatagaina ai na o tagata Samoa e mafai ona faatinoina le vaega lea, ae fua i meaai basic foodstuffs ma mea masani. O le Tulafono lea e i lalo... faasao mai au e le Afioga i le Minisita, a faatau ai ni ofu, ni laei, ua le aafia loa le vaega lea i lalo o le reserve list. O i la lea ou te fia fesiligia ai lau Afioga i le Minisita aemaise o le Matagaluega, se i tagai ane i lea vaega o le Tulafono Tau Faaofi, aua o lea ua faaoga e nisi o tagata mai fafo le vaega lea o le Tulafono Tau Faaofi, na o le tautau ai lava o ie ma ofu pei o ni laei, ina ia faafoliga ai o la e faatau ai, a o mea la e i totonu, o mea lava ia e tatau ona faatino e tagata o le atunuu i totonu o Samoa nei.

O le vaega lona lua lau Afioga, o le vaega lea o car rentals, taavale ia e hire e tagata foi nei. E i ai nai kamupani foi nei car dealers, a o lea foi ua toe fai car rentals, e fesiligia ai lau Afioga i vaega ia o le Tulafono Tau Faaofi, se i tagai ane i ai, e le tele. Ae masalo o lea e i ai i le vaitaimi lenei nai vaega faapea, e puipuia ai o tatou tagata, aemaise lava o lea ua manaia le Tulafono Tau Faaofi, o lea ua faatulaga lava le vaega lea o le reserve list lea, na o tagata sitiseni Samoa e mafai ona latou faatinoina.

O nai motugaafa ia ma le faaaloalo lava lau Afioga i le Fofoga Fetalai.

FOFOGA FETALAI: Malo. Ia, Lealailepule.

Tofa LEALAILEPULE RIMONI AIAFI: Faafetai lava i lau Afioga mo le avanoa, faafetai foi i le Afioga i le Sui Palemia mo le Tulafono Teuteu. Ae le i faia se manatu o lou sui usufono i lenei Tulafono Tau Faaofi, e muamua ona ou fia faamauina le faafetai a lenei itumalo i le Tofa ia Auelua lea sa tulai mai e avea ma Ofisa Sili o Pulega o le Matagaluega lenei. O le tasi lenei Matagaluega i tausaga talu ona ou i le Palemene e aupito sili ona tele ma anoanoai Tulafono e tuuina mai i totonu o le Palemene lenei. O lea foi e lua Tulafono Tau Faaofi o lea o le a tatou tagofiaina, o Tulafono Tau Faaofi ua tuuina mai aua lava le faafoeina o lenei Matagaluega. E matua alagataata i lou sui usufono ma lou itumalo le faafetai tele i lenei tamalii i lona sao taua i totonu o le atunuu lenei, aemaise o lenei Matagaluega. Faafetai le galue, malo le finau. O le tele o nei suiga tetele mai le amataga seia oo mai lava i lenei taimi. Faafetai foi i le ua tulai mai i le foe e tauaveina le tiute, talosia ia faapea ona faaauau pea galuega lelei o faatino e lenei Matagaluega, aua e tatau lava ona tagai i tofiga nei, e le aiaina e lou sui usufono le matafaioi a le Kapeneta, ae fesiligia e lou sui usufono po o a tonu vaega ua filifiliina ai. Ae ui i lea, o le a fai sou manatu e tusa ai o le Tulafono Tau Faaofi ua tuuina mai.

O le aveeseina lea o i latou e le o ni sitiseni Samoa e galulue i pisinisi ia e i lalo o le reserved list, ou te fia fesili, e faapefea le restricted list, e faapefea le isi lisi lea e i lalo ifo, professional services ma mea faapena? E tatau ona tagai i ai e iloilo vaega nei.

O le isi vaega, o lea tatou te vaai i ai, o fale suisui, toetiiti lava le toe i ai se Samoa e le o faia sona fale suisui i lau vaai i ai. Ae le gata ina fai fale suisui toe omai ma tagata i fafo suisui ai. Ia, e oo i teine tausua tama, ou te alu atu i lea aiga o la e tausua tama mai tagata mai fafo. Ou faapea; "Oi, ou te le o iloa foi o aumai ni tagata mai fafo e faia lea galuega sa faia e o tatou tagata," ma

le tele lava o mea o lea ou te vaai i ai i aso uma ma taimi uma. Po o faapefea ona monitor nei mea, e faapefea i lalo o le Matagaluega.

O le isi vaega, o le mea lea o le toe faafouina o le certificate po o le resitala i tausaga taitasi. Lelei, ae pei o le vaega lea e maitau ai, po o faaauau pea lea galuega ae o a tonu ana mea e fai. Ae o le mea lea e fia maua i ai se... aua o mea ia e i lalo o le reserve list lau Afioga, ia na o mea lava ia o taxi drivers, e pei lava o mea o bus drivers, ma nai isi mea ia o lea lava, retailing, o mea na o lea e tele ina fai e nai tagata Samoa. E moni lava ae le tele tele ni tagata mai fafo i mea ia. Ae faafetai o lea ua faasa ma tapulaa i le taimi lenei mo le agai i luma.

O le isi la au fesili; aua o le mea lea o le Foreign Investment Bill lau Afioga i le Minisita, ina ua pasia le tatou Tulafono foi lea o le Citizen Investment Bill, e toafia ni tagata ua talosaga mai, ua oo mai e faaoga ai lea vaega?

Ma le faaaloalo lava. Faafetai.

FOFOGA FETALAI: Ou te manatu... tulai mai lau Afioga i le Sui Palemia, pei na o le pau lea o finagalo sa fia faalia.

O e fia saunoa lau Afioga i le Taitai o le Itu Agai? Ia, malie lava lau Afioga i le Sui Palemia, o le a avatu ia le avanoa mulimuli lea leaga o lea sa le maua o lo o fia saunoa le Taitai o le Itu Agai.

Tulai mai le Taitai o le Itu Agai.

Afioga Hon PALUSALUE FAAPO II: Lau Afioga i le Fofoga Fetalai, e ese le taua o le Tulafono Tau Faaofi. O le ala foi lea tiga lava ona vela le fala, ae tatau lava ona ave i ai ni manatu i le Tulafono Tau Faaofi, ona o le taua, aua o i lea e maua ai le taugofie o oloa, e maua ai foi le tagata o oloa, e maua ai foi le faoa o galuega, e maua ai foi nisi o pisinisi ua faatino e tagata mai fafo. E maua ai le puipuiga o nai o tatou tagata mai a latou galuega, ae le gata i lea, o le puipuiga o nai a latou pisinisi, ae peitai ane, o lea ua tatou tilotilo i ai, ua tele ina tapunipuni pisinisi sa maua ai tupe a nai o tatou tagata, a o lea ua faatino e tagata mai fafo le tele o pisinisi nei. O lea la i lou talitonuga, o le tatou Tulafono Tau Faaofi lenei, ua leva ona tatau ona aumai i totonu o le Maota e puipua ai tulaga ia ua tatou vaai i ai, ma popole ai le taofi i le isi lima i le sefulu tausaga o lumanai nei.

O le Tulafono Tau Faaofi lenei, e tatau lava ona fai ma teuteu, fai ma silasila i ai ina ia teuteu e puipua ai nai o tatou tagata mai galuega, puipua mai galuega, puipui mai le faoa o a latou pisinisi.

O le isi itu lau Afioga, ua avea le fetuleni mai o pisinisi nei ua silasila i ai i le quality o pisinisi nei, meaai nei e faatau ai. Ioe, o lea ou te tilotilo atu faa-aoatetele i le Tulafono Tau Faaofi lenei, ina ia puipua ai le tulaga ua tautuaupega le taunuu mai o le Tulafono Tau Faaofi.

Na pau le mea e fesili ai i le Afioga i le Sui Palemia, pe toe mafai ona toe tuu i tua le Tulafono Tau Faaofi i le taimi e amata ai ina ia se i tau silasila i mea ia e tatou te vaavaai i ai ina ia toe mafai ona toe fetuutuunai, ina ia foia ai faafitauli nei e feagai nei ma le tatou atunuu. O le igoa o le Matagaluega, ia o le (b) lea ou te tilotilo atu i ai, ia o le fai faatauvaga o fefaatauaiga ma le puipuiga o tagata e faagaioia oloa ma auaunaga. Peiseai o le....

Tofa Hon Fonotoe Nuafesili Pierre Lauofo: O le mea e fia faasao. O le Tulafono Tau Faaofi lea e saunoa i ai le Taitai o le Itu Agai, e tatou te le i oo

atu i le Tulafono lena, masalo pe toe sefulu ni Tulafono, ona faatoa tatou taunuu lea i le Tulafono lea ua saunoa mai ai ia le Taitai o le Itu Agai, e eseese mamao lava ma le Tulafono Tau Faaofi lea e talanoaina i le taimi lenei. Ia atonu lava e sao lava ua fai sina lea o le afiafi ua.....

Afioga Hon PALUSALUE FAAPO II: O le faalavelave lea o le Sui Palemia, o lauga faalauaitele ia e avatu lea e aafia ai lava ma.....tupe faafaigaluega, ioe, aua e te mateitei mai o lea e avatu lauga faalauaitele e aafia ai uma tulaga o Tulafono ia e faataatia mai. O le mea la lea, o tupe teu faafaigaluega, ia o le mea lava e tasi, o lea na tatou pasia ma tatou vevesi ai, lea ua faatau ai a tatou sitiseni. O lea la ua aumai nei le Tulafono Tau Faaofi, oka se manaia o le Tulafono Tau Faaofi ua aumai.....

FOFOGA FETALAI: Malie lau Afioga i le Taitai o le Itu Agai.

Tofa Hon Fonotoe Nuafesili Pierre Laufo: Lau Afioga i le Fofoga Fetalai, ou te tulai atu ma le agaga faaaloalo, o le Tulafono lea ua oo foi i ai le saunoaga a le Taitai o le Itu Agai o le Teufaafaigaluegaina o Tupe lea e maua ai Sitiseni, e le i pasia o la e i le Komiti i le taimi nei, masalo po o se isi Tauaofiaga o lumanai, ia ona lipoti mai lea o le Komiti. E ese foi la lea Tulafono ua oso i ai le Taitai o le Itu Agai. E a pe a tuu mai se avanoa se i avatu nai tali i fesili ia anoa ia na aumai a le sui usufono mo Faleata Sasae ma le sui usufono mo Faleata Sisifo ona faagasolo ai lea o le tatou Tulafono.

Afioga Hon PALUSALUE FAAPO II: Lau Afioga i le Fofoga Fetalai.....

FOFOGA FETALAI: Ia faauma maia lau saunoaga le Taitai o le Itu Agai.

Afioga Hon PALUSALUE FAAPO II: Lau Afioga i le Fofoga Fetalai, leai, e foliga mai o lea e mateitei mai le Sui Palemia, a o lauga ia o lo o fai nei o lauga faalauaitele.

Susuga Hon Tuilaepa Fatialofa Auelua Lupesoliai Neioti Sailele Malielegaoi: Lau Afioga i le Fofoga Fetalai, o Fonotaga faapenei e masani lava ona tupu ai ia tulaga faaletonu. Se faamolemole lava ou te faafesili atu, o le a lau matau, faamata o faasuaava le Taitai o le Itu Agai.

FOFOGA FETALAI: Ia e manatu o lea ua ou maua lou finagalo le Taitai o le Itu Agai. Ia faauma maia o lea ua manino lou finagalo.

Afioga Hon PALUSALUE FAAPO II: Lau Afioga i le Fofoga Fetalai, e leai, e faamalulu atu foi i lau itu, o au ou te le inupia, leaga o au o le Aoa Fesoasoani, ioe, ou te le tago la i le ava malosi, e pau le tagata o lea ou te iloa e tau ona, o le Afioga i le Palemia, ioe.

Susuga Hon Tuilaepa Fatialofa Auelua Lupesoliai Neioti Aiono Sailele Malielegaoi: Lau Afioga i le Fofoga Fetalai, ua ala ona ou tutulai atu lea ua matau mai, toeitiiti lava fa Tulafono e le i taitai oo i ai, a o lea ua talanoa mai ai le.....ua tigaina le Sui Palemia e tau faasaosao atu. A o le mea lava ia ua

tupu e le fou, e le fou mea nei, e oo loa ina fono po, amata loa ona matauina le Itu Agai ua faasuaava.

Tofa Lealailepule Rimoni Aiafi: Lau Afioga i le Fofoga Fetalai, ou te faafetai i le Taitai o lenei itu i le mataala, ua oo i luma lou mafaufau ae le i taitai oo i le vaega lea, e manatua le Tulafono o le mea lava e tasi. O manatua le toeaina foi lea na o ma le palagi i le maketi e faatau meamata, fesili atu le palagi, o le a le mea lea? fai mai o le banana, a, o le a le mea lea? o le taro, tau loa i le taamu, fesili loa le palagi, o le a la le mea lea? ua tau le iloa e le toeaina, fai mai le toeaina, that's taro's brother, ia o le brother la lea o le.....

FOFOGA FETALAI: Ia faauma maia.

Afioga Hon PALUSALUE FAAPO II: Lau Afioga i le Fofoga Fetalai, ia o le tulaga lena o le tatou Tulafono ua oo mai, ia se i silasila totoa i ai ona o lea na.....e sao e le i pasia le Tulafono lea, o lea i a tatou Sitiseni, o tupe faafaigaluega, a o lou talitonuga, o le mea tonu lava lea ua aumai nei.

O le mea lea lau Afioga i le Fofoga Fetalai, ia e le tele foi se manatu, ioe, ou te talitonu ia tatou talia lupe o mau i le auiliiliina, faafetai.

FOFOGA FETALAI: Ia tulai mai le Afioga i le Sui Palemia, aua e te saunoa i le saunoga a le Taitai o le Itu Agai. Ou te faatonuina le Satini o le Maota e siaki pe sao o faasuaava le Taitai o le Itu Agai. Ia tulai mai.

Tofa Hon FONOTOE NUAFESILI PIERRE LAUOFO: Faafetai i lau Afioga i le Fofoga Fetalai, leai e faafetai foi i nai sui usufono na sausaunoa ma tuuina mai foi nai fesili e tusa ai o lenei Tulafono Tau Faaofi. Ia e sao lava, ae o le tatou Tulafono e fai lava ma toe iloilo, fai ma toe iloilo mai i lea taimi i lea taimi e fai le review. A silasila la i le Tulafono Autu o lo o lisi mai ai ituaiga pisinisi uma lava i lalo o le Reserve List, o lalo la o le Reserve List na o lo o faatulaga uma mai ai ia ituaiga pisinisi, o pisinisi ia e na o tagatanuu Samoa e mafai ona latou faagaioia, e le lavea ai la ia ituaiga pisinisi ia e i ai fale suisui, o nai tagata foi ia faigaluega tausua tama, e le lavea i lalo o le Reserve List, atonu tasi lea mea e toe silasila foi i ai le Matagaluega pe a toe fai faatalatalanoaga ma le aufaipisinisi, pe tatau ona tuu i totonu o tatou lisi ia faapena foi le restricted list, o vaega na e pei ona i ai, o faleoloa ia sa taua e ese oloa e tuu mai i luma ese oloa i totonu, ia o vaega ia o lo o oo lava i ai asiasiga a le tatou Matagaluega mo Inspections, atonu la o i ai ni faiga faapena, e tatau foi ona faailoa mai i le tatou Matagaluega pe a maitauina o lo o i ai ni pisinisi faapena, pe tuu mai i luma ie po o lavalava o ofu o tulaga faapena, ia a o totonu lea e faatau ai oloa ia e faasa ona faatauina e latou i lalo o le Tulafono.

O rental cars, ia e sao aua pei e ese le vaega o rental cars ese car dealers ese pisinisi foi ia e faatau ai taavale, ese foi taavale rent po o taavale hire. O mea uma na e mafai ona toe iloilo foi ma toe tagatagai foi le Matagaluega, pe a oo i le taimi e review ai tatou lisi lea ma faatalanoa ma le Business Community, e aumai foi la lo latou finagalo. Aua o tatou lisi nei, o lisi e faavae i luga o fautuaga a le Business Community pe a oo ina faatalatalanoa ia tatou pisinisi nei.

O le Foreign Investment Certificate, ia faafetai, o le mea taua o lea e lagolagoina tulaga ia e tatau ona fai se tapulaa foi lele tausaga, a maea le 12 masina ona toe faafou laia, ia ae le tuua ai la asiasiaga a le Matagaluega aua o lo o faasolo pea a latou asiasiga i kamupani ma pisinisi ia e omai mai fafo po o foreign investors, o la e silasila po o ua faavae faatu le kamupani, e i ai lava tuutuuga o certificate s faapenei ma tulaga o business faapenei, e oo foi la pe a omai talosaga mo ni faamanuiaga foi nei po o ni fesoasoani mai le Malo, ona i ai lea o tuutuuga foi, e i ai le taimi e tatau ona amatalia ai le atinae, ia e toafia tagatanuu Samoa e faafaigaluega ai ma isi vaega uma faapena. O tulaga na i lalo o tatou Foreign Investment Certificate – ma o le taua la o le vaega lea, ina ia toe faaleleia atili ai asiasiga a le tatou Matagaluega e silasila totoa, e tele lava pisinisi sa omai talosaga mai ma ave foi i ai Certificates, o isi pisinisi o lo o faagasolo ma faagaoioi, a o isi pisinisi ia ua le tusa ai foi ma a latou fuafuaga i le taimi na omai ai ia ma le tulaga ua i ai. E faapena, o tulaga masani ia faapisinisi, e faapena le tulaga e i ai.

E pei o le tali atu lea lau Afioga i le Fofoga Fetalai, ma le faaaloalo tele.

Tofa Lealailepule Rimoni Aiafi: Lau Afioga i le Fofoga Fetalai, leai o le fesili mulimuli i lau Afioga ona o lea e le o manino mai, o le pisinisi lea o Reserve List lea e foliga foi lea e lesitala i lalo o le tagata Samoa, ona alu lea toe faaoga e ave ae faafoi e tagata mai fafo, pei o faleoloa, o fale ia.....pisinisi ia na fesili atu ai le sui usufono mo Faleata Sasae, ona o lea lesitala i lalo o le ulugalii Samoa, ona aua lea toe faa.....o i ai se pa puipui o le vaega lea, ma le faaaloalo lava.

Tofa FONOTOE NUAFESILI PIERRE LAUOFO: Ia o le mafuaaga tonu lava lena o le Teuteuga lea lau Afioga, ma le faaaloalo lava.

FOFOGA FETALAI: Ia malo.

Na faamaonia le lafo ma faitauina le Tulafono Tau Faaofi o Teuteuga o le Tulafono o Tupe Teu Faafaigaluegaina mai Fafo 2015 i lona faitauga faalua.

FOFOGA FETALAI: E tusa ai ma Tulafono Tumau o le a tuuina atu le Tulafono Tau Faaofi i le Komiti o Mataupu tau le Va i Fafo, Fefaatauaiga ma Tupe Maua mo le iloilo ina ma toe lipoti mai i le Fono Aoa o se Fonotaga o lumanai.

TULAFONO TAU FAAOFI O FAASALAGA 2015 – faitauga faalua

FOFOGA FETALAI: O lo o i ai le Tulafono Tau Faaofi o Faamatalaga Molimau 2015 faitauga faalua foi, e ogatusa Tulafono nei i le faamalamalamaga a le Matagaluega, ae lafo atu pea i lau Afioga i le Tamaitai Minisita pe e te finagalo e tuufaatasi Tulafono ia ona tasi ai lea o le faamalamalamaga, ia pe faamalamalama eseese, lafo atu pea i le tofa a lau Afioga.

Tulai mai lau Afioga i le Minisita mo Faamasinoga ma Pulega tau Faamasinoga.

Afioga Hon FIAME NAOMI MATAAFA: Faafetai lava i lau Afioga i le Fofoga Fetalai, aemaise foi lou fai silasila i se tulaga e mafai ai ona tagofia i se auala e faapea ona faasolo-gofie ai le tatou mataupu aemaise o le faitauga faalua lea o Tulafono ia ma le faamoemoe foi o faiga masani o tatou Tulafono Tumau e faasolo atu i Komiti. Ona ua aumai le faafesili po o se faatagana foi i lau Afioga e mafai ai ona tagofia faatasi ia ia Tulafono, ia lau Afioga pei e lelei le ave lua, ia ae faafoe mai e lau Afioga ia le felafolafoaiga i luga o Tulafono.

FOFOGA FETALAI: Ia o le ala lea o le tuu atu o le avanoa lau Afioga, e faigofie ai ona sagatonu leaga e aiga faatasi ia Tulafono e lua. Ae tulai mai lau Afioga i le Minisita.

Afioga Hon FIAME NAOMI MATAAFA: Lau Afioga i le Fofoga Fetalai, ou te faatuina la le lafo, *Ina ia faitauina nei le Tulafono Tau Faaofi o Faasalaga 2015 i lona faitauga faalua.*

E faapea foi lau Afioga i le Fofoga Fetalai ma le mamalu o le Palemene ona faapea foi ona faatuina le lafo, *Ina ia faitauina nei le Tulafono Tau Faaofi o Faamatalaga Molimau 2015 i lona faitauga faalua ma ou te fia tautala faamalamalama foi i ai.*

Faaluaina e le Sui Palemia, Minisita mo Galuega tau Alamanuia ma Atinae a le Malo, ma le Minisita mo Tina ma Tamaitai, Atinae o Nuu, Afioga ma Agafesootai.

Na faamaonia le lafo ma faitauina le Tulafono Tau Faaofi o Faasalaga 2015 ma le Tulafono Tau Faaofi o Faamatalaga Molimau 2015 i lona faitauga faalua.

FOFOGA FETALAI: Na mafua ona ou tuu atu le avanoa lenei mo le silafia e le tatou Maota o Tulafono Tau Faaofi nei e lua e ogatasitasi, ae o lo o i ai le avanoa o lea ou te faatonutonufolau atu i tulaga o fesili taitasi e faigofie ai le folasaga a le Tamaitai Minisita o le tulaga lena o lea sa tatou molimauina i le tatou De-Briefing na fai, sa ou avea foi le avanoa i le Faauluuluga o le Matagaluega e mafai ai ona fai lana folasaga i le tulaga o le mataupu lenei leaga e fesootai ia Tulafono Tau Faaofi nei e lua, e ui ina eseese, a o lona faitauina, a taunuu mai loa i le Maota i le tulaga auiliili ia ona faitau lea eseese, a o le faatalanoaina i tulaga o lauga faalauaitetele, ia o lea o le a tatou o i tulaga lautele, e fai lava le finagalo o le sui usufono ia po o fea e agai i ai le Tulafono Tau Faaofi e agai i ai lona finagalo, ia ona faigofie lea ona tali atu le Malo.

Tofa Lealailepule Rimoni Aiafi: Ia lau Afioga i le Fofoga Fetalai ma le faaaloalo lava, ona o lea e matau atu e fai sina tetele o Tulafono Tau Faaofi. A fai la a matou lauga e tai 40 minute la lau Afioga? O lona uiga e lauga faalua ona e lua Tulafono Tau Faaofi.....faafetai discretion.

FOFOGA FETALAI: E ia te au le faatatau, o lea lafo mai le faatuatuaga ia te au o lea o le a ou.....don't question my discretion, taatia mai pea ia te au le tatou galuega.

Tulai mai lau Afioga i le Minisita.

Afioga Hon FIAME NAOMI MATAAFA: Lau Afioga i le Fofoga Fetalai, o le a amata atu sina faamatalaga i le tatou Tulafono Tau Faaofi o Faasalaga 2015.

Lau Afioga i le Fofoga Fetalai ma le mamalu o le Palemene, aemaise o lena ua silafia foi e nisi o sui usufono sa mafai ona auai atu i le fonotaga sa faamalamalama ai ia Tulafono, o le tatou Tulafono Tau Faaofi lenei o se Tulafono Tau Faaofi fou – ma e mafai foi ona faapea, o lenei Tulafono Tau Faaofi ua tapena aemaise lava i le vaega o Faamasinoga po o le vaega o Faamasino i le faaleleia o le auaunaga faale-Faamasinoga.

Lau Afioga i le Fofoga Fetalai, o le faamoemoe o le Tulafono Tau Faaofi, o le aiaia lea o auala e mafai ai ona faasalaina po o le tagofiaina i se faiga e ese ai e le Faamasinoga i mataupu a tagata ua molia.

Lua, o le fesoasoani lea i le faamalamalamaina i tagata o le atunuu o faiga o lo o faia ai faasalaga, e ala i le tuuina atu o taiala faavae ma Tulafono o lo o faaogaina e le Faamasinoga mo le faia o faasalaga po o le tagofiaina o isi faiga e ese ai faasalaga o i latou ua molia.

O lenei Foi Tulafono Tau Faaofi ua aiaia ai se tulaga lautele atoatoa o faasalaga ma isi auala e faafoe ai mataupu a tagata ua molia ma ua faatulaga ai aia a tagata ua aafia i le solitulafono.

Lau Afioga i le Fofoga Fetalai, e mafai foi ona tatou faapea o le tele o taimi, o se misitelio lilo gaoioiga a le Faamasinoga i le faagasologa o mataupu e oo atu i luma o le Faamasinoga, aemaise mo le lautele o le atunuu. Ma o le agaga lea o le Tulafono Tau Faaofi lenei, ina ia faamanino ma malamalama uma i latou o e aafia i mataupu o le Faamasinoga, aemaise faasalaga ua faatulaga i lea taimi ma lea taimi.

Ona ou oo mai ai lea i le Tulafono Tau Faaofi lona lua lau Afioga i le Fofoga Fetalai ma le mamalu o le Palemene, i le Tulafono Tau Faaofi o Faamatalaga Molimau o Faamasinoga 2015. O molimau, atonu e mafai ona tatou faapea, o le fatu lea e faia i ai saililiga ma faaiuga a le Faamasinoga, o molimau e tuuina atu i luma o le Faamasinoga. Ma o le tatou Tulafono muamua lea na tautalagia e uiga i faasalaga, o le Tulafono Tau Faaofi fou. A o le Tulafono Tau Faaofi lona lua lenei e faasino i faamatalaga molimau a le Faamasinoga, o se Tulafono Tau Faaofi lea o le a suia ai le Tulafono o Faamatalaga Molimau o le 1961. O le faamoemoe o le Tulafono Tau Faaofi, o le fesoasoani lea ina ia faamautuina le faia o faaiuga tonu o taulumaga faa-Faamasinoiga e ala i le tuuina atu o mea moni e ao ona faamautuina e ala i le faaogaina o Tulafono faafoe ma talafeagai, e faapea foi le uunaia o faiga tutusa i itu Faamasinoga ma tagata molimau, ma le puipuia mai o aiatatau o tulaga agatapuia ma isi manaoga taua o tagata lautele. E faapea foi ona alofia ai tupe faaalua e le i faamaonia ma tulaga o le faatuai ona totogi atu.

Ma le vaega aoatetele mulimuli, o le faaleleia o tulaga e avanoa ai le Tulafono Tau Faaofi o Faamatalaga Molimau ma le malamalama i le Tulafono Tau Faaofi o Faamatalaga Molimau.

Lau Afioga i le Fofoga Fetalai, o se faamatalaga puupuu lea mo ia Tulafono Tau Faaofi e lua.

FOFOGA FETALAI: Malo faafetai i lau Afioga i le Minisita. E manatu o lea e faafofoga le Maota, sa manino lava le folasaga manino a le Ofisa Sili o

Pulega o le Matagaluega ma faaalua ai ona itu taua lenei i le aoga o le Tulafono fou lenei o Faasalaga e faigofie ai i alii Faamasino ona faatulaga ma le tuuina atu o faamatalaga molimau.

Ia, o le fesili.... OI, o le a ea le mea e tuai ai ona outou tulai mai? Ia, e avatu pea le avanoa, tulai mai le sui usufono mo Faleata Sasae.

Tofa AVEAU TUALA LEPALE NIKO PALAMO: Lau Afioga i le Fofoga Fetalai, e muamua foi ona momoli le faafetai ma le faamalo i le Afioga i le Minisita aemaise foi le Matagaluega i nei Tulafono Tau Faaofi e lua. Ia, o Tulafono Tau Faaofi, e le o ni tamai Tulafono Tau Faaofi. O lea ua saunoa le Afioga i le Minisita, aemaise lava i le Tulafono Tau Faaofi o Faasalaga 2015, o se Tulafono Tau Faaofi fou. Ia, o le a faali atu pea nai ou manatu vaivai, aua e pei e foliga e malamalama ai le au loia ma le au Faamasino i le vaega lea. A o nai motugaafa a le sui usufono, pe sa faapefea la ona fai faaiuga o Faamasinoga sa i ai ae le i ai lenei Tulafono Tau Faaofi.

O le lona lua o au fesili, po o le mea ea ua fai lenei Tulafono Tau Faaofi tatou te faatonutonu atu ai alii Faamasino i le latou galuega. E sao na faamalamalama le Tulafono Tau Faaofi lenei ina ia faafaigofie ai ona fai iuga o Faamasinoga, a o lea la ua saunoa o le Tulafono Tau Faaofi e fou. E fai la si popole o lou mafaufau po o le mea o lea ua faatulafono atu e le Palemene vaega taitasi e fua i ai le faiga o iuga a Faamasino.

A tagai i le Tulafono Tau Faaofi lenei, o lo o i ai vaega o le Tulafono Tau Faaofi lenei ua ave ai le avanoa i le tagata lea e solitulafono e fua i ai le faasalaga i le tamaoaiga, e fua i ai le faasalaga pe a fua faapea e fuafua i le malosi o lona aiga. O lona uiga la, e pei e foliga mai o le Tulafono Tau Faaofi lenei i le isi itu, o lea ua taumafai e faafaigofie le sala e ave i le tagata agasala, ona tau fuafua lea ina ia fua i le malosiaga o le tagata lea. E i ai la le mea e ono tupu mai i le vaega lea o le Tulafono Tau Faaofi.

O le vaega muamua, afai o le tagata e i ai ana tupe e mafai ona ia totogiina le sala lea, o lea la o le a alu i le isi vaega lea. O lea la e fai mai le Tulafono Tau Faaofi, afai e vaavaai atu le Tulafono Tau Faaofi e le lava le tamaoaiga o le tagata lea e totogi ai le sala lea e taumafai e fai, pe afai foi e faasala i le tupe e ono aafia ai lona aiga, ona ave lea i ai o se isi faasalaga. O lona uiga la, e ave loa i ai e faafalepuipui. Ae a alu atu le tagata e vaai atu le Faamasinoga i lalo o le vaega lea o le tagata e mafai ona totogi lana aitalafu i le vaega lea o salatupe, e le afaina ai lona aiga, ona salatupe lea ae le avea i le falepuipui.

O le vaega la lea o le Tulafono Tau Faaofi o lea e sau i lalo i i, e pei e foliga mai i lou manatu, e pei ua tau le fetui ai le mea lea e avatu i luga o le Tulafono Tau Faaofi.

O le isi vaega o le Tulafono tau Faaofi, o lea ua ou vaai atu i i, ua sau ai le faasalaga lea, Community Detention Services mea foi nei e ave e faatino i nuu. O lou popolega i le vaega lea, e pei o se mea fou. Tailo i ai, faasao mai au lau Afioga i le Minisita aemaise o... o le a le mea ua ala ai ona faatino lea vaega o le Tulafono Tau Faaofi e ave ai tagata ia e fai ai faasalaga e mafai ona faatino i totonu o nuu? E moni e i ai aiaiga, e tele foi isi aiaiga ia e i i o lea ua faamalosi ai le vaega lea o le ave o le tagata i le probation officer. E manaia le Tulafono Tau Faaofi o lea e pei ua link ai le Tulafono Tau Faaofi agai i le tagata lea e solitulafono.

O le isi vaega ou te fia fesili ai i le Afioga i le Minisita, po ua tagai la le Tulafono Tau Faaofi i le vaega foi lea, o lea ou te tau faavasega po o fea le

Crimes Bill lea na tatou pasia nei, aua o le Tulafono lena, o la e ua i ai uma faasalaga e faatino ai sau soligatulafono. O lae ua i ai i luga o le Tulafono lea. A o lea la ua aumai nei le isi vaega lea o le Tulafono Tau Faaofi o Faasalaga, e pei la ua feteenai ma le vaega lea e fua i ai le vaega lea.

O le fesili lau Afioga i le Minisita, po ua i ai i totonu o le Tulafono Tau Faaofi lenei se vaega foi lea o le mea lea e tupu nei, a faapea o au e i ai sau aitalafu, se mea foi lea o lea ou te nofosala ai i se isi tagata, ona alu lea o le tagata lea molia au i le Faamasinoga, ona ou falepuipui lea po o le lima tausaga po o le tolu tausaga, po o le tasi foi le tausaga pe ono masina foi, pe ua tele tele lau faatusa, ae ou te toe sau lava toe totogi le aitalafu lea. Aua i lau vaai i ai i i, a gaioi e le tagata, faasala oe i le gaioi po o se isi vaega i se meatotino, ave oe i le falepuipui, magalo lau gaioi. Afai foi e te faia se isi soligatulafono, e magalo ai i i, a o le vaega lea o le Tulafono Tau Faaofi, o lea ua ave oe e loka ona ua alu le tagata lea e ona le aitalafu ave oe ua e solitulafono, ae uma e toe sau lava toe totogi. O lona uiga afai foi e le mafai, e toe loka foi oe.

O le uiga o lou manatu lau Afioga i le Fofoga Fetala, pe le mafai ona toe tilotilo i se isi vaega e aua ai ne i ave tagata nei e loka i le falepuipui, ae ave se isi vaega e taumafai e totogi ai le aitalafu, fai se isi vaega. Ou te le o faatonuina atu le Afioga i le Minisita aemaise o le Faamasinoga, a o sou manatu vaivai, e fua i le faasalaga toe totogi. O le vaega lena.

O le isi vaega o le Tulafono Tau Faaofi lau Afioga ou te fia talanoa ai i le vaega lea o le faasalaga, o le vaega lea o alo ma fanau foi nei e i lalo ifo o le 18 tausaga, aemaise foi la le vaega lea e faapea o lea e faasauaina i totonu o aiga. O le a se vaega ua i ai le vaega lea o le Samoa Victim Support e fua agai i faaiuga a le Faamasinoga? O le a se vaega e fuafua i ai le faatinoina o le vaega lea? Po o i ai se malosiaga o le Faamasinoga e mafai ai ona tagai i alo ma fanau o lo o i le Victim Support ma vaega faapea ina ia mafai ai. Po o i ai foi se vaega o i lalo i i o faapea mai o o le probation officer, tagata ia e o e vaavaai tagata ia pe a faapea e le o falepuipui. Po o i ai foi avanoa o se tagata faapea i lalo o le Tulafono e mafai ona faia le tiute lea ina ia maua ai faamaumauga.

Ou te faafetai foi i lea foi mamalu o le atunuu o lo o faatinoina lea vaega e fesoasoani i tagata nei e taua o tagata sulufai, aemaise lava i fanau. Ma o lou popolega i ai i le vaega lea, po o i ai se fua a le Faamasinoga e galulue faatasi ma le vaega lea ina ia fuafua ai po o le a le alualu i luma o le olaga o tamaiti nei ina ia faatino ai le vaega lea. O lea ou te vaai atu i le Tulafono Tau Faaofi, e mafai lava ona falepuipui le tagata i lalo ifo o le 18 tausaga. E le o i ai se papuipui i i o faapea mai po o a ni ituaiga agasala e mafai ai ona faatino lea vaega.

Ae ou te faafetai i le paia ma le mamalu o le Matagaluega aemaise le Afioga i le Minisita i le Tulafono Tau Faaofi lenei. Aua o le Tulafono Tau Faaofi lenei, e pei e foliga mai o se guideline, e te soli loa le Tulafono, e tilotilo loa i le Tulafono, o fea o i lea na ou solia ai le Tulafono. E te tilotilo atu i ai ae fai mai le Tulafono, a i ai ni au molimau e mafai ona tu i luga i le taimi e lau ai le iuga ona tu lea i luga e molimau ia oe, ae a i ai nisi mea e mafai ai... i lalo o le Tulafono. E tusa o lea ua tau mai ia oe le mea le mea e mafai ai ona faamama lau galuega, faamama lau sala, lea ua sau i lalo o criterias ia. O le mea lena e ala ai ona ou popole, po o le a se leo o Faamasino i lenei vaega, aua o lea e foliga mai e fou. E i ai lava lou manatu na o au, sa le tataua ona

faatulafono faaiuga a le Faamasinoga. O mea nei o independent iuga, e faatino lava e le Faamasino i luga o le aoaoga, Faamasino uma lava sa aoaolatou i le ituaiga sala, ma le mea e patino i ai le sala. O lea foi ua fai le Crimes Bill lea, tuu atu i ai e tatou, a e faia le galuega lea, o le aofai lea o tausaga e te sala ai, ona fuafua lea i ai i le vaega lena.

Lau Afioga i le Fofoga Fetalai, masalo o le...

FOFOGA FETALAI: Se i tuu atu le avanoa i le faauilavae a le Afioga i le Palemia.

Susuga Hon Tuilaepa Fatialofa Auelua Lupesoliai Neioti Aiono Sailele Malielegaoui: Lau Afioga i le Fofoga Fetalai, se i toe silasila ane lava i le uumi o lauga i mea tau Tulafono, e pei lava ua tele ina tatou soli Fono i le tulaga o saunoaga i le Tulafono Tau Faaofi o talanoaina nei.

FOFOGA FETALAI: Ia, o lo o ave pea le avanoa i le tatou tulaga masani, a o lea ua... Ua maea le saunoaga a le sui usufono? Lealailepule tulai mai.

Tofa AVEAU TUALA LEPALE NIKO PALAMO: Lau Afioga i le Fofoga Fetalai, ou te fia talanoa la i le vaega lea o le community detention lea e ave i nuu. Tasi lea vaega.

FOFOGA FETALAI: O lou avanoa faalua lea ua e tulai mai ai? Ia, e lua avanoa, o le avanoa mulimuli lea ua avatu.

Tofa AVEAU TUALA LEPALE NIKO PALAMO: Lau Afioga na ou faapea e malolo laitiiti toe avatu ai lea o manatu i le isi Tulafono Tau Faaofi. Ma lou faaaloalo lava.

FOFOGA FETALAI: Ia, faauma mai lou avanoa lona lua lea. Saunoa mai le sui usufono.

Tofa AVEAU TUALA LEPALE NIKO PALAMO: Ia, faauma atu ia i ina lau Afioga.

FOFOGA FETALAI: Tulai mai le sui usufono mamalu mo Faleata Sisifo.

Tofa LEALAILEPULE RIMONI AIAFI: Faafetai lava i lau Afioga. Leai, o lea sa talosaga mai lou uso a sui usufono pe mafai ona ou lauga muamua ona toe lauga ai lea i le isi Tulafono Tau Faaofi i lau faatagaga. Ae ui i lea, o le a avatu se manatu e tusa ai ma le Tulafono Tau Faaofi.

Faafetai i lau Afioga i le Tamaitai Minisita ma le Matagaluega, tasi lenei Matagaluega ua tele foi Tulafono Tau Faaofi fou lea ua tuuina mai. E taua le Tulafono Tau Faaofi, ma e moni le uso a sui usufono o lea ua taatia ma pasia e tatou le Crimes Act 2013, lea e sau uma ai lava soligatulafono ma ituaiga faasalaga eseese. Ae pei o sau maitau i le Tulafono Tau Faaofi lea e aumai, ua tatala ai le avanoa i Faamasino ma ave i ai ituaiga faasalaga, ua ave ai le avanoa e fetuutuunai ai i le mau avanoa i faasalaga e fai ai lana faatatau. Aua o nisi o faasalaga o la e tamau i le tausaga ma le ituaiga faasalaga. E le mafai foi la e le Faamasino ona aloese mai ai i faasalaga ia i totonu o le Tulafono Tau Faaofi. E leai se eseese o le mea lea ma le Tulafono foi lea a tatou o le

Tulafono Tau Faaofi o Faiga Palota lea sa tagofia tele e le tatou Komiti, ona o le leai o se avanoa i Faamasino e fetuutunai ai a latou faaiuga. E tasi lava le faaiuga la e i ai, o le faaleaogaina o le nofoa. Maumau la pe ana lavea ai i mea ia, i faasalaga ia, aua o le mea lea e i ai, e tutusa lava le ave o le \$10 i le tagata, foi lea o la e sau lava ia i sona pasese i le mea masani, ma le \$1000 pe \$2000. O tulaga uma faapena, o mea sa le tatau i lou talitonuga ona faia ai se faasalaga i le aveesega o se nofoa. Peitai, e leai se isi avanoa i le Faamasino e leai se isi faasalaga i lalo ifo o le aveeseina o le nofoa. Ae o le avanoa lea ua aumai i le Tulafono Tau Faaofi lea, aemaise lava i le mea lea o nai tagata foi nei e ono totogi tupe a latou soligatulafono, e i ai le avanoa lea e mafai ai ona tuli lau faasalaga i se nofoaga i tua po o totonu foi o lou aiga. Ou te le i faitau tele i ai po o a, ae manatu foi i atunuu i fafo e i ai lau wrist foi lea e tuu i lou vae, le electronic band foi lea e ii loa faapea, na o le 100 mita lava e te fealuai ai i lou fale ma lou fanua, e te ova loa i tua ii pa le mea, a. O le mea la lena e sefe ai foi le tupe a le Malo, toe sefe ai foi nei tagata. O le toatele o tagata nei, e omai mo offences, mea foi nei e tai tasi tailua masina, e o atu la i Tafaigata o lelei, ae toe foi mai ua matua tele lava le faaletonu i uta.

E fia oo foi sau faamatalaga i le vaega lea i Tafaigata lau Afioga i le Minisita ma le Matagaluega, e tele lava le faaletonu o le falepuipui lea ua i ai.

FOFOGA FETALAI: Ou te fautuaina le sui usufono, agai i le tatou Tulafono Tau Faaofi.

Tofa LEALAILEPULE RIMONI AIAFI: Ia, lelei. Aua o mea uma lava nei e aafia i le mea lea, o tagata ia e o atu i uta, ae le afaina, atonu o lo o taumafai pea i le vaega lea. Po ua lavea ai foi la i le Tulafono Tau Faaofi lea e faaaogaina ai mea nei o ifoga faa-Samoa ma mea e teuteu i tua, aemaise la pe a faapea ua toe totogi lau tupe. Afai o lau tupe na gaioi pe aitalafu, e toe sau le tagata faatoese ma toe totogi mai, aua e moni lava o la e ua ave i le Tulafono, ae ou te talitonu o lea e nafai ona toe fetuutuunai i i faasalaga o vaega nei.

O le isi mea lea ua alu i ai lou mafaufau lea e faataua e le Tulafono Tau Faaofi, o le ave lea o le faamamafa i nai victims, tagata foi nei lea e aafia i le Tulafono, lea ua aumai i i, leaga e pei o le tele o taimi tatou te liliu i tagata solitulafono, nai tagata ia ua aafia. O le a se galuega alofa e toe fai i ai, o le a se mea e toe tau ai lo latou tiga, o le a se mea e toe faaleleia ai se mea ua faaletonu. Ae faafetai la o lea e maua o lea e maua foi i totonu o le tatou Tulafono Tau Faaofi lena.

O le isi vaega lau Afioga, e aoga le mea lea o le a ou faamatala atua mo le silafia, na ou alu ou mafaufau i ai i le Aso o Tama. Na ma omai ma lou toalua i le afiafi ma lau fanau, faapea mai, “o le a se tatou mea e fai i le aso o tama?” Ou fai atu, “pule outou”. Fai mai loa, “tatou o tatou tifaga.” Matou omai loa ma lou toalua ma lou atalii ma te o e piki mai lou toalua i le falemai. E faatimutimu la, sau lava le ma taavale ia Hans Keil, ou te vaai mamao atu lava, o la e tuli atu lava e le tamaloa lona toalua ae o la e ua tutu taavale ua mumu moli. Alu atu lava si fafine tatala le faitotoa o le taxi oso i totonu ua fia ola, ae ua le mafai ona alu le taxi o la e mumu moli, toe maua atu lava e le tamaloa. Ia, ua fiu, ou te vaai atu lava o finau, ia ola loa moli meamata ou faapea, talosia ae oso le taxi ae tiai ai i fafo le alii lea. Matou o loa, oso loa lau taavale oso mai ma le taxi. Ou te tilotilo atu loa i le faata ae pau loa i fafo le fafine. Na ona pau lava i fafo o le fafine tau ai loa ma le kiki, vaeane lava a

le tagata lea i luga o le aualata i le timu i le moa o le auala. Ua ou taumafai la e toe liliu mai lau taavale, a o le pisi la o taavale feoai, na maua loa le avanoa ou toe liliu mai loa. Ou te sau, o tu ai le taavale a si fafine ma si ona toalua pei se papalagi ua oso i fafo, ae le taitai ona popole ai le tagata, a. Sau loa ma lau taavale. O le mea e faafetai ai, o le tilotilo mai i lau taavale, alu loa ma le tuli foi lele. Aua na ou sau lava ou te... E tele le faaletonu, ua taufai feosofi i tua foi lea, a o le timu. Na ona ou oso lava i fafo tatala le faitotoa ae oso mai i totonu si fafine, “fia ola,” a ua tamoe le tagata lea ina ua ou tu atu, pei o lea ua sau le Rock foi lea, ae taofiofi mai la e le isi aualii lena. Ia e faasaga mai loa, oi, ia ua aoga mea foi nei ou te fusu ai i uta, na ona paka lava pasasa loa i lalo. Ioe, ou uuina mai, aumai. O le mea la e fai ai lau tala, ua liliu mai le taavale ua oso ou tago atu lava kaka mai i totonu o lau taavale, toe oso i fafo ua fefe le alii. Ma omai loa ave i le fale o leoleo. E faafetai foi i nai leoleo. Ou fai atu loa, “Ave le teine i le falemai ma o e sue mai lona toalua e loka.” A o le uiga la o lau faamatalaga, ana i ai se mea e tupu i le tagata lea, o le a la le mea e tupu ia ita lenei e alu atu e taumafai le galuega lelei aua ua alu i luga o le facebook faapea ua fasi e Leala le tagata i le auala, ae le o malamalama tagata i le mea na tupu, ua le oo ai ma le matou tifaga ma lou toalua ma lau fanau, ua spoil atoa ai le matou Fathers Day. But anyway, e aoga ai o faafofoga mai. Aua o le mea ou te alofa ai, ou fai atu, “o fea e te sau ai?” Fai mai, “ou te sau mai Fusi Safata.” Ou fai atu, “o a au mea e fai i i?” Fai mai, “ou te nofo i le tamaitiiti Taufusi.” Faafetai.

A o le mea la lea ua tatou toe oo mai i le Tulafono Tau Faaofi i Soligatulafono ma Faasalaga, e tele le aoga, aua o lea ua avatu le avanoa i le Faamasino e fetuutuunai ai le faiga o faasalaga, aemaise la lea i nai tagata, aua tatou te naunau e ave i le falepuipui. O tagata ia ua tataua ona ave i le toese ave, a o tagata e tataua ona ave se faasalaga e tuli ai i tua i lona aiga ma tuli ai se tagata lelei e alu atu e aoai, aemaise la mea ia mai fafo pei o mea ia electronic e tuu i ai ina ia loka ai ma iloa ai. Aua o le isi tagata e fai loa le mea lena i le lima, e le toe fealuai loa aua e laalaa atu i le auala e ula i ai tagata. Ua iloa foi tatou i Samoa e ma loa nofo i le fale i le aso atoa ia ona lelei lava lea atonu e sui ai lana amio.

Ia, o lea o le a amata atu lau lauga i le isi Tulafono Tau Faaofi pe a tusa ai ma lou finagalo i le Tulafono Tau Faaofi o Molimau.

FOFOGA FETALAI: Ia, saunoa.

Tofa LEALAILEPULE RIMONI AIAFI: Ia, o le a faia ia se malologa faafetai lava.

FOFOGA FETALAI: Ou te taofi o lea lava ou te faalogologo atu i nisi o fesili ia ua toe tuuina mai, ua maea ona manino le faamalamalama a le Ofisa Sili o Pulega o le Matagaluega. Na matua malamalama le faamalamalama a le Ofisa Sili o Pulega i mea uma lava ia tou te atugalua i ai. O le Tulafono Tau faaofi lenei, e le faapea ua tatou fetagofi faatonu le Faamasino. Na fotuai mai Tulafono Tau Faaofi nei ona o talosaga a le Matagaluega e tataua ona fai se taiala e faafaigofie ai le faatonutonuina o faasalaga i mea tutupu, ave le discretions i le Faamasinoga ma Faamasino. E faapena foi le soalaupulega i le va o faamatalaga molimau. O le tele ia o le itu o le faamamafa a le Ofisa Sili o Pulega. O i e maua ai le toomaga a Afioga i

alii Faamaisno latou te mafai ai ona faafaigofie faaiuga. O nisi Faamasinoga e alu alu lava faapea mai le Faamasino, o le a malolo le Faamasinoga mo se lua minute, ae se i toe alu le Faamasino e toe tilotilo po o fea e tatau ona faataatia ai le alafua i faaiuga o le a fai. Ou te manatu la tailo i ai, ae o lau maitau ia te au na taitaia le tatou De-briefing, it was cleared i le faamalamalama a le Ofisa Sili o Pulega.

E ui i lea, o le a avatu pea le avanoa i lau Afioga i le Tamaitai Minisita a o lea ua ou faamanatu atu i sui usufono sa saunoa.

Afioga Hon FIAME NAOMI MATAAFA: Faafetai lava i lau Afioga i le Fofoga Fetalai. E pei ua tele foi le fesoasoani mai a lau Afioga i le tali o mataupu na laga e Afioga i sui usufono, ailoga i se a o le a umi ai foi sau faamatalaga. Ae pei lava o le tulaga masani o felafolafoaiga i luga o le faitauga faalua, tatou te vaavaai i tulaga aoatetele o faiga faava. Ma o le tele o nisi o fesili o lo o laga mai e Afioga i sui usufono, e pei o fesili ia e fetai ma le taimi foi lea e fai ai le tatou auililiga, e fesoasoani mai foi le Taitaifono o le Komiti e faapupula atili a tatou mataupu.

Atonu, aua e pei o lea na agai saunoaga i le Tulafono Tau Faaofi o Faasalaga lea na saunoa i ai sui usufono ia e toalua. O le mea moni lava, o lea lava na toe tali lava le Afioga i le sui usufono mo Faleata Sasae i ana fesili, ae toe foi mai lava i le faapea mai e pei e foliga mai o ni taiala. Ma o le agaga lava lena o le Tulafono Tau Faaofi lena, o ni taiala e fesootai ai le Faigamalo i le vaega o le Pulega ma le vaega foi o Faamasinoga, aua o lea lava tatou te manino e tumaoti lava vaega ia o tatou Faigamalo. A o fea le auala tatou te fesootai ai? Tatou te fesootai i luga o Tulafono aemaise faiga faavae a le Faigamalo i lea taimi ma lea taimi. Atonu foi sa faamalamalama e le sui o le Matagaluega, o nei Tulafono uma e fai, e faatalatalanoa lava i le va o le Matagaluega ma le Vasega o Faamasino, ae le o se mea e faapea e tulai lava le Matagaluega po o le vaega o Pulega fau se Tulafono ae le tapa se finagalo o alii ma tamaitai o le Faamasinoga.

O le itu lena o le avea o taiala e faatupu ai le mea foi lea o le manino, transparency, e tofu malamalama uma ai le itu o le faamasinoga ma i latou o e o lo o molia, aemaise a latou aiatau faaletulafono. Atonu e taua le fesili a le sui usufono mo Faleata Sasae e faapea, pe ona o le Tulafono Tau Faaofi lena o le Tulafono fou, pe sa faapefea la ona fai muamua isi faaiuga a le Faamasinoga.

Lau Afioga i le Fofoga Fetalai ma le mamalu o le Palemene, o faiga masani lava sa sau ai le Faamasinoga, e faavae ana faaiuga i luga o faaiuga na fai muamua i luga o isi foi mataupu e tai pei o mataupu ua molia ai tagata ma fai ai a latou faasalaga i le faagasolosolo atu.

Na o le pau le itu lautele lau Afioga, ona o lea ua fesiligia le tuufaafegai o Tulafono o Soligatulafono ma le Tulafono lea o Faasalaga, atonu lava o lea e manino. O le tatou Tulafono o Soligatulafono ua maea ona pasia i le Maota, o lo o faatulaga mai ai faasalaga. Ae ou te toe foi atu lava i le auga ma le faamoemoe o le Tulafono Tau Faaofi lea, o le Tulafono Tau Faaofi lea o Faasalaga, o lea e faatulaga mai ai le ala o mea ma faavae e faia ai faaiuga ma faasalaga talafeagai.

Lau Afioga i le Fofoga Fetalai, ona ua taua le faasalaga i a tatou faiga palota i le tutusa o le faasalaga i le faatosina i le \$2 ma le \$1,000. Lau Afioga i le Fofoga Fetalai, e le o le tele o le tupe e auga i ai le faasalaga lena. O le auga o

le faasalaga lena o le faatosina, o le faatosina. Ae le faapea la o le faatosina laitiiti ma le faatosina tele, o le faatosina lava o le faatosina. Ma o le soligatulafono.

Lau Afioga atonu o itu tetele ia ma itu aoatetele i faiga faavae ma fua o lo o faataatia ai a tatou Tulafono aemaise o le Tulafono Tau Faaofi o Faasalaga 2015 lea sa autu mai ai saunoaga a sui usufono.

FOFOGA FETALAI: Malie lau Afioga i le Tamaitai Minisita, tulai mai le sui usufono mamalu.

Tofa LEALAILPULE RIMONI AIAFI: Lau Afioga i le Fofoga Fetalai, e taua tele le vaega lea lau Afioga i le Tamaitai Minisita, ae le i lotea i le Tulafono Tau Faaofi lena ua aumai e tatau ona toe tagatagai i ai ae review. O faasalaga nei e faasala ai i tatou nei o sui usufono, ua pei o ni faasalaga o ni tagata ua sili ai i lo tagata fasioti tagata ma isi tagata solitulafono mamafa. O le uiga o lau tala, ou te le o fai atu i ni faatosina \$10.00 ma le \$1,000, o lea tatou te iloa lelei lava le faatosina ma tulaga faapena. Ae manatua foi o nai isi sui usufono foi nei na o e asi mai i le falemai, ae manatua foi o le taimi lena a lua fetai ma se tagata e te i lava ua fai mai i se pasese \$10.00. Ia lena lava \$10.00 ma le tausaga atoa ma le 5 tausaga e te galue ai ma e tautua ae pau ai lou tofi? Ou te talitonu o lae foi e silafia e Faamasino, aemaise lava o le mea lea, o fea e draw ai le laina? O fea e tusi ai le laina o le aganuu, tu ma le agaifanua ma le bribery ma le treating? E leai foi se tulaga faapena o i ai i totonu o faasalaga ma aiaiga aua o mea na e tatau ona tagai i ai Faamasino. O le mea lena e tatau ona ave ai se avanoa. Ou te talitonu o la e manao Faamasino e fai a o le leai o se avanoa e fai ai, e tasi lava le mea la e fai i ai o le aveese o le Nofoa. O le mea e fai aua o lea e faatalatalanoa ma Matagaluega, o le mea lena e aoga ai a tatou Komiti foi nei e fai ae le o faaogaina nai fautuaga. Ae faafetai o le isi mea manaia lea ua sau ma faamanino mai aua na aveese i le Ordinance Act, le Crime lea na aumai nei, le mea foi lea o le discharge without conviction, o lea ua manaia o lea ua faapepa mai i i, ina ne i te i ua toe molia se isi sui usufono pe a toe fai le palota ae faaoga ai loa le discharge without conviction.

Ma le faaalalo lava faafetai.

FOFOGA FETALAI: O lea ua faai mai le saunoaga a le Afioga i le Tamaitai Minisita mo Faamasinoga ma Pulega tau Faamasinoga.

Na faamaonia le lafo ma faitauina le Tulafono Tau Faaofi o Faasalaga 2015 ma le Tulafono Tau Faaofi o Faamatalaga Molimau 2015 i lona faitauga faalua.

FOFOGA FETALAI: E tusa ai ma le Tulafono Tumau, o le a tuuina atu nei Tulafono Tau Faaofi e lua, Tulafono Tau Faaofi o Faasalaga 2015 ma le Tulafono Tau Faaofi o Faamatalaga Molimau 2015 i le Komiti o Tupe Maua ma Tupe Totogi mo le iloilo ma toe lipoti mai ai i le Fono Aoao i se Fonotaga o lumanai.

TULAFONO TAU FAAOFI O LE PULEGA O FAIGA FAIVA 2015
- faitauga faalua

FOFOGA FETALAI: Tulai mai lau Afioga i le Minisita mo Faatoaga ma Faiga Faiva.

Afioga Hon LE MAMEA LEMALU SU'A LEATUAVAO TUILLETUFUGA ROPATI MUALIA (Minisita mo Faatoaga ma Faiga Faiva): Lau Afioga i le Fofoga Fetalai ma le paia o le Maota, ou te tulai atu e faatu le lafo, *Ina ia faitauina nei le Tulafono Tau Faaofi o le Pulega o Faiga Faiva 2015 i lona faitauga faalua ma ou te fia tautala faamalamalama i ai.*

Faaluaina e le Minisita mo Tina ma Tamaitai, Atinae o Nuu, Afioga ma Agafesootai ma le Minisita mo le Soifua Maloloina.

FOFOGA FETALAI: Tulai mai lau Afioga i le Minisita e saunoa.

Afioga Hon LE MAMEA LEMALU SU'A LEATUAVAO TUILLETUFUGA ROPATI MUALIA: Lau Afioga ma le mamalu o le Maota, o lenei Tulafono Tau Faaofi o le Pulega o Faiga Faiva 2015, o le a sui ai le Tulafono Autu o Faiga Faiva o le 1988. O lo o faataoto i lenei Tulafono Tau Faaofi vaega autu ma le taua e taiala ai le pulea tatau ma le faasaoina o punaoa o le gataifale aemaise o le faatonutonuina lelei o atinae tau faiga faiva i gataifale o Samoa. O faiga faavae po o policy rationale, o lo o i totonu o le Tulafono Autu o Faiga Faiva 1988, e le o suia a o lo o tumau pea i totonu o le Tulafono Tau Faaofi lenei.

I se isi itu, o le Tulafono Tau Faaofi o lo o ua saga faamalasia, faamanino ma faafaigofie ai le gagana i faiga faaonaponei i mataupu tau puleaina ma le atiaeina tatau o faiga faiva ma punaoa o Samoa. O le iloiloaina o le Tulafono o Faiga Faiva 1988, sa faatinoina ina ua maea ona sainia e Samoa le maliega tau faiga faiva i le faasaoina ma le puipuia o i'a feoai mamao i ogasami sisifo tutotonu o le Vasa Pasefika, ina ia ogatasi lenei iloiloaga ma manoaga ina ia faamalasia le pulea tatau ma le faatonutonuina o atinae e afua mai i faiga faiva i ogasami loloto, o aloalo ma auu o Samoa.

O lenei foi Tulafono Tau Faaofi, sa tuufaatasia ina ua maea le tele o faatalatalanoaga ma paaga eseese e i ai lo latou sootaga ma punaoa o le gataifale ma faiga faiva e pei o le au tautai, Matagaluega eseese o le Malo e aofia ai, Faalapotopotoga faaitulagi ma faale-Malo faatasi ai ma afioaga. Sa maua ni fesoasoani tau tomai faapitoa mai le Tulafono Tau Faaofi lenei mai le FFA po o le Forum Fisheries Agency ma le SPC e ala i Loia ma tagata faufautua faapitoa faapea foi Loia o le Ofisa o le Loia Sili.

O tiute ia ma suiga anoa ua faia e ala lea i le moomia o le faatulafonoina o le matafaioi a Samoa i le maliega faava o Malo ma faaitulagi ua osifeagaiga ai, o le faamaonia lea o le malosiaga faale-Tulafono a le Matagaluega i le faatinoga o ona tiute i le faia o Tulafono Faatonutonu - Fisheries Regulations ma malosi faale-tulafono o taiala mo le pulea lelei ma le atinae tatau o faiga faiva ua aliae mai - Legal Force of Fisheries Management Bill ma malosi faaetutulafono o le faatinoga o matafaioi a Samoa e ala i maliega tau faiga faiva faava o Malo ma faaitulagi.

O le Tulafono Tau Faaofi foi leni o lo o ua puipuia ma faamauina ma faamalosia vaega atu o lo o i totonu o le Tulafono o Faiga Faiva 1988. O nei vaega atu e aofia ai le pulea ma le puipuia lelei o punaoa o faiga faiva o Samoa mai le soona fagotaina ma ia ogatasi ma faiga faiva faavae, puipuiga o faiga faiva faava o Malo ma le atinae tatau o faiga faiva ina ia maua pea e tagata Samoa penefiti e aupito sili mo lona punaoa ina ia maua pea le i'a aua le fofoga taumafa ma le soifua maloloina o nai o tatou tagata.

Lau Afioga i le Fofoga Fetalai, ou te talitonu o lena ua maea ona tuuina atu foi i le Tulafono Tau Faaofi le faamalamalamaga o mataupu po o vaega taitasi o le Tulafono Tau Faaofi. E le gata foi i lea sa faia foi semina ma talanoaina ai leni Tulafono Tau Faaofi. Ou te talitonu ua vela foi le fala i leni afiafi ma ua alofa tele atu.

Ma le faaaloalo lau Afioga i le Fofoga Fetalai, ae tuu mai loa le Fesili, ina ia faasee atu leni Tulafono Tau Faaofi i le Komiti mo le iloiloaina ma toe lipoti mai i le Fono Aoao i le Fonotaga o Oketopa.

O le soso atu lea ma le agaga faaaloalo. Ia manuia le afiafi. Faafetai.

FOFOGA FETALAI: E tou le logosaia le talosaga a le Minisita?

Tofa Lealailepule Rimoni Aiafi: Lau Afioga i le Fofoga Fetalai ua ou tulai atu ma le faaaloalo ou te faaluaina le lafo a le Afioga i le Minisita, ina ia tuuina atu nei le Tulafono Tau Faaofi i le Komiti mo le iloiloaina.

Faafetai.

FOFOGA FETALAI: Malo, e manatu e le o ni ai e avea o lea e see i le Komiti e maua ai foi lo outou avanoa.

Na faamaonia le lafo ma faitauina le Tulafono Tau Faaofi o le Pulega o Faiga Faiva 2015 i lona faitauga faalua.

FOFOGA FETALAI: E tusa ai ma Tulafono Tumau, o le a tuuina atu le Tulafono Tau Faaofi i le Komiti o Oloa Gaosia Tulaga Muamua, Mataupu Tau Pisinisi, Alamanuia ma Leipa mo le iloiloaina ma toe lipoti mai i le Fono Aoao i le Fonotaga o lumanai nei.

Ia, o le tofa la lena o lo o manaomia i le taimi leni i le vaega o le po lea ua tatou i ai. E leai lava se mea e tuua ai, ae tatou faafaigofie le tatou galuega o lea ua manino le folasaga o le tatou De-briefing aemaise foi o saunoaga a sui usufono. Ae lafo atu o lo o lava lava le malosi e faagasolo ai le tatou Galuega.

**TULAFONO TAU FAAOFI O TEUTEUGA O LE TULAFONO O
ELEELE, FUAGAFANUA MA LE SIOSIOMAGA 2015
- faitauga faalua**

Tofa Hon FAAMOETAU LOA LEALAI AULOTO ULAITINO FAALE TUMAALII (Minisita mo Punaoa Faanatura ma le Siosiomaga): Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Eleele, Fuagafanua ma le Siosiomaga 2015 i lona faitauga faalua ma ou te fia tautala faamalamalama i ai.*

Faaluaina e le Minisita mo Galuega, Felauaiga ma Atinae Eseese, Minisita mo le Soifua Maloloina ma le Minisita mo Leoleo ma Falepuipui.

FOFOGA FETALAI: Tulai mai lau Afioga i le Minisita e saunao.

Tofa Hon FAAMOETAULOA LEALAI AULOTO ULAITINO FAALE TUMAALII: Lau Afioga i le Fofoga Fetalai, o leni Tulafono Tau Faaofi o Teuteuga o le Tulafono Autu o Eleele, Fuagafanua ma le Siosiomaga i le 1989. O nei Teuteuga e moomia tele ina ia faamalosia ai le usitaia o le Tulafono e puipuia ai le siosiomaga ma se tasi foi o mafuaaga, ina ia ogatasi teuteuga nei ma faiga faavae a le Malo. O teuteuga o lo o aumai i leni Tulafono Tau Faaofi, o lea ua tofia ai LTA traffic officers e avea ma authorised officers e faamalosia le Tulafono Tau Faaofi, aua lava le puipuiga o le siosiomaga i tulaga o le faaotaota i nofoaga faitetele, public places faapea foi ma nofoaga faasao.

E le gata foi i lea o lo o i ai suiga laiti lava o upu ina ia ua sui mai ai upu ia o le conservation officers po o le Tagata Ofisa o le Faasao, i le Authorised Officer po o le tagata Ofisa galue e i ai le LTA officers.

O le isi suiga o upu ia e i ai o lea e sui mai upu o lo o i ai i le Tulafono Tau Faaofi, o le Sui Pule Sili aua ua le o toe i ai ni Deputy CEOs a o lea ua sui i le Pule Sili Lagolago, Assistance CEO. E pei ona pau lea o nai teuteuga laiti o lo o aumai i totonu o leni Tulafono Tau Faaofi.

Ma lou faaloalo lava.

FOFOGA FETALAI: Malo faafetai i lau Afioga i le Minisita, o tulaga masani lava - tulai mai sui usufono mamalu pe afai o i ai se isi o fia saunao.

Tulai mai le sui usufono mo Faleata Sisifo.

Tofa LEALAI LEPULE RIMONI AIAFI: Faafetai lava i lau Afioga, e taua le Tulafono Tau Faaofi. Ona pau lava le mea ou te fia fesili atu ai i lau Afioga i le Minisita o le sootaga lea ma le LTA. E manatua foi o le LTA e faapitoa lava la latou matafaioi o le vaavaaiga o taavale afi ma tagata e feoai i le auala. Po o i ai la se malosiaga po o se tomai, aua o lona uiga o i latou e i ai le malosiaga e faaoga ai e le Matagaluega e faia lea vaega. Ae po o i lalo la - aua e tatau foi ona tilotilo i le Tulafono i le LTA ma a latou galuega fai, po o gafatia e i latou nei tiute faaopoopo aemaise o i latou ia e pei a o le vaavaiga o taavale, ae seia vagana o ni lapisi foi nei e pau mai luga o le auala po o le faaotaota i luga o le auala. Afai o le vaega lea e saunao i ai le Afioga i le Minisita e lelei. A o a foi la ni faasalaga? Pe mafai foi la e latou ona ave ni faasalaga i nei tagata, aua e le o i ai so latou malosiaga e faamalosia pe loka ai se isi. Po o le a tonu lava le fesootaiga e fesootai ai, e lelei foi e faaoga i le tulagao i ai, a o lo o fia manino lou nei sui usufono po o le a tonu le sootaga ma le ituaiga aoga ma le malosiaga o le a tuuina atu i le vaega lea o le au laulaututu i le auala po o le LTA?

Faafetai lava.

FOFOGA FETALAI: Malie lava lau Afioga i le Minisita se i avatu le avanoa mulimuli i le Taitai o le Itu Agai.

Afioga Hon PALUSALUE FAAPO II: E puupuu foi le fesili. O le fesili muamua lau Afioga i le Fofoga Fetalai, pe aisea ua sui ai. Po o le a le mea o i ai i le taimi lenei, ae po o ai o lo o vaaia lapisi o le auala, lapisi o - aua o le mea lea e i ai e moa loa autafa o le auala, e sao lelei, e ese le...e mama loa le auala ona aliali mai ai loa lea o le lapisi. O le tulaga lea ou te fia fesili ai po o ai la - e pei o le a toe tuu i lalo le tiute o le LTA. O le LTA lea e vaaia le auala a o lea pei o le a tuu i lalo e vaaia lapisi nei. O le mea lena ou te alofa ai i le aufaigaluega, e maualuga le mea ua i ai ae pei o le a avea ma o latou tiute le o e vaavaai lapisi. E le mafai ona faafaigaluega e outou ma la outou Matagaluega ona silasila ai i lea tulaga. E feoloolo lava Apia nei, a o le faasolo atu lea i tua ma le alu agai i le malae vaalele ma le uafu ma faasolo atu ai i ina, o le matua tele o le lapisi pe a uma ona teu autafa o le auala.

O le tasi lea tulaga e tataua ona silasila totoa i ai, o lona uiga o le a fai le poloka ma vaavaai e i latou foi o le LTA, o le tulaga e tataua ona i ai i lou lea talitonuga o le mea e i ai le tofa a le Matagaluega, ia matua vaavaai lelei nei lapisi. O le tasi lenei vaega e tilotilo i ai tagata tafafao maimoa mai fafo o tafa ala, e maea loa ona moa ua manaia le gatasi ae aliali mai loa i luga le lapisi. Ona pau lena o lou atugaluga, ma le faafesili atu i lau Afioga i le Minisita, pe le mafai na tuu ia maua ai foi ni galuega nai nisi tagata e o e vaai le mea lea. O le latou tiute topito o le autilo uma i lapisi i le motu atoa, leaga e taua le mama e pei o le me lea e uunai e le Pulega o Tagata Tafafao Asiasi mai Fafu, o le mama aemaise lava o autafa ala i le alu atu i le malae vaalele ma faasolo atu ai.

E puupuu lava se manatu e tatalo atu ai i le Minisita ina se i silasila i ai ina ia ave pea le faamuamua a le LTA i le vaaiga o o tatou auala ma le saogalemu o taavale i luga o le auala.

Ma le faaaloalo lava.

FOFOGA FETALAI: Tulai maia lau Afioga i le Minisita, e lua nai fesili nei e fia faamalalama ona faagasoslo ai lea o le tatou galuega.

Tofa Hon FAAMOETAUOLOA LEALAI AULOTO ULAITINO FAALE TUMAALII: Faafetai, ae ou te fia tali atu i le fesili muamua i le tulaga lea o le...E pei ona ou fai atu, o le teuteuga o lenei Tulafono Tau Faaofi sa faatalanoaina foi ma Matagaluega nei e aumai i totonu o le teuteuga o le Tulafono Tau Faaofi. O le faiga foi o le Tulafono Tau Faaofi, o lo o ave ai le paoa i le Ofisa nei o le LTA, latou te fesoasoani ai i le tulaga lea o le enforce iga o le Tulafono o le faasalaga i le faalapisii e pei o le alu alu lava o le taavale te i ua togi mai le plastic bag o mea faapena, ona o lea e galulue i le environment lea. O le mea lena aua sa fai e conservation officers a o lea ua sui i le authorise officers, o lona uiga o ofisa ia ina ia faaopoopo ai le faatoateleina po o le faamalalasia o le mataituina o le Tulafono Tau Faaofi ina ia lelei faatino ma ia aua nei tupu mai ai faafitauli nei e te saunoa mai ai.

E pei ona e saunoa i le - e leai e le faapea ua toe tuu mai lalo le tulaga o le LTA, o le tulaga o se siosiomaga e lelei lona tausia e tau mai ai i ina le lelei o le tamaoaiga o le atunuu ma ana galuega e fai. O le mea tonu lena o lo o taumafai i ai le Tulafono Tau Faaofi ina ia lelei ona maua se siosiomaga e puipuia ai tulaga e le gata i punaoa ma le tulaga o mea taumafa i se isi tulaga. Aua o lo o lipotia mai lava o lo o dumped lava lapisi i lea mea ma lea mea, ae

pei o le vaega lea ina i ai se vaega e i ai le paoa latou te lipotia mai ma apply ai loa le Tulafono i le faasalaina o e o lo o solia le Tulafono Tau Faaofi.

E pei o le agaga lena o Teuteuga o le Tulafono Tau Faaofi ma lou faaaloalo lava faafetai.

Na faamaonia le lafo ma faitauina le Tulafono Tau Faaofi o Teuteuga o le Tulafono o le Faamauiina o Pule o Fanua 2015 i lona faitauga faalua.

FOFOGA FETALAI: E tusa ai ma le Tulafono Tumau, o le a tuuina atu le Tulafono Tau Faaofi i le Komiti o Galuega, Felauaiga ma le Siosiomaga mo le iloiloaina ma toe lipoti mai ai i se Fonotaga o lumanai.

TULAFONO TAU FAAOFI O FAIGA FAATAUVAGA O FEFAATAUAIGA MA LE PUIPUIGA O TAGATA E FAAAOGĀINA OLOA MA AUAUNAGA 2015 - faitauga faalua

FOFOGA FETALAI: Tulai mai lau Afioga i le Sui Palemia.

Tofa Hon FONOTOE NUAFESILI PIERRE LAUOFO (Sui Palemia): Lau Afioga i le Fofoga Fetalai ua ou tulai atu ma le faaaloalo e faatu le lafo, *Ina ia faitauina nei le Tulafono Tau Faaofi o Faiga Faatauvaga o Fefaatauaiga ma le Puipuiga o Tagata e Faaaogāina Oloa ma Auaunaga 2015 i lona faitauga faalua ma ou te fia tautala faamalamalama i ai.*

Faaluaina e le Minisita mo Faamasinoga ma Pulega tau Faamasinoga ma le Minisita mo Galuega Tau Alamanuia ma Atinae a le Malo.

FOFOGA FETALAI: Tulai mai lau Afioga i le Sui Palemia e saunoa faamalamalama.

Tofa Hon FONOTOE NUAFESILI PIERRE LAUOFO: Lau Afioga i le Fofoga Fetalai, atonu o le tasi lenei Tulafono Tau Faaofi sa tele sa saunoua ai nisi o sui usufono o lenei foi Paeaiaga ua tatau ona aumai. O le Tulafono Tau Faaofi e aiaia ai le tulaga o faiga faatauvaga i le pisinisi po o Kamupani i totonu o maketi i totonu o le atunuu. O le sini autu o lenei Tulafono Tau Faaofi, ina ia uunaia faiga faatauvaga maketi i Samoa faapea foi ma le faavaeina o faiga faataatitia tau le faatinoga. O lona uiga o standards of conducts mo i latou e galulue i fefaatauaiga i totonu o le atunuu faapea foi ma le puipuia o le saogalemu ma aia o tagata e faaaogaina oloa ma auaunaga i totonu o Samoa, po o i latou ia o tagata faatau ma i latou ia e faatauina oloa po o consumers.

O lenei Tulafono Tau Faaofi e faasaina ai aga po o faiga a le aufaipisinisi e taotaomia ai pe tuutuu itiitia ai tauvaga i le va o pisinisi, ina ia maua ai pea e i latou se tulaga foi lea o le malosiaga i totonu o maketi, ina ia faapena ona taotaomia ai foi tama'i pisinisi. O le tulaga e silasila i ai lenei Tulafono Tau Faaofi o ituaiga aga foi nei e seki ai le tau o oloa i se tulaga maualuga foi lea pe lua ni kamupani ina ia tele lava se polofiti e maua e i laua pe a faapea e leai nisi kamupani po o nisi pisinisi faapena i totonu o le atunuu. O lona uiga o se tulaga foi lele ina ia faateleina ai lava sa latou tupe mama po o se tupe

faasili i le tulaga foi lea ua taugata ai lena ituaiga oloa po o auaunaga i totonu o le atunuu. Ma isi mau faiga e i ai le tulaga foi lea i le faiga o feagaiga ia na o lau kamupani lava e faatau ai ni faleoloa ae le mafai ona tatala i tua i isi foi kamupani po o isi pisinisi.

E i ai foi le vaega lea o le puipuiga o tagata faatau po o le consumer protection e faasaina ai amioga tau faasese e le au fai oloa po o kamupani. E faasaina ai amioga tau faavalea i tagata e o atu e faatau oloa ma isi aga faapena. E faasaina ai foi isi aga eseese ma le amiotonu, o lona uiga o unfair practices foi nei e fai e isi pisinisi i isi taimi ona faapena lea ona taotaomia ai i lalo le tulaga faatauva po o tauvaga i le va o pisinisi, ma taugata ai pea le tau o oloa na o lo o faaaoga e fai ai faiga a kamupani po o pisinisi i totonu o le atunuu.

O le tulaga lena i le mataituina ma le faaamalosiiina foi o lenei Tulafono Tau Faaofi. O lea ua aumai i totonu o le Tulafono Tau Faaofi ina ia faavaeina se Komisi latou te monitore ina ma silasila i faiga faavatauva nei po o competitions i le va o pisinisi ma kamupani i totonu o le atunuu. Ina ia aua nei faia ni tulaga e taotaomia ai le tulaga faatauva ma tulaga faapena e i ai le tulaga tau competitions i le va o kamupani i totonu o le atunuu.

E pei o tulaga nei lau Afioga i le Fofoga Fetalai e faamalamalama atu ai lenei Tulafono Tau Faaofi, ou te talitonu ua silafia foi e sui usufono mamalu o le Maota i polokalame a le tatou Maota nei, sa faamalamalamaina atili ai e le Matagaluega i le semina a sui usufono.

O le faamatalaga lea e tusa ai o lenei Tulafono Tau Faaofi lau Afioga i le Fofoga Fetalai. Faafetai.

FOFOGA FETALAI: Tulai mai le sui usufono mamalu.

Tofa LEALAILEPULE RIMONI AIAFI: Faafetai lava i lau Afioga i le Fofoga Fetalai mo le avanoa. E toatasi lava le Minisita e ave i ai le faaloalo a le Itu lenei na o le Minisita mo Faatoaga ma Faiga Faiva, leaga o lea ua oo i le level foi lea o le undisputed champion malolo manumalo. O le a foi la sana Tulafono e aumai ou te ifo i ai ma ou faaloalo i ai. A o isi Minisita uma ou te matua vailiila a latou Tulafono, e le tuua i ai se avanoa.

O le Tulafono Tau Faaofi lea lau Afioga i le Fofoga Fetalai, o se Tulafono Tau Faaofi matagofie tele, ae tele foi nai vaivaiga e tataua ona fai i ai se manatu. O le igoa o le Tulafono faa-Samoa, ia faapapalagi atu ia, Competition and Consumer Bill, o lona uiga o faiga faatauva. Lau Afioga, e le o po se lilo na ou sau lava i le Palemene lenei tasi lea mea sa ou tilotilo pea i ai, mea ia o le unfair competition ona maua loa lea o tatou i le mea foi lea o le alu lava o le maumea ia televave lana alu ae le tupu nai isi faipisinisi ma nai isi tagata, ona maua loa lea i le mea foi lea o le uneven distribution of wealth ua le tutusa, ona tupu ai lea o i si faafitauli. O le agaga la o le Tulafono Tau Faaofi lenei ua aumai, e taumafai foi lea e tilotilo i vaega nei. Ae i lau vaai i le Tulafono Tau Faaofi, e mataivi le Tulafono Tau Faaofi, e tilotilo iisi vaega ae faaemo le mata i isi vaega.

O le uiga o lau tala, ia manatua foi lea na matou laga le mea foi lea - wholesaler ma le retailer. E le gata i faleoloa, financial institutions ma mea uma faapena. Sa ou manatu la i le Tulafono Tau Faaofi, e address le faafitauli lea e aumai se faamaninoga mautu pe aisea ua latou talitonu ai o le mea o i ai

nei o se mea e talafeagai lea. E faaauau pea le mea lea e i ai nei, a e wholesaler ia toe fai ma au outlet retailers faifai pea oe e leai se afaina o i ai.

O lea la ua tatou vaai i ai ua le gata i wholesalers, retailers, o wholesalers tutu mai, lea tatou te vaai i ai, o wholesalers e feoi solo i taavale i tamai van, o wholesaler tutu solo i tua, ua matua tele, ae le gata i lea, a o mau faleoloa. Ua le iloa la e le aufaipisinisi laiti po o fea o le a sulu i ai. O le vaega muamua lea o lea ou te fia tautala i ai lau Afioga, po o fea tonu o le Tulafono Tau Faaofi o aumai ai se faamaninoga o le vaega lea, leaga e taua.

O le tali a le Matagaluega na aumai ina ua fesiligia fai mai, “Na fai mai le Konesale lea na faia le latou Lipoti o lea e lelei le mea lea i ai e taugofie ai le tau o le soifuaga i Samoa.” Ia, e matua lagona lava lou faanoanoa aua e mautinoa lava e le o se Konesale Samoa le tagata lea, e le o i ai foi ni ana faamaumauga e tau mai ai ia tatou o ana faamatalaga ia e fai e moni. E faapefea ona taugofie le soifuaga pe afai e aumai e oe le taga araisa toe pule oe i le faasoasoina o le taga araisa. If you have control of supply, you also have, e ia te oe foi le malosiaga e tuu ai le tau i luga o le mea lea. E i ai le vaega o le Tulafono Tau Faaofi lea e sau ai lea e i ai le control i luga o le mea e te aumaia i totonu. O lea foi e faataga i lalo o le mea lea ma mea o feagaiga foi nei tuusao, mea o vertical agreement exemptions. O lona uiga, afai lava o lau kamupani lea e aumai ai mea ia, e mafai lava ona faataga e aumai pea. O faiga pisinisi faapena e tatou te tilotilo foi tatou i tulaga ia. A o mea ia e fia maua ai le malamalamaga e muamua lava i le vaega lea. Ia manatua o lea e i ai le tatou Fair Trading Act o lona foi e address ai i ina le price control o lona e tuu ai i ina le Price Control Board latou te fuaina le tau o mea ma tilotilo i ai i le quality o mea. Lea foi faatoa uma atu nei le tatou Food Bill e tilotilo foi iisi vaega.

O lea la ua aumai nei le mea lea faatauvaga, o le mea e aupito sili ona faanoanoa ai lou mafaufau, o le mea lea o aumai o mea mai fafo ua uma ona fau mai fafo e taugata atu i lo mea lea e fau i Samoa. O le uiga o lau tala, o le finish product foi lea. A o le faataitaiga, lea e fai tatou faguvai iinei i Samoa ae aumai le faguvai lea aumai fafo e taugofie atu i lo le faguvai lea e fai i Samoa. Ia o ai la o le a fia faia ni faguvai? O le faataitaiga, e pei foi o fuamoia e i ai nei, a aumai le fuamoia mai fafo e taugata atu nai lo fuamoia e i nei, ma le tele lava o le mau mea. A o le mafuaaga, o ingredients o mea ia e aumai mai fafo o oloa ia e aumai fafo e gaosi ai oloa inei, e taugata atu raw materials i lo oloa ia e aumai ua uma ona tuuapa pe ua uma ona faatino mai fafo. O mea la na o lea sa tataua ona tilotilo i ai aua o lona uiga, e le mafai la ona tupu le atinae o falegaosimea i Samoa pe afai o le tulaga lea.

O le faataitaiga a oo foi la ina fai ni fale gaosi meaai a manu, aua e i ai tagata lea e faia, e fiu e fai e uma ifo lava e taugata le tau o le taga meaai a manu lea e fai i Samoa i le taga meaai a manu lea e aumai fafo. Ia o le a faapefea la ona fai? A o le mea lea e agai i ai le tatou Malo, e agai foi lea mo substitution ia taumafai lava e fai i totonu i inei nai mea e maua ai galuega ma ia taugofie ai mea e fai ma faaoga lava tatou mea e atiae ai lava tatou i totonu o falegaosimea i Samoa. Ae le mafai la ona atiae nai a tatou tagata faipisinisi nei pe afai e faigofie ma taugofie mea mai fafo, aua o le tele foi o nei mea e aumai e le lelei le quality e le lelei foi le standard.

O lea ua address mai i le mea lea le quality ma le standard o mea e aumai ae le mafai ona tatou tuua aua a aumai lava le mea ia e taugofie, e fialia foi le tagata ia aua e fua i lana seleni ae manatua, o lea e sau ai i tua ma mea....

Aua o lea ou te molimau atu lau Afioga, e i ai mea ia ua maua i Samoa i nisi faleoloa, ua matua fesiligia lava le lelei. E amata atu lava i ipu e faaoga e aai ai, o sipuni, o apa, o mea uma nei e lau mai, e matua popole ai lou e oo lava i meaai.

FOFOGA FETALAI: Malie le sui usufono mo Faleata Sisifo, se i tulai mai le Palemia.

Susuga Hon Tuilaepa Fatialofa Auelua Lupesoliai Neioti Aiono Sailele Malielegaoi: Lau Afioga i le Fofoga Fetalai, e pei e foliga e pa salalau le mataupu a le sui usufono, ua leiloa le mea lea e agai i ai. O lea sa talanoa mai, a talanoa talanoa mai i oloa mai fafo e leaga, toe talanoa mai i oloa mai fafo e lelei, toe talanoa mai e gaosi iinei oloa e tataua ona taugofie, ae toe sau foi le isi mea ua taugata tele oloa ia e gaosi iinei. Ia manatua foi le mea lea sa ou talanoa atu ai, i le taimi na faatoa fai ai mea ia o toilet papers lea sa naunau mai ai lava le isi fai toilet paper iinei, e tuu ia toilet papers mai fafo o le a le taulia lana toilet paper. O le taimi a o ou Minisita o Tupe, sa ou le tali lava i ai, na ou faasaga lava au talau mai ia, faataga pepa toilet papers mai fafo, ia toe sau foi lana tusi, ou tusi loa i ai. Vaai, o toilet papers ia e aumai mai fafo, e ese le lamolemole toe vavai, a e faaogaina e matua leai lava ma se tulaga faaletonu, ae sasala ae ma le manu pauta, pauta foi nei e manogi. A o toilet papers ia a oe, e uma ane ua matua mafatia lava i le mageso. Lau Afioga i le Fofoga Fetalai o le ala lena, sa sili ai ona toe foi i mea foi ia sa faaoga i tua, o pulu ma laufau.

O le ala la lena lau Afioga i le Fofoga Fetalai lea e faasau ai pea tatou toilet papers ia mai fafo, ina ia siaki ai toilet papers ia e fai i totonu iinei, ina ia tatou iloa ai pea le eseese. O le isi mea, e mafiafia tele pepa ia mai fafo, a o pepa ia e i totonu o le matua manifinifi. O lea foi sa ou tau atua, sa ou nofo lelei lava ma saesae. Ia manatua foi e aumai e saesae lelei lava, e saesae atu le isi pepa, e 150 le mea e fai iinei ae 300 le mea e sau mai fafo, ae taugofie le mea lea e sau mai fafo toe lamolemole, ae toe sau ai ma le namu pauta manogi, e le uma ai lava lou fia tago atu sasae mai ma e sogisogi i ai, ma e lagona ai le matala o lou mafaufau.

Lau Afioga i le Fofoga Fetalai, e pei o le mea lena o lea ou te le o malamalama i le mea lea e sau ai, a sau i i sau i i sau i i. O le mea lea ua tupu ua atili pa salalau ai lau mataupu o lea ua atili momoe ai le Maota, ua tau leai se isi o ala atu ua le malamalama po o fea le mea lea e te ta i ai.

FOFOGA FETALAI: Ia faaiu maia le saunoaga le sui usufono mamalu.

Tofa LEALAILEPULE RIMONI AIAFI: Lau Afioga i le Fofoga Fetalai, na o le Afioga lava i le Palemia lea e faalogologo mai i lau lauga. O le taimi lenei i lou itumalo e le o momoe seiloga lava e uma le Fono faatoa tape latou leitio, e fia faalogologo mai i le mea lea ua oo i ai. Ia vaai la o lea ua tatou oo i le mea taua lea o le toilet paper.

Lau Afioga, ana ave la i ai e le Minisita sina capacity foi lea, sina mea e faatei ai si vaega lea ina ia improve ai lana toilet paper, ave i ai sina pauta, ave i ai ma se mea e faamalosi ai, ma nofo e tau i ai, ou te iloa e oo mai i le taimi lenei ua sili atu lana toilet paper i toilet paper lea ia mai fafo. Aua o le mea lea o lea e naunau i ai tatou, ia maua o tatou tagata ina ia faatino e tatou

le tele o mea i totonu o Samoa e faaaoaga e tatou ma sefe ai le foreign exchange ma sefe ai le tupe lea alu i fafo, maua ai galuega. E sao, ae faifai lava lelei, ioe, aua o tatou tagata e popoto e fai.

O le isi vaega lea e fai mai, o le a faatu le Komisi, ia a o a foi na Komisi? A o a galuega a le Matagaluega e fai?

FOFOGA FETALAI: Ia se i tuu atu le avanoa i le faauilavea a le Afioga i le Minisita mo Tina ma Tamaitai, Atinae o Nuu ma Afioaga ma Agafesootai. Tulai mai.

Tofa Hon Tolofuaivalelei Falemoe Leिताua: Faafetai lava mo le avanoa, ua matua manaia lava le lauga a le sui usufono. O lea ou te faatu atu ai se lafo, *Ina ia toe faapooopo se isi 15 minute.*

FOFOGA FETALAI: Malo. Ia faaiu maia le saunoaga.

Tofa LEALAILEPULE RIMONI AIAFI: Ou te faaluaina, faafetai lava. E fetai lava foi aua na o tatou lea feala la ua momoe Samoa. Faafetai lava i lau Afioga i le uso a Minisita Sinia o le Palemene, o le sui usufono faaauau o Leulumoega. O lea la ou te tau fesili ai i le Komisi lea, aua o lea e fai mai o sui o le Komisi, e mafai ona tolu pe oo atu i le fitu. E leai ni Komisi ua tetele faapea. Afai la ua mana'o e fai se Komisi, ia pe na o se toatolu pe a, aua o lea e foliga mai o se mea e full time le mea lea, fai ma latou tagata faigaluega.

O se mea la e fia fesili ai i lau Afioga i le Sui Palemia, o se Matagaluega fou po o se vaega o le Matagaluega? Talosia ae faapea mai o se vaega o le Matagaluega pe fai se latou potu e fai ai a latou galuega, aua ou te talitonu, o le a saga faapooopo foi o lea ua tele le afaigaluega e faia le galuega lenei. E le o ni galuega fou, o mea lea ua faatulafono ae le o ni galuega fou, o mea lava lea sa fai e tatou i lalo o isi Tulafono lea e tau fai ai le Komisi lea. Ia pe fia ni tupe e totogi ai ma tulaga faapena.

Lau Afioga, o lea e faapea mai foi le Tulafono Tau Faaofi, a faapea e i ai se feteenaiga ona ave lea i se isi Regulator e vaaia. O le mea lena lea ou te le o mautinoa, aua o le Commission it's a Regulatory, o le fonu lea a le Komisi e regulate ina mea ia. O ai la isi Regulator e ave i ai? Na o le pau lava isi Regulator ia e i ai o le... aua e i ai foi a latou matafaioi faapitoa e pei o le Telecommunication ma Eletise ma tulaga faapena, e leai se latou malamalama i mea ia tau competition i faiga pisinisi, na o le Komisi lea i lou talitonuga o le a i ai. E leai la se mea o le a toe aumai ai fua i totonu nisi Regulatory Body, Pule Faatonu e ave i ai mea nei.

O le isi vaega lau Afioga, o lea e faamamafa i le Tulafono le tutoatasi o le Komisi lea. Ia o mea lava ia lea tatou te talanoa ai, e le mafai ona tutoatasi, e tatau lava ona galulue faatasi ma le Matagaluega ma le Minisita. O lea i ai feteenaiga, aua o lea e fai mai le isi vaega e avatu e le Minisita le malosiaga foi lea e tilotilo ai i mea nei tau fefaatauaiga ma tulaga faapena ona ave lea i le Komisi e aumai le latou Lipoti. Afai la ua tutoatasi, o lona uiga na fai lava e latou le Lipoti ma aumai ai e latou le fautuaga i le mea e ao ona fai. A o le Minisita lava ma le Kapeneta e pei o latou ia e tagai i mea ia. Ae afai o lea ua saunoa mai ma faamamafa le tutoatasi, ia o lena.

O lea na saunoa le Afioga i le Sui Palemia i le amataga lava o lana folasaga, i mea ia o tau o oloa, i le control ina o tau. Ou te talitonu e le o lelei ona

aumai i totonu o le Tulafono Tau Faaofi, o lea e atili ona faamautuina le faiga o mea nei. Lau Afioga, ua lava ia manatu ou te talitonu foi e le mafai ona tali mai le Sui Palemia i nei manatu ua avatu. E tatau ona foi i tua e toe absorb lelei ma toe talanoa i lana Matagaluega e faamalamalama atili ia te ia lana Tulafono Tau Faaofi. Ou te alofa foi i le Sui Palemia e le i faitau foi ia i lana Tulafono Tau Faaofi. Ae ao ona ave se avanoa i le Sui Palemia se i malamalama lelei i lana Tulafono Tau Faaofi ona aumai ai lea o sana tali, ae tatou malolo ia e sauni i le tuuina i lalo o le tatou Maota Fono taeao. Manuia le po. Faafetai.

Tofa Hon Fonotoe Nuafesili Pierre Laufo: Faafetai lau Afioga i le Fofoga Fetalai i le saunoaga umi a le sui usufono mamalu. O lea sa ou faamaumauina uma lava, na o le tasi lava le mataupu lea mai nei mea e tele sa saunoa i ai o lea e agai i le Tulafono Tau Faaofi. O lea la o le a ou tali atu i le mea lena e tasi, ua ou vaai atu foi ua tea le 11 i le po. A o isi vaega uma masalo o le a ou le agai i ai.

FOFOGA FETALAI: Malie lau Afioga i le Sui Palemia, o le a avatu le avanoa i le Taitai o le Itu Agai ona o lea sa faailoa mai le fia saunoa o le Taitai o le Itu Agai. Faapuupu mai. E manatu o lea ua tele ina taua e le sui usufono mamalu mo Faleata Sisifo la oulua lauga faitoalua.

Tulai mai lau Afioga.

Afioga Hon PALUSALUE FAAPO II: Faafetai lava mo le avanoa ua tuuina mai, leaga o le tele ia o felefele o le Tulafono Tau Faaofi lenei. E fai o le aafiaga o le tau o le soifuaga, aafia ai galuega ma tupe maua a le Malo. E tasi lea aafiaga, o tupe maua a le Malo e tatau ona maua.

A silasila i ai i isi kiliva ia e pei ona saunoa, ua oo lava i le Aso Sa ua o. Ae talosia la o i i i le Tulafono Tau Faaofi ina ia mautinoa o totogi lafoga a kamupani nei. Ou te talitonu e le o ni kamupani i Samoa. Ae i ai kamupani o lo o feoai i Aso Sa ina ia silasila totoa i ai.

O le isi tulaga lau Afioga i le Fofoga Fetalai, e faafesili atu i le Sui Palemia, o nai tagata ia o le tatou atunuu e feoai solo ma oloa, ua le iloa le mea e maua ai se tupe, ona omai loa lea feoai ma oloa e taumafai ona faatau e maua ai se tupe. O le tele la o felefele e pei ona ou taua ua aafia ai ma tamaiti ua tatau ona o e aoga ma tulaga faapena. O le tiute lea o le Matagaluega lea. O lea la ua faataoto mai le Tulafono Tau Faaofi, o tulaga faatauvaga, aemaise o le puipui o le aiatatau a le atunuu lea e faatau oloa nei.

O le fesili lau Afioga i le Fofoga Fetalai, po o silasila lau Afioga i le Minisita ma le Matagaluega i ni auala e puipuia ai aiatatau a nai tagata nei, aemaise o le Tulafono Tau Faaofi e limataitaina ai lo tatou Malo i le mea e faatau ai oloa nei, ma siaki lelei pe le o faaogaina e le afaipisinisi nai o tatou tagata nei. Ua avea le naunau e maua se tupe, ma mea e faigofie ai ona uunai atu oloa e o e faatau savali.

E pei o tulaga ia e tatau ona silasila i ai lau Afioga i le Minisita i tulaga o tatou pisinisi. Ou te le i fesiligia le tulaga.... pau lava le mea lea ou te tilotilo i ai, o nai o tatou tagata. O le aiatatau a nai o tatou tagata ia sa maua seleni i a latou pisinisi. Ioe, ua tele ina tapunipuni. Pe faapefea ona puipui nai o tatou tagata e ala i lenei Tulafono Tau Faaofi mai le mea lea ua tupu nei, e pei ua tele ina faoa. Ua faatutu isi pisinisi a tagata e tele le mea e tua i ai. O le mea

lea ua aumai i i, o le puipuiga o tagata. Ia silasila ia ave le faamuamua, i le puipuiga o aiatau a tatou tagata Samoa, o le aufaipisinisi aemaise le au faatau. Ina ne i te i ua tatou naunau tele i le tauvaga lea e fai, ae avea ma mea e matua afaina ai le paiaga o nei tagata.

O le mea la lea lau Afioga i le Fofoga Fetalai, e taua tele le Tulafono Tau Faaofi ua faataatia mai. E pei foi ona ou fai atu i le amataga, ua fai lava si tuai o le Tulafono Tau Faaofi. A o le mea ua alu nei i ai, ua foliga mai aemaise lava i le tulaga tau oloa nei, ua avea lo tatou naunau ma mea ina ia tele oloa e aumai, a o le afaina o nai o tatou tagata. Se i silasila totoa i ai lau Afioga i le Sui Palemia ma la outou Matagaluega. Ae ou te talitonu e tele le Tulafono Tau Faaofi, ae o le a toe maua nisi avanoa i le taimi e ave ai i le Komiti.

FOFOGA FETALAI: O le a tuu atu le avanoa e tali mai ai le Afioga i le Minisita e faamalamalama le Tulafono Tau Faaofi.

Tofa Hon FONOTOE NUAFESILI PIERRE LAUOFO: Faafetai i lau Afioga i le Fofoga Fetalai. Atonu o lena e toe maua foi nisi avanoa pe a tatou agai e auiliili le tatou Tulafono Tau Faaofi lenei, o se Tulafono Tau Faaofi taua foi.

O vaega ia e pei ona aumai, e sao. O isi tulaga uma ia i le tatou Komisi lea o le a faavae i lalo o le Tulafono Tau Faaofi lenei, ina ia mataitu le tulaga o faatauvaega, le competition, ina ia aua ne i tulai mai se tulaga foi lea faapea ua le amiotonu po o ua unfair. Aua o le mea tonu lena o lea e tupu ua mafua ai ona tapunipuni nai isi pisinisi laiti, ona ua unfair le competition, aemaise lava le vaega lapopoa. O kamupani tetele ia, ae ua o... Aua o le Tulafono Tau Faaofi e agai tonu lava i aga po o le conduct a kamupani tetele ia ua faatino aga foi ia ua faigata ai e nai tamai pisinisi ona survive i totonu o le maketi lea i le tulaga o le faatauga o oloa ma auunaga. O le mea la lena o lea e tulai mai nei, e agai tonu la le Tulafono Tau Faaofi lenei e regulate ai le conduct o pisinisi ia, aemaise lava la o pisinisi tetele, o lea ua o e fai aga foi ia e taofiofi ai pe punitia ai avanoa a isi pisinisi ma tamai pisinisi, ina ia faaaauu a latou pisinisi. O aga la faapena o lea ua aumai uma i totonu o le Tulafono Tau Faaofi lenei, e pei o le mea lea e aumai o le market sharing, o le abuse o le market power, o bias fixing. O ituaiga aga uma eseese na, e tele lava lea o lo o lisi i totonu o le tatou Tulafono Tau Faaofi lenei, o lea ua aumai e faasa. O le taua la lena o le tatou Komisi lea e faavae i lalo o le Tulafono Tau Faaofi lenei, e mataituina kamupani uma ia o lo o faatinoina ituaiga aga ia po o anti competitive conduct po o behavior i totonu o maketi ina ia aua nei toe faatinoa tulaga ia, a ia tatala le avanoa i tulaga faatauvaega i pisinisi uma. Aua o le malosi o le faatauvaega, o le alu ifo foi lena i lalo o le tau o oloa ma manuia ai foi tagata lautele.

E pei o le agaga tonu lena o le competition ina ia taumafai e foster le competition i le aufaipisinisi ae aua ne i faia ni aga foi ia e pei e tuuititia ai le competition pe aveese ai le competition, ona manuia ai lava lea o le kamupani pe tasi pe lua i totonu o se maketi ae suffer uma isi pisinisi ma iu lava ina tapunia ai le tele o isi pisinisi. E pei o le agaga tonu lena o le Tulafono Tau Faaofi lenei, e faapea foi la i le vaega lona lua, o lea e aumai ina ia puipuia ai tagata faatau po o consumers ia aua ne i faaseseina i latou e tagata ia e omai e faatau oloa, po o le au gaosi oloa. A ia i le tulaga foi lea e taua faa-Peretania e taua o le deceptive conduct po o le misleading conduct. Aua ne i faia ni

tulaga taufaavalea pe taufaasese i tagata faatau. O le puipuia la o tagata faatau. O lona uiga la, o le vaega tonu lea e aumai i lalo o le Tulafono Tau Faaofi, po o ai lava la le faioloa, e tatau ona i ai guarantees, e tatau ona guarantee e ia e lelei le oloa lea na te faataua, e saogalemu le tulaga o le oloa lea e faatau atu e ia i tagata faatau. O guarantees uma na e tatau ona aumai e le tagata faioloa po o le tagata lea e fai lona faleoloa, ia aua ne i tulai mai ni tulaga faapena, la mautinoa e lelei, saogalemu oloa ia e faatau atu i tagata o le atunuu.

O le aoga la lena o le Komisi lena e mataitu tulaga ia. O le Komisi foi e le o amata e faapea o se Matagaluega fou, e leai. O lea o le a amata i se vaega foi lea tau amata i totonu o le Matagaluega e na o se toatolu i latou e tofia i le Komisi lea, e amata ai latou te mataituina le competition i totonu o pisinisi ma maketi i totonu o le atunuu. O le vaega lena. O isi vaega e pei ona i ai faletupe ia sa taua foi, o mea na o la e i lalo o le vaavaaiga a le Faletupe Tutotonu a le tatou Malo. O latou na o lea e silasila i tulaga tau financial institutions, o latou na o lo o i ai le regulatory function i tulaga faapena. E faapena foi i le EPC i le tatou eletise ma le Telecom, o la e i ai le Regulator. O le Regulator foi la e mafai ona valaaulia e sau i totonu o le Komisi lea e silasila, e aumai foi sona sao ma sana fesoasoani i tulaga faapena. Ae i le taimi lava e tasi, o lea lava e faatumau e le vave aveesea le tatou Price Control Board ae se i mataitu foi le tulaga e i ai. E mafai lava ona toe aumai se oloa i lalo o le Price Control e faatulaga ai le tau o le oloa pe a faapea ua le tele ni oloa pe leai se isi tulaga po o se isi fuafuaga e mafai ona fai i ai. A o tagata ia e faatau oloa i le aualatele e i ai tamaitai aoga, e ese uma a na... masalo o lea ua silafia e le Maota. Ua pasia uma e tatou Tulafono e aiaia ai na tulaga, o tamaiti faatau oloa i le auala ma mea uma faapena o lena lava ua silafia. O le vaega lena e pei ona avatu. Atonu lau Afioga i le Fofoga Fetalai ua manino mataupu e pei ona laga e nisi o sui usufono mamalu.

FOFOGA FETALAI: Tulai mai lau Afioga i le Palemia.

Susuga Hon TUILAEPFA FATIALOFA AUELUA LUPESOLIAI NEIOTI AIONO SAILELE MALIELEGAOI: E i ai lava si mataupu ou te fia fono faapiipi atu ai i le Tulafono Tau Faaofi lena, o taumafaiga uma lava o lo o taumafai i ai le Tulafono Tau Faaofi lea, ia i ai se paleni i le va o le aufaipisinisi ma le lautele o le atunuu. Ia fair i le aufaipisinisi, fair foi i tagata o le atunuu. O le a le mea e mafua ai le mea lea? A faitau le aofai o tagata faipisinisi, masalo pe na o le 5 pasene, ae a faitau loa le aofai o tagatanuu o le atunuu, e 95 pasene. O le a le uiga o lea mea? Ia i ai se paleni. A e lilifa tele i le itu lea ae tuulafoai le 95 pasene, o i latou na o lea e omai e fai faatau, e faatau oloa. O le a le mea lea e manao i ai le 95 pasene? Ia taugofie oloa ma ia lelei atoatoa oloa. O lona uiga e le faigofie. Ona o le tele o tatou lauga e peiseai o le a agai tele i le 5 pasene, ae galo ai le 95 pasene lena. E tatau ona taugofie oloa ma lelei atoatoa oloa. A o lea foi e taumafai ia puipui le 5 pasene lea ia fair foi le faiga o le tauvaga. A o ē e manuia i le tauvaga o le 95 pasene o le toatele o le tatou atunuu. O lea tatou te taumafai e lauga ma faapea ane, talofa i le atunuu le tagolima. A o la i totonu o faletetele ia e taugofie ai oloa, e tumu i tagata ia o le tatou atunuu e le maualuluga tupe o latou maua. A o le mea lena o lea e faataua, o lea e faataua Tulafono.

FOFOGA FETALAI: E i ai se isi mea Lealailepule?

Tofa Lealailepule Rimoni Aiafi: Lau Afioga i le Fofoga Fetalai, e tasi lava le auga o le mea e taumafai i ai le Malo ma i tatou uma ia taugofie le tau o le soifuaga. E moni e taugofie mo tagata uma, ae ia tatou iloa foi e lelei mea o lo o faatino ai. O le mea lea na ou fesili atu, ona e le i uma ona tali mai le Afioga i le Sui Palemia i au fesili.

O le isi mea lea na ou fesili atu ai, o le puipuiga lea o tatou tagata e le gata i tagata faatau, a o tagata faipisinisi, tagata ia e gaosia oloa. O mea ia e aumai i le Tulafono Tau Faaofi lea i lou talitonuga, e le o ni mea fou. O mea ua galo ia tatou, o mea foi o la e aumai i le Fair Trading Act, o le mea lena e tau ai o le Fair Trading Act. Sa ou faapea e aumai ni mea fou. E faigofie lava ona aumai, o la e faaaauau pea wholesaler ma retailers ina ia taugofie le soifuaga. Ae faapefea ona tatou iloa e moni lea tala? A o lea ua saunoa mai ua tele pisinisi ua tapunipuni, ua tele faleoloa ua le faaaauaina, ia lena, e le talafeagai le competition.

FOFOGA FETALAI: Ou te manatu o lea ua manino le folasaga a le sui usufono.

Tulai mai lau Afioga i le Sui Palemia.

Tofa FONOTOE NUAFESILI PIERRE LAUOFO: Lau Afioga i le Fofoga Fetalai, o lau tala na fai atu ua i ai nai pisinisi ua aafia. E i ai nai isi pisinisi laiti ua tapuni ona e le o maua se avanoa e compete ai, ona o aga la ia a isi kamupani tetele. A o wholesale ma retail, o le mea taua e mataitu e le Komisi, o aga ia e faatino e le oloa siiatoa. E i ai la aua e tele isi faiga ou te iloa o lea e tau agai mai ai le sui usufono po o la e i le mafaufau o le sui usufono mamalu, e i ai isi mea e fai foi nei e oloa siiatoa po o wholesale. Mo se faataitaiga, a faapea e alu alu toe lava o le wholesale lea e maua ai le tagasuka ae ua sioti i isi wholesale, ona ave loa lea o le suka faatau i luma i le retail pe afai o la e foi e fai le retail a le kamupani lea. Ona ave loa lea faatau i luma, e fua aua e tele atu le tupe e maua ai. O le isi lena faiga foi lea, e tilotilo la i aga ia e faatino e le aufaipisinisi. O isi mea e masani ona fai e isi oloa siiatoa, a faapea na o latou lea e maua ai le taga falaoamata, e alu atu la le tagata faatau e faatau sana taga falaoamata, ae faapea mai le tala, leai, e faatau muamua la sau taga suka, ma sau taga araisa ma sau pusa eleni ona faatoa mafai lea ona faatau sau taga falaoamata lea e tasi. O mea na e fai e isi kamupani i oloa siiatoa. E pei la o aga na, ona o uma lea o tagata e faatau i le wholesale lea, ona o lea e maua ai le oloa lea e tasi o la e sioti i isi wholesale, a o lea o le a taulia atu ai ma oloa a le wholesale lea. E fai la si complex laitiiti o mea ia, aua leaga o feuaiga ia o aga foi nei e fai e le aufaipisinisi, ae manaomia ai la ni tagata lelei i luga o le tatou Komisi, aemaise o tagata ia mo economists e vaavaai la i mea faapea aua e tilotilo i totonu o maketi ma aga o maketi ma aga a le aufaipisinisi. O mea faapena, e tilotilo la i aga ia e faatulai mai ona agai tonu lava lea o le Komisi i ai e fai a latou faaiuga aua o la e foi e aumai i lalo o le Tulafono Tau Faaofi faasalaga ma mea faapena e mafai ona faia e le Komisi.

E faapena foi la i mea ia o consumer protection, e i ai foi la nai solutions na e aumai i totonu i ina i aga foi nei taufaasese ma taufaavalea i tulaga o oloa. O la e foi la e aumai tulaga e mafai ona faaoga e le Komisi, e mafai ona

faatonuina foi lea e le kamupani e talia oloa ia e toe faafoi atu, pe a faapea ua le talafeagai le tulaga o le quality ae mafai ona sui mai. Ae afai foi e le mafai ona sui, toe fai se refund. Ou te iloa e tele lava mea faapea. A o mea ia o lea e aumai i totonu o le Tulafono Tau Faaofi lenei e tele mea fou. E sao o lea e i ai le tatou Fair Trading Act, ae fai si manifinifi tele e le o tele ni tulaga foi lea e mafai ona malupuipua ai tagata faatau e faapea foi la le tulaga o le competition. A o lea la ua aumai le Tulafono Tau Faaofi lenei, o lea ua aumai i se tulaga atoatoa ia mataitu uma ai vaega uma e le tatou Komisi.

O le tali atu lea i lau Afioga i le Fofoga Fetalai.

FOFOGA FETALAI: Malo. Ou te manatu ua malamalama le mataupu, finagalo malie foi le sui usufono mamalu, Palusalua faapea le sui usufono mamalu Lealailepule, o lo o i ai le avanoa i le tatou Komiti, o i ina ou te lagona e matua atoatoa ai lau fautuaga e ave.

Na faamaonia le lafo ma faitauina le Tulafono Tau Faaofi o Faiga Faatauvaga o Fefaatauaiga ma le Puipuiga o Tagata e Faaaogaina Oloa ma Auaunaga 2015 i lona faitauga faalua.

FOFOGA FETALAI: E tusa ai ma Tulafono Tumau o le a tuuina atu le Tulafono Tau Faaofi i le Komiti o Galuega, Felauaiga ma Siosiomaga mo le iloiloia ma toe lipoti mai i le Fono Aoa o se fonotaga o lumanai.

Ia, ua tatou taunuu mai i le tatou Tulafono Tau Faaofi mulimuli. Tulai mai lau Afioga i le Minisita mo Punaoa Faanatura ma le Siosiomaga e faitau faalua le tatou Tulafono Tau Faaofi ona tatou faagasolo ai lea i le faitauga faatolu tatou malolo ai lea.

TULAFONO TAU FAAOFI O TEUTEUGA O LE TULAFONO O LE FAAMAUINA O PULE O FANUA 2015 – faitauga faalua

Tofa Hon FAAMOETAU LOA LEALAI AULOTO ULAITINO FAALE TUMAALII: Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o le Faamauina o Pule o Fanua 2015 i lona faitauga faalua ma ou te fia tautala faamalamalama i ai.*

Faaluaina e le Minisita mo le Soifua Maloloina, Minisita mo Galuega Tau Alamanuia ma Atinae a le Malo ma le Minisita mo Leoleo ma Falepuipui.

Tofa Hon FAAMOETAU LOA LEALAI AULOTO ULAITINO FAALE TUMAALII: Lau Afioga i le Fofoga Fetalai, o le Tulafono Tau Faaofi lea e teuteu ai le Tulafono Autu, o le Tulafono o le Faamauina o Pule o Fanua 2008. Ma e laitiiti lava teuteuga o lo o aumaia ai ina ia faamanino ma faamaoti atili le tulaga o fanua faaleaganuu ma tulaga foi ia o fanua o le Malo ma tulaga o fanua saoloto ma lisi o fanua. O le tulaga la lea e i ai, o fanua faaleaganuu, o lo o aumai na o le faamauina i totonu o le Tulafono Tau Faaofi, e le o lavea i lalo o le faamauina o fanua e pei o isi fanua ia sa ou taua muamua o fanua o le Malo ma fanua umia saoloto.

Na pau lava le faamaumauga o lo o maua i lalo o fanua faaleaganuu, o le faamaumauga lea o faaiuga o le Faamasinoga o Fanua ma Suafa ina ia ogatasi le Tulafono Tau Faaofi lea ma le Tulafono o Fanua ma Suafa 1981. Na pau lena o teuteuga foi lea ina ia ogatasi Tulafono Tau Faaofi nei e lua. Ma lou faaloalo lava.

FOFOGA FETALAI: Malo. Ia, o le a lafo atu pea le avanoa i le Taitai o le Itu Agai.

Afioga Hon PALUSALUE FAAPO II: Lau Afioga i le Fofoga Fetalai, e puupuu lava se fesili, aua o lea ua saunoa le Minisita ma faamalamalama, o le faamauina o fanua faaleaganuu, aemaise lava o fanua ia mo iuga o Faamasinoga.

O lau fesili ia; o lea e pei ua teuteu ai le Tulafono Tau Faaofi lea na saunoa i ai le Minisita, o fanua faaleaganuu, o lea lava e tele ina laulauvivilu ai le tatou Maota, e le o ni fanua e mafai ona faatau. O lea ua i ai le Tulafono e lisi ai, a o lea la ua maua atu i lau saunoaga, o lea ua faamauina. O lona uiga, ua faamau i lalo o iuga o Faamasinoga o ai ua manumalo i lea Faamasinoga ma lea Faamasinoga, e faasino tonu i ai fanua.

O le mea lea o lea e popole ai lou sui usufono, ona e faamau loa fanua faaleaganuu, ua tutusa lava ma le fanua ua resitala. E tusa lava ua pei e le o se fanua faaleaganuu ae o se fanua umia saoloto. A o lea e i ai le malamalamaaga o le tatou atunuu aemaise o le Palemene lenei lau Afioga i le Fofoga Fetalai, o fanua faaleaganuu, e aia uma i ai aiga... Ma e le tau... i Faamasinoga i aso uma...

FOFOGA FETALAI: Ia, malie le sui usufono se i avatu le faamalamalamaaga ne i te i ua salaese le finagalo o le sui usufono.

Susuga Hon Tuilaepa Fatialofa Auelua Lupesoliai Neioti Aiono Sailele Malielegaoi: Lau Afioga i le Fofoga Fetalai, o le faalavelave o lea e malamalama le Taitai o le Itu Agai i ana upu amata, e faamau mea na o iuga a Faamasinoga e fai i ai faaiuga a Faamasinoga e tataua ona matua manino lelei mea ia e fai ai Faamasinoga. Ona o le tele foi o tuaoi, o mea o laau, a agi mai lava le matagi ua lalo le laau. Ae alu alu lava le faatoaga fananau mai fanua a matua toe fetauai, ae sue atu le laau ua leai se laau. O le ala lena na ala ai ona fai iuga a Faamasinoga mo le faamauina o mea ia, o mea o aiga e vevesi, vevesi. E le faapea o fanua uma, ae fai i fanua o lea e tulai mai ai vesiga ma o latou e tau faamaioio lelei po o fea tuaoi lea e mafua ai.

Afioga Hon PALUSALUE FAAPO II: Lau Afioga, sa ou manatu lava o la e ua i ai le iuga o Faamasinoga, o la e ua faamau e le Faamasinoga o Fanua ma Suafa, a o lea foi ua toe fai ma lea Tulafono o le Faamauina. E pei o tulaga na e faafesili atu ai i lau Afioga i le Minisita i tulaga ia, pe le i lava faamaumauga a le Matagaluega, aemaise o lea ua faatulai mai le Teuteuga o le Tulafono Tau Faaofi. Ia ua lava ia lea.

FOFOGA FETALAI: Malo. O lea ua maua. Lealailepule, sa e fia saunoa pe leai, o le a tuu atu le avanoa i le Afioga i le Minisita.
Tulai mai lau Afioga i le Minisita pe i ai se isi au tali faaopoopo.

Tofa Hon FAAMOETAU LOA LEALAI AULOTO ULAITINO FAALE TUMAALII: Leai, o lea ua saunoa le Afioga i le Palemia, ae i le tulaga foi lea o le... E manatua o lea e lavea i i lisi o fanua faaleaganuu, a sue mai la a o i ai le faamauga o lea e i ai faaiuga o Faamasinoga, ina ia fuafua i ai le tulaga o le faaiuga mulimuli e fai pe lisi pe leai. O le tasi lena mafuaaga o lea e i ai i totonu o le mea lea. Ma lou faaaloalo lava.

Na faamaonia le lafo ma faitauina le Tulafono Tau Faaofi o Teuteuga o le Tulafono o le Faamauiina o Pule o Fanua 2015 i lona faitauga faalua.

FOFOGA FETALAI: E tusa ai ma Tulafono Tumau o le a tuuina atu le Tulafono Tau Faaofi i le Komiti o Galuega, Felauaiga ma le Siosiomaga mo le iloilo ma toe lipoti mai i le Fono Aoa o se fonotaga o lumanai.

TULAFONO TAU FAAOFI O TEUTEUGA O LE TULAFONO O LE PENISINI 2015 – faitauga faatolu

Susuga Hon TUILA EPA FATIALOFA AUELUA LUPESOLIAI NEIOTI AIONO SAILELE MALIELEGAOI: Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o le Penisini 2015 i lona faitauga faatolu.*

Faalua e le Sui Palemia.

Na faamaonia le lafo ma faitauina le Tulafono Tau Faaofi i lona faitauga faatolu ma faapea ona pasia le Fono Aoa o Faitulafono.

TULAFONO TAU FAAOFI O TEUTEUGA O LE TULAFONO O PULEGA O LE TAULAGA 2015 - faitauga faatolu

Afioga Hon MANUALESAGALALA MATI TUIGAMALA ENOKATI POSALA: Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o le Pulega o Taulaga 2015 i lona faitauga faatolu.*

Faalua e le Minisita mo Leoleo ma Falepuipui, Auaunaga o Tinei Mu ma Faalavelave Tutupu Faafuasei, ma le Minisita mo le Punaoa Faanatura ma le Siosiomaga.

Na faamaonia le lafo ma faitauina le Tulafono Tau Faaofi i lona faitauga faatolu ma faapea ona pasia le Fono Aoa o Faitulafono.

**TULAFONO TAU FAAOFI O VAI PULEA TUMAOTI 2015
- faitauga faatolu**

Tof Hon TOLOFUAIVALELEI FALEMOE LEIATAUA: Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Vai Pulea Tumaoti 2015 i lona faitauga faatolu.*

Faaluaina e le Minisita mo Punaoa Faanatura ma le Siosiomaga, Minisita mo le Soifua Maloloina, ma le Minisita mo Galuega, Felauaiga ma Atinae Eseese.

Na faamaonia le lafo ma faitauina le Tulafono Tau Faaofi i lona faitauga faatolu ma faapea ona pasia le Fono Aoao Faitulafono.

**TULAFONO TAU FAAOFI O LE FALETUPE TUTOTONU O
SAMOA 2015 - faitauga faatolu**

Susuga Hon TUILAEPA FATIALOFA AUJELUA LUPESOLIAI NEIOTI AIONO SAILELE MALIELEGAOI: Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o le Faletupe Tutotonu o Samoa 2015 i lona faitauga faatolu.*

Faaluaina e le Sui Palemia, Minisita mo Pisinisi, Alamanuia ma Leipa, ma le Minisita mo Tina ma Tamaitai, Atinae o Nu'u, Afioga ma Agafesootai.

Na faamaonia le lafo ma faitauina le Tulafono Tau Faaofi i lona faitauga faatolu ma faapea ona pasia le Fono Aoao Faitulafono.

**TULAFONO TAU FAAOFI O TEUTEUGA O LE TULAFONO O
TAAVALE FEOAI I ALATETELE 2015 - faitauga faatolu**

Afioga Hon MANUALESAGALALA MATI TUIGAMALA ENOKATI POSALA: Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Taavale Feoai i Alatetele 2015 i lona faitauga faatolu.*

Faaluaina e le Minisita mo Leoleo ma Falepuipui, Auaunaga o Tinei Mu ma Faalavelave Tutupu Faafuasei, Minisita mo Punaoa Faanatura ma le Siosiomaga, ma le Minisita mo le Soifua Maloloina.

Na faamaonia le lafo ma faitauina le Tulafono Tau Faaofi i lona faitauga faatolu ma faapea ona pasia le Fono Aoao Faitulafono.

**TULAFONO TAU FAAOFI O TEUTEUGA O LE TULAFONO O LE
FETUFAAIGA O FAAMATALAGA TAU LAFOGA 2015
- faitauga faatolu**

Tofa Hon TUILOMA LAMEKO: Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Fetufaaiga o Faamatalaga o Mea tau Lafoga 2015 i lona faitauga faatolu.*

Faaluaina e le Minisita mo Galuega Tau Alamanuia ma Atinae a le Malo.

Na faamaonia le lafo ma faitauina le Tulafono Tau Faaofi i lona faitauga faatolu ma faapea ona pasia le Fono Aoaofaitulafono.

**TULAFONO TAU FAAOFI O IUNI FAAUNETUPE 2015
- faitauga faatolu.**

Tofa Hon FONOTOE NUAFESILI PIERRE LAUOFO: Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Iuni FaauNETUPE 2015 i lona faitauga faatolu.*

Faaluaina e le Minisita mo Fesootaiga ma Faamatalaga Tekonolosi, Minisita mo Galuega Tau Alamanuia ma Atinae a le Malo, ma le Minisita mo Tina ma Tamaitai, Atinae o Nuu, Afioga ma Agafesootai.

Na faamaonia le lafo ma faitauina le Tulafono Tau Faaofi i lona faitauga faatolu ma faapea ona pasia le Fono Aoaofaitulafono.

FOFOGA FETALAI: Ou te tapa lau Afioga i le Palemia mo le lafo.

LAFO A LE PALEMIA

Susuga Hon TUILAEPa FATIALOFA AUeLUa LUPESOLIAI NEIOTI AIONO SAILELE MALIELEGAOI: Lau Afioga i le Fofoga Fetalai, o lea e manino le Maota o le tausaga mulimuli lenei o le tatou Paeaiga Lona XV, ma ua toe ono nei masina ona faataape lea o le tatou Palemene. Peitai o lea e matau e 20 Tulafono Tau Faaofi o lo o i tatou Komiti Faapalemene e aofia ai ma le 7 lea ua faasee atu mai le Fonotaga lenei, ma le 13 ua tausagā o i ai pea i totonu o Komiti. O lea foi ou te matau e 6 Tulafono Tau Faaofi o lo o i le Komiti o Mataupu Tau Faamasinoga, atonu o le mafuaaga lea o le faasee o Tulafono Tau Faaofi e lua o Mataupu tau Faamasinoga i le Komiti o Tupe Maua ma Tupe Totogi.

Lau Afioga i le Fofoga Fetalai faapea foi le mamalu o le Maota, ua uma ona e tusi faamanatu i Taitaifono o Komiti i mataupu tuua ma le lē atoatoa o quorum, o le fuainumera e tatau ona i ai ona fono ai lea o le Komiti. Ua uma foi ona ou fesootai mai e faamanatu aulape pe a toesea se Taitaifono po o le lē fono foi o so o se sui usufono. O le popolega, e faiaga Komiti ae noatia ai

galuega a le tatou Fono Aoao aemaise o le Malo e ana Tulafono Tau Faaofi e moomia mo le faagasologa o ana galuega.

E le tau faamatalaina atu foi, e tiai uma nei galuega pe a oo ina faataape le tatou Palemene ia Ianuari, pe afai e le i pasia e le Fono Aoao Faitulafono ia ia Tulafono Tau Faaofi o lo o i totonu o tatou Komiti.

E mafua ai le lafo e faapea: 1. *O Tulafono Tau Faaofi uma e 13 o lo o i Komiti i le taimi nei e tataua ona foi uma mai i le Fono Aoao i lana Fonotaga faapitoa ia Setema, i le aso 21 o Setema i le masina fou.*

2. *O Tulafono Tau Faaofi e fitu(7) lea ua faasee atu nei i Komiti mai le Fonotaga lenei e tataua foi ona toe foi uma mai i le Fono Aoao i lana Fonotaga o Oketopa i le aso 20. O lea tulaga e avanoa ai le Fonotaga o Tesema mo na o le Tala Faatatau Faaopoopo o le Tupe ma Lipoti.*

O le lafo lea ma le mafuaaga o le lafo, ma le tuualalo i Komiti ina ia amanaia le lafo.

Faaluaina e le Sui Palemia, Minisita mo Pisinisi, Alamanuia ma Leipa.

Na faamaonia le lafo.

TOLOPOINA

FOFOGA FETALAI: Ou te manatu o lea ua tatou taunuu i le taunuuga o le tatou galuega i lenei afiafi. E le faaitiitia ai le agaga o le momoli atu o le faafetai ma le faamalo i le paia ma le mamalu maualuga o le tatou Maota Fono. O lenei lava ua tulitulimatagau le tatou galuega e pei o le tatou lafo sa faatuina mai i le taeao analeila, ma e le faaitiitia ai le agaga o le momoli atu o le faafetai tele i le paia ma le mamalu o sui usufono uma, aemaise foi le mamalu o le tatou Malo i lau Afioga i le Palemia ma lau Kapeneta ma sui usufono mamalu uma o le tatou Maota Fono. O lea ua suni tau i le tini le tatou faamoemoe i lenei afiafi, malo le usufono malo le tofa, malo foi le faautautaga aua le faaaliga tofa i lenei aso. E talitonu le faamoemoe ua tele ma anoanoai le tatou galuega ua maea ona faatino, a o moomooga ia ma faanaunautaiga sa manatu ai i le aso ina ia papaaveloa le tatou galuega ma ia uma lelei le tatou galuega faatulagaina mo lenei aso.

E momoli atu ai le agaga faafetai tele i le paia ma le mamalu o le tatou Maota Fono ona o le taunuuga ua taunuu i ai le tatou galuega tele mo lenei aso. E faafetaia foi le faatasi mai o le paia ma le mamalu maualuga i Ofisa Sili o Pulega ma Pule Sili o Matagaluega ma Faalapotopotoga ma la outou lagolagosua e ala i le fesoasoani i Afioga i Minisita aemaise o le taumafaiga o le tali atu a le tatou Malo.

Faafetai atu i lau Afioga i le Palemia ma lau Kapeneta ua logo ā, logo ī le taumafai mai e ala i le galuega fita o le tali mai o finagalo sa faaaliga e sui usufono i tuleiga ma saunoaga, aemaise foi timaiga ma fautuaga sa tuuina atu. O lo o ou vaai pea ma le agaga faaaloalo i lo outou tali manao ma lo outou talia o le faatalaauula ma le valuvalusia o aa o le fau i finagalo sa laga e sui usufono, ma ua matauina le mea lena i le aso. E momoli atu le faafetai tele. O i e iloa ai ma atagia ai o le tatou Maota o le Maota o le tofa ma le faautautaga loloto e tausia le vafealoaloai ma le vatapuia aua e le faigofie finagalo o lo o tuuina atu e sui usufono mamalu, o finagalo lava ia o Itumalo o lo o latou

faaleoina. A o le agaga faafetai i lenei afiafi, e momoli atu le faafetai ona o lo outou manatu i ia tulaga, e le faigofie. A tatou o loa e tulituli le amiotonu ma le faatinoina o tatou tiute ona manatu lea, ua tau le ai o taulafoga i lenei afiafi.

O lea foi ua agiga nisi o Tulafono Tau Faaofi taua sa umi se taimi o tatou soalaupuleina, a o lea ua tautino o lo o i ai nisi o teuteuga taua o lo o agai mai. O le itu sili lea ma le agaga faafetai o lo o tatala pea le tofa e le o mau i le tulaga pei ona i ai le uta a le tagata i manatu faaletonu, a o le fetalai o lo o atagia pea i le tatou fesootaiga ma le tatou Fonotaga i lenei afiafi.

E i ai le faamoemoe e le toe tau faamatalaina le aso a taeao, o le tatou polokalame ua leva ona tuupoina. Ona ou manatu lea le paia e ma le mamalu maualuga o le tatou Maota Fono, o lena ua i o outou aao le tatou polokalame. E tatou te taunuu mai lava iinei i le tulaga masani i le taimi masani, e fai foi le tatou proceeding i tulaga masani ona faatuina ai lea e le Afioga i le Palemia le tatou lafo e faataatia ese a tatou Tulafono Tumau ae faaavanoa le Maota mo le tatou Sauniga Lotu aua le faamoemoe o le tatou Maota nei.

E tatalo atu ai pea mo le faamamaluina ma le faaatoatoaina o le tatou Sauniga Lotu i le aso a taeao. Le paia e ma le mamalu o le Palemene, e le toe tau aoaia e Laupua Tamafaiga, o lo o i ina le uta a le faimea e ala i le faamanatuina ma lenei foi aso taua ma le Tala Faasolopito i totonu o Paeaiga fai mai ona o le toe aso e fai ai Sauniga Lotu aua le tatou faafetai i le Atua ona o nei tausaga e tele na faaogaina ai lenei Maota. Ua lalago mai tiasa ma fai i lagi le folauga a tulatoa ma tupu o le atunuu sa latou aifilofilo ma latou fofola le fala, sii matalalaga ma latou ta fuesina ma fueafa ma fuesinaloloa o Samoa aua le tofa saili i Tiafau nei o le Malae o le Faautugatagi a le atunuu.

E tatalo atu ai mo le faamoemoe o le tatou aso a taeao ia outou laei mai i le tulaga e talafeagai ai, e le tau fai atu o lena lava e tofu le Vaega Faaupufai ma ona tulaga masani, ae le tau fai atu i o outou laei e talafeagai ona o le Sauniga Lotu a taeao. O ni ofu po o ni laei ua e sauni e te alu ma oe i le lagi, ia fai mai taeao ina ia atagia ai le matagofie o le tatou Sauniga Lotu ma atagia ai le tatou talisapaia ma le tatou fiafia ona ua iu ma le manuia le tautua a lenei Maota, atoa ai foi ma le molimauina o le aso a taeao mo le afifio mai o le paia ma le mamalu o le tatou atunuu tatou te fai tapuaiga faatasi.

O le faasilasilaga lea ma ava tele ma le faaaloalo ma le faamoemoe o le a tatou tofafa ma momoe i lenei po tatou talosia ia tatou potopoto faatasi i le taeao fou a taeao e faataunuuina ai le tatou faamoemoe.

Ia, le tapuaiga a Samoa lou atunuu, e momoli atu le agaga faafetai ona o le tui mai pea o le mulipapaga ma le tatalo faamanuia ua iu ai ma le manuia le taumafaiga a le Palemene i lenei aso. Ua tatou tulalata i le tatou aulia o le aso fou, faamalo le tatalo. A o le tautinoga a lou Palemene, o le ituaso e lelei ai lau malolo le paia e o Samoa, o le matou valaauina e faaauau pea aua le manuia o si o tatou atunuu.

Ae le i faaiuina le tatou Fonotaga i lenei afiafi, ou te tatalo atu i le sui usufono mo Faasaleleaga Nu. 2 e tulai mai e fai se tatou tatalo faaiu ona tolopo ai lea o le tatou Fono.

Na tolopo Taualumaga a le Fono Aoa o le itula e 11.30 i le po, seia aulia le itula e 9.00 i le taeao o le Aso Faraile, 14 Aokuso 2015.